



1/2021 Jarraibidea, martxoaren 23koa, Ogasun Zuzendaritzakoa, 2020ko ekitaldirako zenbait irizpide ezartzen dituen Pertsona Fisikoen Errentaren gaineko Zergaren azaroaren 27ko 33/2013 Foru Araua eta hura garatzen duten xedapenak aplikatzeko.

Beharrezkoa da eguneratzea 4/2020 Jarraibidea, pertsona fisikoen errentaren gaineko zergaren 2020ko autolikidazioa aurkezteko.

Adierazi behar da jarraibide honen edukiak 2020ko ekitaldian aplikatzekoa den araudiari bakarrik egiten diola erreferentzia; hortaz, ekitaldi horretan bakarrik izango da aplikagarri.

1. ZERGAREN IZAERA ETA APLIKAZIO EREMUA.

1.1. 33/2013 Foru Arauaren 4.2.b) artikulua: Egoera bereziak, autolikidazioa egitea beharrezkoa dutenak.

2. Ondoko kasuetan ez da aplikatuko aurreko idatz zatian xedatutakoa: (...)b) Legez bananduta ez dauden ezkontideen eta beraien adingabeak seme-alaben kasuan, ohiko egoitza atzerrian eduki badute ezkontideetako batek –amak edo aitak– aurreko 1. idatz zatian zerrendatutako kide eta edo titulartasunetako bat eskuratu baino lehen.

Seme-alaba adingabeak aipatzen dira testuan, eta ulertu behar da seme-alaba horiek egoitza atzerrian eduki beharra sortzen zaion gurasoaren ardurapean daudela ekonomikoki.

2. ZERGA EGITATEA.

2.1. Errenten zenbatespena.

2.1.1. 33/2013 Foru Arauaren 7. artikuluko ordainketaren presuntzioaren analisia (58. artikularekin lotuta dago).

“Lanaren eta zerbitzuen prestazioak, eta ondasun eta eskubideen lagapenak, ordaindutat joko dira foru arau honek ezarritakoari jarraituz”.

Artikulu honetan ezarritako presuntzioa dela eta, zergadunak, oro har, presuntzioaren aurkako frogak aurkezteko, zuzenbidean onartzen diren bideetako bat erabiliz, 33/2013 Foru Arauaren 58. artikuluan xedatutakoaren arabera eta Zergei buruzko Foru Arau Orokorreko 104.1 artikuluan ezarritakoarekin bat etorritik. Izan ere, artikulu horretan, arau orokor gisa ezarri da foru arauetan ezarritako presuntzioak aurkako frogak bidez deusezta daitezkeela, berariaz debekaturik egon ezean.

Hala ere, kontuan hartu behar da hurrengo puntuan aztertutako salbuespena.

2.1.2 Jarduera ekonomikoaren xede diren ondasunak, eskubideak edo zerbitzuak doan lagatzea: 33/2013 Foru Arauaren 58.3 artikulua.



Zergadunak bere jarduera ekonomikoaren xede diren ondasunak, eskubideak edo zerbitzuak doan lagatzen edo mailegatzen badizkio hirugarren bati, edo berak erabiltzen edo kontsumitzen baditu, jardueraren etekin garbia zehazteko, ondasunak, eskubideak edo zerbitzuak merkatuan eduki ohi duten balioa hartuko da kontuan. Horren aurka ezin da frogarik aurkeztu, idatz zati honetan ezarritakoa ez baita arau presuntzioa, baizik eta berariaz emandako balorazio erregela.

Halaber, kontraprestazioa dagoenean eta ondasun, eskubide edo zerbitzuak merkatuan duten balio normala baino askoz gutxiago denean, merkatuko balioa hartuko da aintzat.

2.2. Salbuetsitako errentak.

2.2.1. 33/2013 Foru Arauaren 9.3 artikulua: Baliaezintasunik gabeko lesio iraunkorrak.

“Errenta hauek salbuetsirik egongo dira: (...) 3º. Gizarte Segurantzak edo haren ordezeko erakundeek subjektu pasiboari baliaezintasuna ez dakarten lesio iraunkorragatik, ezintasun iraunkor partzialagatik, osoagatik, erabatekoagatik edo handiagatik aitortutako prestazioak”.

Beste alde batetik, Zergaren Arautegiaren 14.1.b) artikuluan denboran zehar modu nabarmen irregularrean lortzeagatik zerga oinarrian ehuneko 50ean integratu ahal diren lanaren etekintzat jotzen dira: *“Gizarte Segurantzaren edo Klase Pasiboen araubide publikoetatik datozen kalte-ordainak, eta zurtzen erakundeak eta antzeko beste erakunde batzuek elbarritasunik ez dakarten lesioengatik ordaintzen dituzten prestazioak”.*

Nolanahi ere, egungo formulazioaren arabera PFEZaren ordainketan salbuespena dute Gizarte Segurantzaren araubide publikoetan baliaezintasunik ez dakarten lesioengatik ematen diren prestazioek, eta, horren ondorioz, ezin da arautu prestazio horiek zerga oinarrian integratzeko formularik.

Horrenbestez, Zergaren Arautegiaren 14.1 artikuluko b) eta c) idatz zatietan ezarritakoa honela interpretatu behar da:

Hizpide dugun ehuneko 50eko integrazioa dela eta, ondoren zehaztuko direnak denboran zehar modu nabarmen irregularrean lortutako lanaren etekintzat joko dira, zergaldi bakar batean egotziz gero:

- a) Araubide publikoetako kalte ordainak, baldin eta PFEZari buruzko Foru Arauko 9. artikuluko 3. edo 4. zenbakien arabera salbuetsita ez badaude.
- b) Enpresa eta erakunde publikoek baliaezintasuna ez dakarten lesioengatik ematen dituzten kalte ordainak, eta zurtzen elkargoek eta antzekoek ematen dituztenak ere bai.

2.2.2. 33/2013 Foru Arauaren 9. artikuluko 3. eta 4. apartatuak. Ezintasun iraunkor osoagatiko prestazioen salbuespena.

Ez dute kargarik Gizarte Segurantzak eta klase pasiboen araubideak ezintasun iraunkor osoaren ondorioz aitortutako prestazioek, baldin eta zergadunak, dagokion ekitaldian, ez badu jasotzen azaroaren 27ko 33/2013 Foru Arauaren 18 a) artikuluan ezarritakoez bestelako lan errendimendurik, edo jarduera ekonomikoaren errendimendurik.

Salbuespenaren eta laneko etekin jakin batzuen arteko bateraezintasunaren helburua da prestazio horiengatik zergak ordaintzea, baldin eta, horiek jasotzeaz gain, subjektu pasiboek lanbide edo ogibide batean jarduten badute.



Hala ere, nahiz eta prestazio jakin batzuek lan etekinen kalifikazio fiskala duten, azaroaren 27ko 33/2013 Foru Arauaren 15. artikuluan aurreikusitakoaren arabera, horiek jasotzeak ez dakar berekin subjektu pasiboak lan aktiboa egitea. Baina, ez datozenez bat 18 a) artikuluan zerrendatutako kasuekin, ezintasun iraunkor osoagatiko prestazio publikoa zergapetu beharko litzateke, biak jasoz gero. Hauek dira 18. a) artikuluan aipatutako kasuak:

-Gaur egun Araban bizi diren zergadunek jasotako prestazioak, baldin eta, beren bizitzako aldi jakin batzuetan, Gizarte Segurantzako araubide publikorik ez duten herrialdeetan lan egin badute eta, atzerrian gizarte aurreikuspeneko sistema pribatuei egindako kotizazioen arabera, prestazio horiek jasotzeko eskubidea badute.

-Ezintasun iraunkor osoko egoeran egonik zerbitzua emateari utzi dioten langileei enplegatzaileek, ezintasunagatiko prestazio publikoaren osagarri gisa, emandako zenbatekoak, hitzarmen kolektiboen edo enplegu baldintzei buruzko beste akordio batzuen arabera.

Hala bada, Gizarte Segurantzaren eta klase pasiboaren araubidearen ezintasun iraunkor osoagatiko prestazioen salbuespena ez da bateraezintzat joko gizarte aurreikuspeneko sistemek edo enpresek ordaindutako prestazioez edo ezintasun edo erretiro kontingentziez osatutako ekitaldi bereko lan etekinekin.

2.2.3. 33/2013 Foru Arauaren 9.5 artikulua: Iraupen jakin bateko lan kontratuak bukatzearen ondoriozko kalte-ordainak.

33/2013 Foru Arauaren 9.5. artikuluan jasoriko salbuespena aplikatu ahal izateko, ez da nahikoa ezarritako kalte-ordaina nahitaez ezarrita egotea Langileen Estatutuan; horrez gain, hura jaso ahal izateko, langilea kaleratu egin behar izan da edo hari lana utzarazi egin behar izan behar zaio. Hartara, beste arrazoi batzuegatik lortzen diren kalte-ordainak, hala nola hitzartutako denbora iraungi izana, ez daude zergatik salbuetsita.

Ondorioz, iraupen jakin bateko lan kontratuak –batez ere Langileen Estatutuko 49.1.c) artikuluan ezarritakoa– bukatzearen ondoriozko kalte-ordainen zenbatekoa ez dago salbuetsita PFEZetik, 33/2013 Foru Arauaren 9.5 artikulua aplikatzearen ondorioz; edonola ere, bi edo bost urte baino gehiagoan sorturiko etekin irregular izateagatik egokitu liezaiekeen tratamendua emango zaie, hala badagokio.

2.2.4. 33/2013 Foru Arauaren 9.6 artikulua: Erantzukizun zibileko kalte-ordainak.

“6. Pertsonen eginiko kalte fisiko, psikiko edo moralen ondoriozko erantzun zibilaren kalte-ordainak (legez edo epai bidez onartutako zenbatekoa).”

Kalte fisikoak edo psikikoak esatean haxe ulertu behar da: kanpoko indarkeriaz, bat-batean eta zergadunak nahi gabe egindako lesio fisiko edo psikikoak, aldi baterako baliaezintasuna edo baliaezintasun iraunkorra sortzen dutenak. Beraz, kalte ordaina aurrekoak bezalako gertakari baten ondoriozkoa denean soilik aplikatu daitezke salbuespen hau.

Legez ezarritako zenbatekoei dagokienez, esan behar da gorabehera hori gertatzen dela kaltea jasan duen pertsonari ordaindu behar zaion kalte-ordainaren zenbatekoa arau batean ezarrita dagoenean. Ondorio horietarako, zirkulazio istripuetan, pertsonen eragindako kalte-galerak balioesteko sistema aplikatu behar da, zeina urriaren 29ko 8/2004 Legegintzako Errege Dekretuaren eranskin gisa ageri baita (orain irailaren 22ko 35/2015 Legearen eranskinak ordeztzen du hura), eta legegintzako errege



dekretu horren bidez, onespena ematen zaio motordun ibilgailuen zirkulazioan erantzukizun zibilari eta aseguruari buruzko legearen testu bateginari.

Aldiz, hauekako edozein izan daiteke “epai bidez aintzatetsitako zenbatekoa”: a) Epaille edo auzitegi batek ebazpen judizialaren bidez finkatutako zenbatekoa; b) Tarteko beste formula batzuk, zeinetan gatazkan dauden alderdien jarreraren borondatezko hurbilketa bat gertatzen baita, baldin eta justiziaren esku-hartze edo aitortpen motaren bat badago, hala nola adiskidetze judizialeko egintzak, amore emateak, uko egiteak, atzera egiteak edo transakzio judizialak.

Salbuetsitako zenbatekoaren gaindikina zerga-oinarri orokorrean sartu beharreko ondare irabazia da onuradunarentzat.

2.2.5. 33/2013 Foru Arauaren 9.7 artikulua: Aseguru kontratuen ondorioz jasotako diru zenbatekoak.

“7. Aurreko zenbakian adierazitako kalte beraiengatik aseguru kontratuen bidez jasotzen diren zenbatekoak; gehienez 150.000 euro. Zenbateko hori 200.000 euro izango da lesioak jasotzailea edozein lan edo jarduera egiteko ezgaitzen baldin badu, eta 300.000 eurokoa izango da baldin eta, horrez gainera, jasotzaileak beste pertsona baten laguntza behar badu eguneroko bizitzako oinarrizko ekintzetarako.”

Kalte fisikoak edo psikikoak esatean hauxe ulertu behar da: kanpoko indarkeriaz, bat-batean eta zergadunak nahi gabe egindako lesio fisiko edo psikikoak, aldi baterako baliaezintasuna edo baliaezintasun iraunkorra sortzen dutenak.

Idatz zati honetan “aseguru kontratuak” aipatzen dira, besterik zehaztu gabe, eta pentsatu behar da esamolde horrek langileekiko hartutako pentsio konpromisoak gauzatzen dituzten talde aseguruak ere adierazten dituela, kontuan edukita gertaera aipatutako kalteen ondoriozkoa izan behar dela.

Zenbateko salbuetsiaren gainetik onuradunak jasotako gaindikina honela zergapetuko da:

a) Zenbatekoa enpresak bere gain hartutako pentsio konpromisoa gauzatzen duen talde aseguru baten ondoriozkoa bada, lanaren etekin gisa.

b) Bestelako kasuetan, bereizketa hau egin behar da:

b.1 Prestazioa ezintasun iraunkorragatik ematen bada, kapital higigarriaren etekin gisa

b.2. Prestazioa aldi baterako ezintasunagatik ematen bada, ondare irabazi gisa

2.2.6. Osasun langileentzako doako talde aseguruaren salbuespena: COVID-19arekin lotuta, pertsona fisikoaren errentaren gaineko zergako, oinordetzen eta dohaintzen gaineko zergako eta ondare eskualdaketen eta egintza juridiko dokumentatuen gaineko zergako doikuntza neurriak onesten dituen ekainaren 23ko 8/2020 Zerga Premiazko Araugintzako Dekretuaren 3. artikulua.

2020an, pertsona fisikoaren errentaren gaineko zergatik salbuetsita egongo dira COVID-19ak sortutako gaixotasun eta heriotza kontingentziak direla-eta Aseguru eta Berraseguru Entitateen Espainiako Elkartearen bitartez aseguru entitateekin osasun langileentzat sinatutako doako talde asegurutik etorritako prestazioak, bai eta aseguru entitateekin osasun langileentzat sinatu den eta antzeko ezaugarriak dituen doako beste edozein talde asegurutakoak ere.



2.2.7. 33/2013 Foru Arauaren 9.13 artikulua: Langabezia prestazioa ordainketa bakarrean jasotzea.

Idatz zati honetan ezarritako salbuespena aplikatzeko, ezinbestekoa da hauetako bat gertatzea: zergaduna lan sozietate edo lan elkartuko kooperatiba batean sartu bada edo ekarpena egin badu merkataritzako entitate baten kapitalera, akzioa edo partaidetza bost urtean mantentzea; langile autonomoa bada, jarduerari bost urtean eustea. Zergaren Foru Arauan ezartzen diren kasuetan ez da eskatuko bost urteko aldi hori.

Baldintza hori betetzen ez bada, zergadunak bere egoera erregularizatu beharko du eta ezin izango du alegatu aurreko ekitaldiak preskribatu direla. Horri begira, Administrazioak likidatzeko duen eskubidea preskribatutzat jotzeko behar diren urteak hara noiztik hasiko diren kontatzen: behar bezala kendutako zenbatekoak sartzekoak diren autolikidazioak aurkezteko epea (hau da, ez betetzea gertatzen den ekitaldiari dagokion autolikidazioa) amaitu eta hurrengo egunetik hasita.

Preskripzioa modu berean tratatuko da beste kasu honetan ere: PFEZaren araudian ezarritakoaren arabera, zerga onura aplikatzeko, aldi jakin batean baldintza batzuk bete behar direnean (etxebizitza kontuak, ohiko etxebizitza eraikitzea, etab.).

2.2.8. 33/2013 Foru Arauaren 9.17 artikulua eta Zergaren Arautegiaren 11. artikulua: Atzerrian egindako lanengatik jasotzen diren etekinak.

Salbuespena aplikatu ahal izateko, baldintza hauek bete behar dira:

- 1) Lortutako errentak lanaren etekintzat jotzea.
- 2) Errentak atzerrian egindako lan baten ondoriozkoak izatea. Horretarako, ezinbestekoa da langilea Espainiako lurraldetik kanpora joatea eta, gainera, lantokia atzerrian egon behar, aldi baterako behintzat.
- 3) Lanak egoiliar ez den enpresa edo entitate batentzat edo atzerrian egoitza duen establezimendu iraunkor batentzat egitea. Hau da, lekuz aldatutako langileak ematen dituen zerbitzuen onuraduna egoiliarra ez den enpresa edo entitate bat edo atzerrian dagoen establezimendu iraunkor bat izan behar da. Ondorioz, salbuespena kasu batean bakarrik aplika daiteke: zergadunak egindako jarduera egoiliarra ez den entitate edo establezimendu baten onurarako izan bada, hau da, jarduerak entitate edo establezimenduari abantailaren bat ekarri badio edo balio erantsia eman badio, edo baliagarria izan bazaio. Horregatik, zenbait zeregin, adibidez erosketak egitea, atzerrian azpikontratatzea eta atzerriko entitate egoiliarrak hornitzea ez dira justifikazio nahikoa salbuespena egiteko, nahiz eta atzerrian egin, lan egiten den entitate egoiliarraren onurarako egiten dira eta.

Zerbitzuak ematen zaizkion entitatea langilea enplegatzen duen entitatearekin lotuta badago, edo langileak zerbitzuak ematen dituen entitatearekin, Sozietateen gaineko Zergari buruzko Foru Arauaren 44.1 artikuluan ezarritakoa bete behar da, halako moldez non talde barruko zerbitzua eman dela ulertuko baita, entitate hartzaileari abantaila edo onura dakarkiona eta entitate enplegu emailearen fakturazioa izan duena edo izan behar duena. Bereziki, taldeko beste kide batzuen mesederako zerbitzua egiten ari dela ulertu behar da, baldin eta egiten den jarduerak haientzat interes ekonomikoa edo komertziala badu, merkatuan duten lekua sendotzen dielako. Hau da, inguruabarrak antzekoak direnean, kasuan kasuko zerbitzuak hartzen dituzten enpresak prest egongo lirateke zerbitzu horiek hirugarren independenteei kontratatzeko (edo lanak enpresa barruan egingo lituzkete).



4) Enpresa edo entitate enplegu emaileak nazioz gaindiko zerbitzuak ematen dituenean, langilea atzerrira joatea.

5) Lanak egin diren lurraldean PFEZa bezalako edo horren antzeko zerga bat aplikatzea, eta arauz ezarritakoaren arabera herrialdea edo lurraldea zerga paradisua ez izatea. Ondore horietarako:

- a) Ez da beharrezkoa lanaren etekinak lanak egin diren herrialdean edo lurraldean kargatu izana egiaz. Izan ere, arauz hauxe bakarrik ezarri da: lanak egin diren lurraldean PFEZa bezalako edo horren antzeko zerga bat aplikatzea. Ez da ezarri diru sarrerak sortzen diren tokian bertan kargapean egon behar direnik.
- b) Zerga paradisu diren herrialdeak eta lurraldeak uztailaren 7ko 435/1992 Foru Dekretuan zehaztu dira. Hala ere, 2017ko urtarrilaren 29ra arte zerga paradisu izateari uzten zioten Espainiarekin nazioarteko zergapetze bikoitza ekiditeko hitzarmena, informazioa trukatzeko klausula zuena, sinatzen zuten herrialdeek eta lurraldeek, bai eta zergei buruzko informazioa trukatzeko akordioa sinatzen zutenek ere, baldin eta hitzarmenean edo akordioan berariaz ezartzen bazen indarrean jartzen zenetik aurrera dena delako herrialdea edo lurraldea ez zela zerga paradisua izango. Hala ere, 2017ko uztailaren 29tik Zergen Foru Arau Orokorreko hamabosgarren xedapen gehigarriak zehazten du zerga paradisu zatituta jotzen diren herrialde eta lurraldeen zerrenda honako irizpide hauen arabera eguneratu daitekeela: 1) hitzarmen bat egotea nazioarteko egozpen bikoitza galarazteko, informazioa trukatzeko klausularekin, edo zerga gaietan informazioa trukatzeko akordio bat egotea, edo ELGAREN eta Europako Kontseiluaren zerga gaietako administrazioen arteko laguntzaren hitzarmena egotea, 2010eko Protokoloaren bidez zuzendua, eta aplikatu behar izatea; 2) zerga informazioaren truke eraginkorra egotea, Zergen Foru Arau Orokorreko hamabosgarren xedapen gehigarriko 4. idatz zatian ezartzen den bezala; 3) Zergen Alorreko Gardentasunaren eta Informazio Trukearen Foro Globalak egindako inter pares ebaluazioen emaitzak. Beraz, egun horretatik aurrera zerga paradisuaren zerrenda ez da eguneratzen modu automatikoan; aitzitik, berariaz eguneratu behar da aurrean aipatutako irizpideak aplikatuz.
- c) Lanak egin diren herrialdeak edo lurraldeak nazioarteko zergapetze bikoitza ekiditeko hitzarmena sinatu badu Espainiarekin eta hitzarmen horretan informazioa trukatzeko klausula badago, 5) puntu honetan ezarritako baldintza betetzat joko da.
- d) Hitzarmenik ez badago, Zergen Foru Arau Orokorreko hamabosgarren xedapen gehigarriak ezartzen duena aplikatu behar da; hona hemen zer dioen: “(...)errenta, partez besterik ez bada ere, zergapetzea helburu duten zergak zerga berdin-berdin edo antzekotzat joko dira, zergaren xedea errenta bera, sarrerak edo errenta egotearen zantzia ematen duen beste edozein elementu dela ere. Pertsona fisikoen errentaren gaineko zergaren kasuan, zerga berdin-berdin edo antzekotzat joko dira Gizarte Segurantzari egindako kotizazioak, arau bidez ezarritako diren baldintzetan”.

6) Salbuespena atzerrian egondako egunetan sortutako ordainsariei aplikatuko zaie; urteko gehieneko kopurua erreferentziatzeko artikuluan finkatu da. Atzerrian egindako lanei dagokien ordainsaria kalkulatzeko, langilea atzerrian benetan zenbat egun egon den hartu behar da kontuan, eta kanpoan egindako zerbitzuen berariazko ordainsariak ere bai. Atzerrian egindako lanengatik eguneko zenbat etekin sortu den kalkulatzeko, lan horiei dagokien berariazko ordainsari berezietatik aparte, banaketarako irizpide proportzionala erabiliko da urtearen egun kopuru osoa kontuan hartuz.



7) Salbuespen hau ezin da bateratu Zergaren Arautegiaren 13.A.3 b) artikuluan ezarritako araubidearekin, alegia, tributaziotik salbuetsitako gairik gabeko araubidearekin; sarien araubide orokorrarekin, aldiz, bateratu daiteke.

2.2.9. 33/2013 Foru Arauaren 9.21 artikulua: Zerbitzu publikoen funtzionamenduaren ondorioz pertsonen egindako kalte fisikoak, psikikoak edota moralak.

Kalte fisikoak edo psikikoak esatean, haxe ulertu behar da: kanpoko indarkeriaz, bat-batean eta zergadunak nahi gabe egindako lesio fisiko edo psikikoak, aldi baterako baliaezintasuna edo baliaezintasun iraunkorra sortzen dutenak.

2.2.10. 33/2013 Foru Arauaren 9.24 artikulua: Mozkinen dibidenduak eta partaidetzak.

33/2013 Foru Arauaren 34. artikuluan a) eta b) puntuetan aipatzen diren mozkinetako dibidendu eta partaidetzak 9.24 artikuluan ezarritako urteko salbuespena dute, entitate egoiliarrekoak zein ez-egoiliarrekoak izan.

Zergaldia egutegiko urtea baino laburragoa bada, salbuespenaren zenbatekoa ez da hainbanatuko.

Egoiliar ez diren sozietateek ordaindutako dibidenduak direla eta, kontuan eduki behar da nazioarteko zergapetze bikoitzagatik kenkaria, azaroaren 27ko 33/2013 Foru Arauko 92. artikuluan arautzen dena, zerga oinarrian sartutako dibidenduei soilik aplikatu ahal zaiela, hau da, salbuespen hau aplikatu ez zaienei.

2.2.11. 33/2013 Foru Arauaren 9.25 artikulua: Desgaitasunen bat duten pertsonen errenta moduan jasotako prestazioak, foru arau horren 72. artikuluan aipatzen diren ekarpenen dagozkienak.

BGAerako ekarpenak egiten hasi ondoren aintzatesten bazaio desgaitasuna zergadunari, desgaitasuna aitortu ondoren egindako ekarpenen dagozkien prestazioek soilik edukiko dute salbuespena aplikatzeko eskubidea.

2.2.12. 33/2013 Foru Arauaren 9.39 artikulua. Bizitzeko gutxieneko errentaren salbuespena.

Salbuetsita geratzen dira bizitzeko gutxieneko diru sarrera ezartzen duen maiatzaren 29ko 20/2020 Legegintzako Errege Dekretuan araututako bizitzeko gutxieneko diru sarrera gisa jasotako errentak.

2.2.13. Salbuetsitako errentak. COVID-19ak eragindako pandemiaren ondorioak arintzeko 2021erako zerga neurriak onesten dituen abenduaren 1eko 14/2020 Zerga Premiazko Araugintzako Dekretuaren 2. artikulua.

, jarraian zerrendatzen diren laguntzak salbuetsita daude:

a) Etxebizitza librearen alokairurako laguntzak, Ingurumen, Lurralde Plangintza eta Etxebizitzako sailburuaren 2020ko apirilaren 30eko Aginduak xedatutakoarekin bat etorritik emanak (agindu horren bidez, COVID-19 birusak eragindako osasun krisiaren ondoriozko kalteberatasun ekonomiko eta sozialeko egoerei aurre egiteko etxebizitza librearen alokatzeko laguntzak arautu ziren, eta horietarako deialdia egin zen).



b) Ingurumen, Lurralde Plangintza eta Etxebizitzako sailburuaren 2020ko martxoaren 31ko Aginduak xedatutakoari jarraituz emandako laguntzak (agindu horren bidez, alokairu erregimeneko etxebizitza babestuen arloan COVID-19 birusaren inpaktu ekonomikoari erantzuna emateko hartu beharreko neurriak arautu ziren).

c) Familientzako laguntzak, zeinak baitira seme-alabei (duten adinagatik), mendeko pertsoneri edo COVID-19ak erasan dien gaixoei (kutsatuak edo isolatuak) lagundu, arreta eman eta haiek zaintzeko, Enpleguko eta Gizarte Politiketako sailburuaren 2020ko apirilaren 8ko Aginduan ezarritakoari jarraituz emanak (agindu horren bidez, COVID-19aren inpaktu ekonomikoari erantzuteko familientzako laguntzen arloko neurri zehatzak arautu ziren).

d) Turismo, Merkataritza eta Kontsumoko sailburuaren 2020ko uztailaren 28ko Aginduan jasotako dirulaguntza programaren onuradun diren pertsoneri emandako laguntzak (agindu horren bidez, Euskal Autonomia Erkidegoko turismo, sukaldaritza eta ostalaritza sektoreetako establezimenduetan kontsumoa sustatzeko “Euskadi Turismo Bona” programa arautu eta 2020rako deialdia egin zen), eta beste laguntza batzuk, Eusko Jaurlaritzaren, hiru foru aldundien, EAEko hiru hiriburuetakoko udalen eta EUDEL Euskadiko Udalen Elkartearen arteko Jarduteko Protokolo Orokorren barruan ematen direnak.

e) Turismo, Merkataritza eta Kontsumoko sailburuaren 2020ko uztailaren 28ko Aginduan jasotako dirulaguntza programaren onuradun diren pertsoneri emandako laguntzak (agindu horren bidez, Euskal Autonomia Erkidegoko merkataritza sektoreko establezimenduetan kontsumoa sustatzeko “Euskadi Bono-Denda” programa arautu eta deialdia egin zen); eta beste laguntza batzuk, Eusko Jaurlaritzak, Araba eta Bizkaiko foru aldundiek, EUDEL Euskadiko Udalen Elkarateak eta Bilbo eta Gasteizko udalek sinatutako erakunde arteko akordioaren barruan ematen direnak.

Horrez gain, 2020ko zergaldian, salbuetsita egongo dira COVID-19ak eragindako osasun krisia dela-eta agintari eskudunek hartutako neurrien ondorioz jarduera eten edo geratu behar izan duten edo jardueran eragin larria jasan duten norberaren konturako langileei edo langile autonomoei administrazio publikoek emandako dirulaguntzei edo aparteko laguntzei dagozkien errentak.

Bereziki, salbuetsita egongo dira xedapen hauen bidez emandakoak:

a) 2020ko azaroaren 13ko Agindua, Turismo, Merkataritza eta Kontsumoko sailburuarena, zeinaren bidez EAEko ostalaritza sektoreko laguntzak arautzen baitira eta deialdia egiten baita.

b) 2020ko apirilaren 8ko Ebazpena, Lanbide-Euskal Enplegu Zerbitzuko zuzendari nagusiarena, aparteko dirulaguntzetarako deialdi bat argitaratzeko dena; dirulaguntzen hartzaileak norberaren konturako langileak edo langile autonomoak izango dira, zehazki beren jarduerak etenda dituztenak COVID-19ak eragindako osasun krisia kudeatzeko deklaraturako alarma egoera dela-eta.

Salbuespena ez zaie aplikatuko norberaren konturako langileek edo langile autonomoek COVID-19ak eragindako osasun krisiaren esparruan jasotako prestazio publiko arrunt zein apartekoei.

3. LAN ETEKINAK.

3.1. Lanaren etekinak zer diren.

3.1.1. Bekak.



Ikasketak egiteko ordaintzen diren kopuruak (laguntzak, bekak, etab.), 33/2013 Foru Arauaren 9.9 artikuluan ezarritakoari lotu ezean, PFEZaren kargapeko (eta salbuetsi gabeko) eta haren konturako atxikipenen sistemaren menpeko etekinak izango dira jasotzailearentzat, norberaren lanaren etekin gisa zein lanbide jarduera baten emaitza gisa

a) Kasu hauetan, lanaren etekintzat joko dira:

a.1. Bekaren sorburua edo hura ematea eragiten duen erlazioa kontuan hartuta:

- Emailarekin lan erlazioa duten pertsonak lortzen dituztenak, edo haien (beka jasotzen duten enplegatuen) senitartekoak lortzen dituztenak.

- Administrazio erakunde edo organo emaile bati funtzionario erlazioaz loturiko pertsonak, edo haien senitartekoak (aurrean bezala), lortzen dituztenak.

a.2. Emailaren eta bekadunaren artean ezartzen den lotura dela bide; hain zuzen ere, beka, horrelako kasuetan, batak bestearen jarraibideei kasu eginez egiten duen lanaren emaitzako etekina da.

a.3. Bekadunaren eta emaileak izendatutako beste baten artean eratzen den lotura dela bide; beka, horrelako kasuetan, bekadunak emailaren edo hark izendatutako norbaiten jarraibideei kasu eginez egiten duen lanaren etekina da.

b) Salbuespen gisa, beka lanbide jarduera bati zuzenean lotutako ikasketak edo ikerketak egiteko eman bada, bekadunaren lanbide jardueraren etekintzat jo behar da, haren lanbide jarduerarako laguntzat har baitaiteke.

3.1.2. Lan istripuetako eta lanbide gaixotasunetako mutuak.

Lan istripuetako eta lanbide gaixotasunetako mutuak Gizarte Segurantzaren kudeaketan laguntzen duten entitateak dira.

PFEZaren ordainketan, Gizarte Segurantzak zergadunei aitortutako prestazio guztiak berdin tratatu behar dira, ordaintzailea Gizarte Segurantza bera zein mutua laguntzaile bat izan.

3.1.3 Prestazio ekonomikoen gaineko errenergua, lan istripua edo lanbide gaixotasuna gertatuz gero.

Ekainaren 20ko 1/1994 Legegintzako Errege Dekretuaren bidez onetsitako Gizarte Segurantzaren Lege Orokorren testu bategineko 123. artikuluan hauxe ezarri da: "1. Sorburua lan istripu edo laneko gaixotasunen batean duten diru prestazioak ehuneko 30etik ehuneko 50era bitartean handituko dira, faltaren larritasunaren arabera, hauetariko bat bada lesioaren eragilea: makina edo artefaktu, edo instalazio, zentro edo lantoki bat, arauzko prekaizio tresnarik ez duena, izanda ere halakorik erabiltzen ez duena edo dauzkanak egoera txarrean dituena; laneko higienerari eta segurtasunari dagozkion neurri orokor edo bereziak ez kontuan hartu izana; edo oinarrizko osasungarritasun neurriak edo norbera lanera egokitzeari buruzkoak lanaren ezaugarriak eta langilearen adina, sexua eta gainerako baldintzak kontuan hartuta ez bete izana." 2. Aurreko zenbakian ezarritako gehigarria ordaintzeko erantzukizuna, zuzenean, araua hautsi duen enpresaburuarena izango da; ezin izango da ezein aseguruarekin babestu, eta zuzenbidean erabat deusez izango da edozein itun edo kontratu egitea erantzukizun hori estaltzeko, konpentsatzeko edo besteri transmititzeko. 3. Artikulu honek arautzen duen erantzukizuna



independentea eta bateragarria da arau haustetik erator litezkeen beste edozein ordenatako erantzukizunekin, erantzukizun penala barne”.

Errekargu hau urriaren 30eko 8/2015 Legegintzako Errege Dekretuaren bidez onetsitako Gizarte Segurantzaren Lege Orokorraren testu bategineko 164. artikuluan arautzen da (2016ko urtarrilaren 2tik aurrera dago indarrean).

Errekargu honen zerga tratamendua pertsona fisikoen errentaren gaineko zergaren tributazioan aplikatzen zaion prestazioari dagokiona da. Beraz, kontzeptu honegatik jasotzen den zenbatekoa lanaren etekin gisa kargatuko da edo kargatik salbuetsita egongo da, kasuan kasukoa honen arabera: prestazioak azaroaren 27ko 33/2013 Foru Arauko 9. artikuluan ezarritako salbuespenetako bat aplikatzeko bete behar diren baldintzak betetzen dituen edo ez.

Dena den, gogoan eduki behar da ezinbestekoa dela errekarгуaren eragilea ez izatea langileak jasandako kalte fisikoa edo psikikoa; aitzitik, errekarгуa enpresaburuak segurtasun neurrietan egiten duen urratzearen larritasunaren eta aplikatzen zaion prestazioaren zenbatekoaren araberkoa izan behar da. Beraz, errekarгуu honi ezin zaio aplikatu kalte ordainen tratamendua.

3.2. Joan-etorri gastuetarako eta mantenu eta egonaldiko gastu arruntetarako sariak eta esleipenak.

3.2.1. Sarien araubidea lan zentro higigarri edo ibiltarrietan. Eraikuntza eta muntaketako enpresak.

Eraikuntzako enpresek beren langileei joan-etorrien gastuen zioz ordaintzen dizkieten sariei ez zaie aplikatu behar lan zentro higigarriak dituzten enpresentzat ezarritako araubidea. Aitzitik, sarien araubide orokorra aplikatu behar zaie, obrak ez baitira lan zentro higigarri edo ibiltaritzat hartzen, ez dira lekuz aldatzen eta.

3.2.2. Izaera bereziko lan harremanak: Zergaren Arautegiaren 13.B.1 artikulua.

Lan harreman berezien ondorioz lanaren etekinak lortzen dituzten zergadunek kargapetik salbuetsi ahal izango dituzte enpresak ordaindutako egonaldi gastuak. Enpresak egonaldi gasturik ordaintzen ez badu, zergadunek, etekin garbiak kalkulatzean, ezin dituzte murriztu beren sarrerak kontzeptu honen zioz.

3.2.3. Gastuak hirugarren baten kontura.

Kargatik salbuetsita dauden dieten araubideak oinarritzat hartzen du dieta horiek ez direla benetako ordainsariak hartzaileentzat; aitzitik, haien bidez konpentsazioa baino ez zaie ematen langileei, enplegu emailearen aginduz lantokitik edo lantokiko udalerritik kanpora egin behar izaten dituzten joan-etorrien gastuengatik.

Baina Zergaren Arautegiaren 13. artikuluan dietak kargatik salbuesten dituen araubide hori ordaintzailearekin lan edo estatutu harremana duten zergadunei bakarrik aplikatu ahal zaie. Beraz, ezin dute araubide hori aplikatu, besteak beste, administratzaileek, administrazio kontseiluetako eta horien ordezkotako batzordeetako kideek eta beste ordezkari organo batzuetako gainerako kideek.

Ordaintzailearekin lan edo estatutu harremanik ez izan arren lanaren etekinak lortzen dituzten zergadunei gastuak eragin ahal dizkie euren jardunak, eta gerta liteke gastu horien ordaina zergadun horientzat errenta ez izatea, baina ez Zergaren Arautegiaren 13. artikuluan ezarritako inguruabar eta



baldintzekin, baizik eta “hirugarren baten kontura jasandako gastu” modura, eta horiek ordaintzea ez da errenta kargatzen hartzen.

Ondoko hauek gertatu behar dira “hirugarren baten kontura egindako gastua” ordaintzeak kargapeko errentarik ez sortzeko:

1.- Zergadunak kargatik salbuetsitako dieten araubideari heltzeko eskubiderik ez edukitzea azaroaren 27ko 33/2013 Foru Arauan eta Zergaren Arautegian (13. artikulua) ezarritakoarekin bat etorritz.

2.- Entitate ordaintzailearen gastuen xedea zergadunen eskura lana egiteko behar dituzten baliabide guztiak jartzea izatea, besteak beste, lantokirako joan-etorrietarako behar dituztenak.

Hala, bada, horrelako kasuetan zergadunei ordaintzen zaizkien diru kopuruak ez dira kargapean egongo, baldin eta diru kopuru horiek hartzea eta ordaintzaileak zergadunei euren eginkizunak bete ahal izateko baliabide materialak eskura jartzea pareko ekintzak direnean. Hau da, zerbitzuak egin behar dituzten lekuetaraino joateko gastuak zehatz-mehatz ordaintzen zaizkienean.

Aldiz, ordaintzaileak oroharreko diru kopuru batzuk ordaintzen baditu eta ezin bada frogatu diru kopuru horien bidez zehatz-mehatz konpentsatzen direla zergadunek euren eginkizunetan jasaten dituzten gastuak (joan-etorriak...), orduan diruzko ordainsari baten aurrean egongo gara, eta lanaren etekin gisa zergapean egongo da, eta salbuetsi gabe.

3.3. Gauzako errentak.

3.3.1. Gauzako errentak: azaroaren 27ko 33/2013 Foru Arauko 60.2 artikuluko azken paragrafoak.

2016ko apirilaren 30era arte sortutako etekinak.

Gauzatan jasotzen diren lanaren etekinak maileguak emanez lortzen badira, haien zenbatekoa kalkulatzeko eragiketa hau egin behar da: ordaindutako interesetatik aldi horretan diruak izan duen legezko interesak kendu behar dira.

Hala ere, kreditu etxeek beren langileei maileguak emateagatik gauzatan ordaindutako ordainsarien balioa honela kalkulatu behar da:

Diruaren legezko interes tasa merkatukoa baino baxuagoa bada, gauzatan jasotako ordainsariaren zenbatekoa hau da: ordaindutako interesen eta legezko interesen arteko diferentzia. Diruaren legezko interes tasa merkatukoa baino altuagoa bada, ordainsariaren zenbatekoa hau da: ordaindutako interesen eta merkatuko interesen arteko diferentzia.

Ondorio horietarako, aintzat hartuta kreditu etxeek baldintza onuragarri bereziak dituzten pertsonen eskatzen dizkieten interes tasak eta beren langileei emandako maileguetako berankortasun eza, hau da merkatuko interes tasa:

a) Mailegua etxebizitza erosteko eman bada, hipoteka bermedunak diren ala ez alde batera utzita, bi hauetako txikiena:

a.1) Etxebizitza askea erosteko norbanako egoiliarrei hiru urte edo gehiagorako ematen zaizkien hipoteka bermedun maileguen urteko batez besteko interes tasa haztatua, Espainiako Bankuak



ekainaren 27an kreditu entitateei eta ordaindu beharreko zerbitzuen hornitzaileei bidalitako 5/2012 Zirkularrak, zeina baita banku eragiketen gardentasunari eta bezeroen babesari buruzkoa, hamaseigarren arauko 4. puntuan eta 9. eranskinean xedatzen duenaren arabera kalkulatua.

a.2) Hamabi hiletarako EURIBORari dagokion urteko batez besteko interes tasa, 0,3 puntu gehituta (EURIBOR+0,3).

b) Mailegua kontsumorako eman bada, bi hauetako txikiena:

b.1) Etxebizitza askea erosteko norbanako egoiliarrei hiru urte edo gutxiagorako ematen zaizkien mailegu pertsonalen urteko batez besteko interes tasa haztatua (dela polizan dela finantza gaietan emandako mailegua), Espainiako Bankuak ekainaren 27an kreditu entitateei eta ordaindu beharreko zerbitzuen hornitzaileei bidalitako 5/2012 Zirkularrak, zeina baita banku eragiketen gardentasunari eta bezeroen babesari buruzkoa, hamaseigarren arauko 4. puntuan eta 9. eranskinean xedatzen duenaren arabera kalkulatua.

b.2) Hamabi hiletarako EURIBORari dagokion urteko batez besteko interes tasa, 1,25 puntu gehituta (EURIBOR+1,25).

Batera zein bestera, merkatuko interes tasatzat honako hau hartuko da: ordainsaria eman den ekitaldiaren aurreko urteko batez besteko interes tasa.

2016ko maiatzaren 1etik sortutako etekinak.

Gauzatan jasotzen diren lanaren etekinak maileguak emanez lortzen badira, haien zenbatekoa kalkulatzeko eragiketa hau egin behar da: ordaindutako interesetatik aldi horretan diruak izan duen legezko interesak kendu behar dira.

Hala ere, kreditu etxeek beren langileei maileguak emateagatik gauzatan ordaindutako ordainsarien balioa honela kalkulatu behar da:

Diruaren legezko interes tasa merkatukoa baino baxuagoa bada, gauzatan jasotako ordainsariaren zenbatekoa hauxe da: ordaindutako interesen eta legezko interesen arteko diferentzia. Diruaren legezko interes tasa merkatukoa baino altuagoa bada, ordainsariaren zenbatekoa hauxe da: ordaindutako interesen eta merkatuko interesen arteko diferentzia.

Ondorio horietarako, aintzat hartuta kreditu etxeek baldintza onuragarri bereziak dituzten pertsonen eskatzen dizkieten interes tasak eta beren langileei emandako maileguetako berankortasun eza, hauxe da merkatuko interes tasa:

a) Mailegua etxebizitza erosteko eman bada, hipoteka bermedunak diren ala ez alde batera utzita, bi hauetako txikiena:

a.1) Etxebizitza askea erosteko norbanako egoiliarrei hiru urte edo gehiagorako ematen zaizkien hipoteka bermedun maileguen urteko batez besteko interes tasa haztatua, Espainiako Bankuak ekainaren 27an kreditu entitateei eta ordaindu beharreko zerbitzuen hornitzaileei bidalitako 5/2012 Zirkularrak, zeina baita banku eragiketen gardentasunari eta bezeroen babesari buruzkoa, hamaseigarren arauko 4. puntuan eta 9. eranskinean xedatzen duenaren arabera kalkulatua.



a.2) Hamabi hiletarako EURIBORari dagokion urteko batez besteko interes tasa, puntu portzentual erdi gehituta (EURIBOR+0,5).

b) Mailegua kontsumorako eman bada, bi hauetako txikiena:

b.1) Etxebizitza askea erosteko norbanako egoiliarrei hiru urte edo gutxiagorako ematen zaizkien mailegu pertsonalen urteko batez besteko interes tasa haztatua (dela polizan dela finantza gaietan emandako mailegua), Espainiako Bankuak ekainaren 27an kreditu entitateei eta ordaindu beharreko zerbitzuen hornitzaileei bidalitako 5/2012 Zirkularrak, zeina baita banku eragiketen gardentasunari eta bezeroen babesari buruzkoa, hamaseigarren arauko 4. puntuan eta 9. eranskinean xedatzen duenaren arabera kalkulatua.

b.2) Hamabi hiletarako EURIBORari dagokion urteko batez besteko interes tasa, 1,40 portzentual gehituta (EURIBOR+1,40).

Batera zein bestera, merkatuko interes tasatzat honako hau hartuko da: ordainsaria eman den ekitaldiaren aurreko urteko batez besteko interes tasa.

3.3.2. 33/2013 Foru Arauaren 60.2.b) artikulua: Ordainsari gisa gauzatan ematea turismo automobilak (atoi eta guzti), ziklomotorra, ziklomotor eta motozikletak, uretako kiroleko edo aisialdirako itsasontziak edo aireontzia erabili edo ematea.

1) Ibilgailua eman egiten bada erabili ondoren, aurreko erabileraren ondoriozko balorazioa kontuan hartuta baloratuko da, hau da, ondasunak ematean eduki duen baliotik erabili den artean gauzatan jasotako etekina kendu behar da. Horregatik, ibilgailua langileak 5 urtean erabili ondoren seigarren urtean ematen bada, ematearen zioz ez da konputatu behar lanaren etekinik gauzatan.

2) Enpresa batek langile bati berak edo hirugarren batek erabilitako ibilgailua ematen badio, gauzatan jasotako ordainsariaren balorazioa hau izango da: ibilgailuak, eman denean, merkatuan eduki duen balioa.

3) 60.2.b) artikuluko azken paragrafoan, ibilgailua lanerako eta helburu partikularretarako erabiltzeko kasuak arautu dira. Bada, bertan adierazitakoa ibilgailuaren erabilerari soilik dagokio. Horregatik, ibilgailua ematen denean, gauzatan jasotako ordainsariaren balorazioa ezin da izan ordaindutako eskuraketa balioren ehuneko 50.

3.3.3. 33/2013 Foru Arauaren 17.1 b) artikulua: Talde aseguruako kontratuen primak langileei egoztea.

“(…)Zerga egozketa hau borondatezkoa izango da enpresen gizarte aurreikuspeneko planez bestelako talde aseguruaren kontratuetan. Erabakia hartuz gero, aseguru kontratua iraungi arte ordaintzen diren prima guztietarako eutsi behar zaio. Dena den, arrisku kontratuetan derrigorrean egin beharko da zerga egozketa, nahiz eta hurrengo 2. paragrafoko i) idatz zatian xedatutakoa bete. Aseguru kontratuetan aldi berean erretiroa, heriotza edo lanerako ezintasuna estaltzen direnean, zerga egozketa ez da inolaz ere nahitaezkoa izango”.

Kontuan izanda zer xedatzen duen manu horrek artikuluko berdinaren 2. idatz zatiaren f) puntuan eta Sozietateen gaineko Zergaren Foru Arauan, egozpenen taula honela geldituko da:



a) Enpresaburuak gastu gisa kendu nahi baditu ordaindutako primak, langileari egotzi behar dizkio, nahitaez.

b) Enpresaburuak ez badu asmorik ordaindutako primak gastu gisa kentzeko, honako kasu hauetan nahitaez egotzi behar dizkio langileari:

- Enpresaren gizarte aurreikuspen plan batekoak badira.
- Arrisku garbiko aseguru batekoak badira, gertaerarik ezean estaldura kontratatutako aldia amaitzeagatik besterik gabe amaitzen bada (horretarako, aseguruak erretiroa eta heriotza edo ezintasuna estaltzean, ordaindutako primak ez dira egotzi behar). Edonola ere, arrazoi horregatik egotzitako primak, zeinak baitagozkie heriotza edo baliaezintasun kasuetarako arrisku garbiko aldi baterako talde aseguruen kontratuei, ez dira jotzen gauzazko ordainsari gisa enpleguarentzat, baldin eta kontratatu badira hitzarmen, akordio kolektibo edo xedapen baliokide batean ezarritakoari jarraituz (Zergaren Arautegiaren 55. artikulua).

3.3.4. Enpresaren akzioak edo partaidetzak langileei ematea. 33/2013 Foru Arauaren 15. xedapen iragankorra.

Ez dira gauzatan jasotako lan etekintzat joko aktiboan dauden langileei doan (edo merkatuko prezio normala baino merkeago) emandako enpresaren akzioak edo partaidetzak, ez eta enpresaren sozietate taldeko beste enpresa batzuenak ere. Nolanahi ere, muga bat ezarriko zaio arau bidez; muga langile bakoitzak urtean jasotako akzio eta partaidetza guztiei aplikatuko zaie (muga hori, akzioak edo partaidetzak emateko planei aplikatzekoa izango da, baina 2014ko urtarrilaren 1a baino lehen gauzatuei), baldin eta eskaintza data hori baino lehenago egin bazaie langileei, eta, betiere, 2013ko zergaldian zehar indarrean zegoen araudia aplikatuko zaielarik.

Langileek, gero, akzioak edo partaidetzak eskualdatuz gero, haien eskuraketa prezioa langileari ematean eduki duten merkatu prezioa izango da.

Langileei akzioak prezio murriztuarekin ematea gauzatan jasotako ordainsaritzat ez hartzeko, Arautegian ezarrita dago ezinbestekoa dela, besteak beste, langileek gutxienez bost urtean edukitzea jasotako tituluak. Eskakizun horren helburua da langileek beren enpresan duten partaidetza, pertsona fisikoen errentaren gaineko zergaren araudian sustatzen dena, iraunkorra izatea. Hala ere, horren aplikazio praktikoa ez du eragotzi behar langileek enpresaren beste titulu batzuk eskuratu eta gero eskualdatu ahal izatea.

Horregatik, betekizun hori betetzat joko da langileak bost urtean bere esku badauzka dohainik edo prezio murriztuarekin jasotako tituluen balore homogeneous, hain zuzen ere haien balio izendatu bera dutenak, gutxienez, eta haien eskubide politiko berak ematen dituztenak (nolanahi ere, ondoko eskualdaketen ondoriozko ondare aldakuntzak kalkulatzeko FIFO erregela aplikatu behar da nahitaez: lehen sartua, lehen saldua).

3.3.5. Besteren konturako langileak, Gizarte Segurantzaren langile autonomoen araubide berezian daudenak.

Pertsona fisiko edo juridiko enplegu emaileak berak zuzenean ordaintzen baditu langilearen Gizarte Segurantzako kuotak, kopuru horiek gauzatan jasotako ordainsaritzat jo behar dira eta, beraz, atxikipena edo konturako sarrera aplikatu behar zaie, Zergaren Arautegiaren 83. artikuluan xedatutakoa eragotzi gabe. Hona zer dioen: *“Halaber, arauetan xedatutako betetzeko bazkide langileen edo langileen gizarte*



eta laguntza estaldurarako kooperatibek Gizarte Segurantzari langile autonomoen araubide berezian ordaintzen dizkioten kopuruak ez dira sartu behar zerga oinarrian”.

Horrelako kasuetan, norberaren lanaren etekin osoei enpresak Gizarte Segurantzari ordaindutako kuotak gehitu behar zaizkie eta gero horren emaitzako kopuruari konturako sarrera ere bai, baldin eta enpresak jasan badu.

3.4. Lanaren etekin osoa.

3.4.1. Zergaren Arautegiaren 14. artikulua: Enpresak langileari ordaindu izan dizkion osagarrien kobrantza kapitalizatuaren zerga tratamendua.

a) Osagarriak bizi artekoak badira: Kasu hau Zergaren Arautegiaren 14.1.e) artikulua argitzen du. Haren arabera, “muga gabeko iraupeneko soldata osagarriak, pentsioak edo urtekoak konpentsatzeko edo ongitzeko ordaintzen diren kopuruak edo lan baldintzak aldatzearen zioz ordaintzen direnak” zergaldi bakar bati egozten bazaizkio, kopuru horien ehuneko 50 integratu behar da.

b) Osagarriak aldi baterakoak badira: Ezin da aplikatu aurreko artikulua hori, osagarriak ez baitira mugagabekoak. Ondorioz, sorkuntzaldiaren araberrako integratziorako irizpide orokorrak hartu behar dira aintzat (sorkuntzaldia osagarri kapitalizatuak jasotzeko eskubidea amaitzeko falta den denbora da).

3.4.2. Zatika jasotako etekinak eta errenta gisa jasotako etekinak.

a) Zergadunak kalte ordaina jasotzeko eskubidea badu, haren zenbatekoa lan erlazioa azkendu denetik zehatz-mehatz ezarrita badago, eta zenbateko hori aldatu ezin bada eta urte batzuetan zehar jasotzen bada, zatika jasotako kapital etekintzat joko da zergaren ordainketan. Beraz, 33/2013 Foru Arauaren 19. artikuluan eta Zergaren Arautegiaren 14. artikuluan ezarritako integrazio ehunekoak aplikatu behar dira, artikulua horietan ezarritako erregelak aintzat hartuz.

b) Aldiz, kalte-ordainaren zenbatekoa zehatz-mehatz finkatuta ez badago eta kanpoko parametroen arabera aldatu ahal bada (esaterako: hobekuntza, soldata igoerak...) edo Gizarte Segurantzak edo EINEk emanik jasotakoen osagarria bada, errenta erregular gisa tratatuko da, nahiz eta urte batzuetan zehar kobratu. Kasu horretan, urtean jasotako kopuruaren ehuneko 100 sartu beharko da, eta ez dira aplikatuko 33/2013 Foru Arauaren 19. artikuluan eta Zergaren Arautegiaren 14. artikuluan ezarritako integrazio ehunekoak. Beraz, errenta gisa jasotako kalte-ordaina izango litzateke, nahiz eta urte batzuetan zehar kobratu.

3.4.3. Lanaren etekinak zatika jasotzea.

Zergaren Arautegiaren 14.2 artikuluan aipatzen da lanaren etekinak zatika har daitezkeela, baina bertan ezarria ezin zaie aplikatu denboran zehar modu nabarmen irregularrean lortutako etekin artikulua bereko 1. idatz zatian adierazitakoei, ez baitira “bi urtean baino aldi luzeagoan sortutako lanaren etekinak” kategoriakoak. Etekin horiek beste modu batean tratatzen dira.

3.4.4. Ezkontideak emandako konpentsazio pentsioak.

Kapital gisa kobratuz gero, baldin eta sortzapenaldia zehatz-mehatz zehaztu ezin bada pentsioak mugagabeak izateagatik, denboran zehar modu nabarmen irregularrean lortutako etekintzat joko dira, Zergaren Arautegiaren 14.1.e) artikuluan ezarritakoarekin bat etorritik.



3.4.5. Borondatezko gizarte aurreikuspeneko entitateek emandako prestazio bitarikoak: Zergaren Arautegiaren 15.1 artikulua.

Kontingentzia bat gertatzeagatik, gaixotasun larriagatik, iraupen luzeko langabeziagatik edo bestelako arrazoiren batengatik lehenbizikoz zenbateko bat jasotzen denean, kapital bakarraz gainera aldizkako errenta ere ematen bada, honako ehuneko hauek aplikatu behar dira lortutako diru zenbatekoak lanaren etekin oso gisa integratzeko:

- a) Errenta gisa jasotako prestazioari dagokionez, ekitaldian jasotako kopuruaren ehuneko 100.
- b) Kapital moduan kobratzen denaren ehuneko 60, baldin eta bi urte baino gehiago pasatu badira BGAEra lehenengo ekarpena egin zitzaionetik. Prestazioa baliaezintasunagatik edo mendekotasunagatik jasotzen bada, ez da bete behar bi urteko epealdia.

Pentsio planen prestazioa edo 33/2013 Foru Arauaren 18.a) artikuluko 4, 5, 7 eta 8. paragrafoetan ezarritako gizarte aurreikuspeneko gainerako sistemen prestazioa jasoz gero, aurreko irizpide berak aplikatu behar dira.

3.4.6. Borondatezko gizarte aurreikuspeneko entitateen prestazioak (edo pentsio planenak) kapital gisa zatika jasotzea hainbat ekitalditan.

Borondatezko gizarte aurreikuspeneko entitateek emandako kapital prestazioen zerga tratamendua prestazio horiei guztiei dagokie.

Beraz, alde batera utzita zenbat entitatetako bazkide den zergaduna, kontingentzia bat gertatzeagatik jasotzen dituen prestazioen nahiz gaixotasun larriagatik, iraupen luzeko langabeziagatik edo beste arrazoiren batengatik jasotzen dituen diru zenbatekoen zerga tratamendua, kapital gisa soilik kobratu baditu, honako hauei bakarrik aplikatuko zaie: kontzeptu horietako bakoitzagatik (kontingentzia bakoitza, gaixotasun larria, iraupen luzeko langabezia, eta beste arrazoi batzuk.) urte bakar batean jasotako diru zenbatekoei.

Urte bakar batean jaso ez badira, aurrean aipatutako kontzeptu bakoitzagatik jasotako lehenengo prestazioaren edo kopuruaren ehuneko 60 integratuko da, horretarako betekizunak betez gero.

Horretarako, lehenengo prestazioa edo jasotako zenbatekoa izango da kontzeptu batengatik ekitaldi batean jasotzen diren zenbateko guztien batura.

Aurreko guztia gorabehera, zergaduna ez dago behartuta kobratzeko lehen ekitaldian kapital eran jasotako zenbatekoen ehuneko 60 ezinbestez integratzera; hau da, ehuneko hori bigarren edo hurrengo ekitaldietan lortzen dituen zenbatekoei –horiek ere kapital eran lortuak– aplikatu ahal izango die, baldin eta ez badie alde aurretik aplikatu.

3.4.7. Borondatezko bajagatik edo erreskateagatik BGAE-ek emandako kapital prestazioak.

BGAEetatik eskuratutako zenbatekoek lan etekinak sortzen dituzte hartzaileentzat, eta haiek azaroaren 27ko 33/2013 Foru Arauak 19.2.b) artikuluan ezartzen duen integrazio ehunekoak aplikatu ahal diete zenbateko horiei (ehuneko 60), baldin eta: a) kapital gisa kobratzen badira; b) lehenengo ekarpena egin zenetik bi urte baino gehiago pasatu badira, ezintasun edo mendekotasun prestazioetan izan ezik; c) BGAEetatik dirua kobra daitekeen kontzeptu bakoitzagatik jasotzen den lehenengo diru kopurua bada.



Aurrean azaldu den bezala, aipatutako kontzeptu bakoitzagatik jaso den lehenengo diru kopurutzat joko da ekitaldi batean kapital gisa jasotzen den kopuru guztien multzoa.

Horretarako, Borondatezko Gizarte Aurreikuspeneko Entitateei buruzko otsailaren 23ko 5/2012 Legearen 24. artikuluan babespeko kontingentziak zein diren azaltzen da: erretiroa, ezintasun iraunkorra, heriotza, mendekotasuna, iraupen luzeko langabezia eta gaixotasun larria.

Gainera, otsailaren 20ko 87/1984 Dekretuaren 31. artikulua haxe dio (indarrean dago, nahiz eta indarrean sartu izan urriaren 27ko 203/2015 Dekretuaren bidez Borondatezko Gizarte Aurreikuspeneko Entitateei buruzko otsailaren 23ko 5/2012 Legearen Arautegia): "Bazkide batek nahita baja hartzen badu finantzaturiko prestazio guztien edo zati baten kausa den egitatea gertatu baino lehen, berariaz metaturiko erreserben kargura; entitateak bere estatutuetan arautuko ditu, gutxienez 10 urteko ezaldia duen bazkidearentzat, ondoko formuletariko baten bat: a) Bazkide izaten jarraitzearen aukera, kotizatu eta bere unean prestazioak jasotzeko. b) Egindako kotizazioekiko prestazio murriztuak jasotzeko eskubidea. c) Metatutako erreserbak itzultzea. (...)».

Hain zuzen ere, urriaren 27ko 203/2015 Dekretuak indarrean mantendu du otsailaren 20ko 87/1984 Foru Dekretuaren 31. artikulua (xedapen indargabetzaileak ezartzen duenaren arabera) eta tartekadura hau gehitu dio c) letrari azken xedapenetako hirugarrenaren bidez: "Ondorio horietarako, banako edo kide tutako modalitateko BGAE-en bazkideek banako edo kide tutako modalitateko gizarte aurreikuspeneko planei egindako ekarpenei dagozkien eskubide ekonomikoen zenbateko osoa edo haien zati bat eskuratu ahalko dute lehenago".

Beraz, BGAEetako bazkideek haietan dauzkaten eskubide ekonomikoak kobra ditzakete beren borontaez entitatea baja emanaz gero, beste arrazoi batzuk beste direla (edo eskubideok erreskatatzeagatik metatutako erreserben kontua).

Horretaz ari garela, BGAE batetik jasotako diru kopurua borondatezko bajaren edo eskubide ekonomikoak metatutako erreserben kargura erreskatatzearen ondorio dela esan daiteke soil-soilik horretarako aurreikusitako inguruabarrak gertatzen direnean; hain zuzen ere, 87/1984 Dekretuko 31. artikuluan (gorago transkribatu da) azaltzen diren inguruabarrak. Hain zuzen ere, baja edo erreskate eskubidearen baliatzea oso-osorik edo partez metaturiko erreserben kargura finantzaturiko prestazioak eragiten dituen kausa gertatu baino lehen gertatzen denean. Beraz, finantzaturiko prestazioa eragiten duena gertatu ondoren kobratzen diren diru kopuruak ezin dira hartu zergadunak BGAEen baja hartu duelako edo erreskatatzeko eskubidea baliatu duelako kobratutzat, baizik eta kasuan kasuko kontingentzia gertatu izanaren ondoriozkoztat.

Ildo bereko adierazpena egin du behin eta berriro EAEko Auzitegi Nagusiak, besteak beste, 2014ko azaroaren 6ko Epaian, erretiroaren kontingentzia gertatutakoan BGAE batetik kobratu izanari buruzkoan. Ondorio hau atera du: "BOSGARRENA.- Erreskate partziala borondatezko gizarte aurreikuspeneko entitate batean, behin erretiroa hartutakoan; erretiroaren kontingentziarekiko lotura, PFEZaren zerga oinarrian sartzearen ondorioetarako. (...)Horrek ondorio honetara eramaten du: borondatezko erreskatea, interesatzen zaigun aldetik, Eusko Jaurlaritzako Lan eta Gizarte Segurantzako zuzendariaren otsailaren 26ko 9/1999 Ebazpenaren bidez onetsitako eta 1999ko martxoaren 10eko 48 zenbakiko Euskal Herriko Agintaritzaren Aldizkarian argitaratutako 1998ko abenduaren 22ko Zirkularrak (horren bidez igorri ziren banakako, enpleguko eta elkartutako modalitateetako BGAE-entzako arauak, ekarpenen mugaketari lotuak, prestazioak aintzatesteraoan eta metatutako erreserbak itzuli edo aldatzerakoan bete beharrekoak) ezarri zituen ildoetan (arau esparru zehatzik ezean, Borondatezko Gizarte Aurreikuspeneko Entitateei buruzko urriaren 27ko 25/1983 Legean eta lege hori garatzeko 87/1984 Dekretuak onetsitako Arautegian ezarritakoari eutsiz), 4.1.2 puntuan erreskate



partzialak aipatu zituen, antzinatasunaren 10 urteko gutxieneko ezalditik abiatuta, eta horrek ez du bazterten guk berresten dugun ondorioa, alegia, behin gertatuta kontingentzia, oraingo honetan erretiroa, zeina, demandatzailearen kasuan, 2001eko ekitaldian gertatu baitzen, jasotako prestazioak erretiroko prestazioak dira, eta ezin dute autonomiarik eduki, ondorio horietarako, ez antzinatasunagatiko erreskatetzat hartzeko eskaerak ez horren onarpenak. (...)».

3.4.8. COVID-19ak eragindako pandemiagatik gizarte aurreikuspen osagarriko eskubide kontsolidatuak erabiltzeagatiko zerga araubidea. COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 6. artikulua.

Zergadunek erabiltzen badituzte gizarte aurreikuspen osagarriko tresnetako eskubide kontsolidatuak, dagokien araudiak horretarako aukera emanda, artikulua honetan xedatutakoa aplikatu ahal izango dute.

Aurreko apartatuan aipatu den zergaduna kasu hauetakoren batean egon beharko da:

- a. Legez langabezian egotea, COVID-19ak ekarri duen osasun krisialditik sortutako enplegu erregulazioko espediente baten edo aldi baterako enplegu erregulazioko espediente baten ondorioz.
- b. Establezimendu baten enpresaburu titularra izatea, eta, martxoaren 14ko 463/2020 Errege Dekretuaren 10. artikuluan xedatutakoaren ondorioz, jendearentzako ireki ezin izatea.
- c. Alarma egoera deklaratu zen egunean Gizarte Segurantzako araubide batean sartuta zeuden norberaren konturako langileak, beren jarduera etenda geratu bada COVID-19ak ekarri duen osasun krisialdiaren ondorioz.

Artikulu honetan xedatutakoari jarraituz, gizarte aurreikuspen osagarriko tresna guztietatik zergadunak erabil dezakeen eskubide kontsolidatuen zenbatekoa ezin daiteke izan 6.000 euro baino handiagoa.

Artikulu honetan xedatutakoari jarraituz erabili den eskubide kontsolidatuen zenbatekoak, azaroaren 27ko 33/2013 Foru Arauak (pertsona fisikoen errentaren gaineko zergarena) 18. artikuluko a) letran adierazten dituen gizarte aurreikuspen osagarriko prestazioetarako ezarritako zerga tratamendua izango du, honako berezitasun hauekin:

- a. Jasotako zenbatekoaren ehuneko 60 integratuko da pertsona fisikoen errentaren gaineko zergaren zerga oinarri orokorrean.
- b. Zenbateko hori jasotzeak ez du inola ere aldatzen azaroaren 27ko 33/2013 Foru Arauak (pertsona fisikoen errentaren gaineko zergarena) 19. artikuluan eta bat datozenetan xedatutakoa.

Artikulu honetan adierazten den araubidea aplikatzeko, beharrezkoa izango da 2019ko zergaldian zergadunak ez jasotzea 6.000 euro edo gehiago kapital higigarriaren etekin moduan. Azaroaren 27ko 33/2013 Foru Arauak (pertsona fisikoen errentaren gaineko zergarena) 33. artikuluan adierazten du zeintzuk diren etekin horiek.

Artikulu honetan xedatutakoa 2020ko uztailaren 1a baino lehen eskatutako eta 2020ko abuztuaren 31 baino lehen ordaindutako diru kopuruei aplikatuko zaie.

Artikulu honetan adierazten diren eskubide kontsolidatuak ordaintzen dituzten entitateek horren berri eman beharko diote Foru Aldundiari, informazioa ematera behartzen dituzten kontingentzien ondoriozko prestazioak ordaintzen dituztenean bezalaxe, eta informazio berbera emanez.



3.4.9. COVID-19ak eragindako pandemiagatik gizarte aurreikuspen osagarriko eskubideak erabiltzea: COVID-19ak eragindako pandemiaren ondorioak arintzeko 2021erako zerga neurriak onesten dituen abenduaren 1eko 14/2020 Zerga Premiazko Araugintzako Dekretuaren 3. artikulua.

Finantza Politiken zuzendariaren 2020ko martxoaren 25eko Ebazpenean ezarritakoaren arabera (ebazpen horren bidez, baimentzen da COVID-19aren inpaktua dela-eta ezinbestezko enplegu erregulazioko espediente batean edo aldi baterako enplegu erregulazioko espediente batean dauden borondatezko gizarte aurreikuspeneko erakundeetako bazkideek langabezia prestazioa kobratu ahal izatea), langabezia prestazioa 2020. urtean kobratzen bada, prestazio horiei dagokien lanaren etekin osoa kalkulatzeko, ekitaldi bakoitzean jasotako zenbatekoari ehuneko 75eko integrazio ehunekoa aplikatuko zaio.

Artikulu honetan aipatzen den ehuneko 75eko portzentajea aplikatzen zaien etekinen zenbatekoa kontuan hartuko da Pertsona Fisikoen Errentaren gaineko Zergaren azaroaren 27ko 33/2013 Foru Arauaren 19. artikuluan 2. apartatuko azken paragrafoan ezarritako muga kalkulatzeko, eta integrazio portzentaje hori kontuan hartu beharko da Pertsona Fisikoen Errentaren gaineko Zergaren Araudiaren 83. artikuluko bigarren apartatuan aurreikusitako baldintzetan.

3.4.10. Ehuneko 60ko integrazioa aplikatu dakioken gehieneko zenbatekoa.

Ehuneko 100 baino gutxiagoko integrazio ehunekoak aplikatu dakizkiokeen 300.000 euroko gehieneko zenbatekoak hauei eragiten die: a) batetik, azaroaren 27ko 33/2013 Foru Arauaren 19.2 artikuluko a) letran aipatzen diren etekinak (bi edo bost urte baino aldi luzeagoan sortutako etekinak; modu nabarmen irregularrean lortutako etekinak); b) bestetik, azaroaren 27ko 33/2013 Foru Arauaren 19. artikuluko 2. idatz zatiko b) eta c) letretan aipatzen diren etekinak (zergaduna bazkide, partaide, mutualista edo onuradun den gizarte aurreikuspeneko sistemen eta enplegu emaileen pentsio konpromisoak gauzatzeko aseguru kolektiboen errenta guztiak).

Ehuneko 100etik beherako integrazio tasa aplikatzen zaien etekinak jasoz gero, 300.000 euroko muga konputatzean, lehenbizi integrazio tasa txikiena duten etekinak zenbatu behar dira.

3.4.11. Zergaren Arautegiaren 15. artikulua: Batez besteko iraupenaren kalkulua.

“4. Prestazioak lotutako pertsonen egotzitako talde aseguruetarako ekarpenei dagokienez, Zergaren Foru Arauaren 19. artikuluko 2. idatz zatiko c) letrako a) eta b) letretan ezarritako ehunekoa aplikatzeko (ehuneko 25), kontratuaren iraupenean zehar ordaindutako primak aldikotasun eta erregularitate nahikoarekin ordaindutat joko dira baldin eta lehenengoa ordaindu denetik zortzi urte baino gehiago igaro badira eta primen batez besteko iraunaldia lau urte baino luzeagoa izan bada.

Primen batez besteko iraunaldia kalkulatzeko hauxe egin behar da: primen batura eta beraien iraunaldiko urteen kopurua biderkatu eta horren emaitzako kopurua, ondoren, ordaindutako prima guztien baturaren artean zatitu.”

Ekarpenen batez besteko iraupen aldia kalkulatzeko, ez dira kendu behar zergaduna titular den edo izan den gizarte aurreikuspeneko sistemek ordaindutako zenbatekoak.

Halaber, bat etorri Administrazio Publikoaren Administrazio Prozedura Erkidearen urriaren 1eko 39/2015 Legeak 30.4 artikuluan xedatzen duenarekin eta Kode Zibila 5.1 artikuluan xedatzen duenarekin, urtekako epealdiak datatik datara zenbatu behar dira. Ondorioz, ekarpen bakoitzaren



iraupen urteak eta lehenengo ekarpenetik igaro direnak datatik datara zenbatu behar dira (gauzatu zirenetik dirua jaso arte pasatutako denboraren arabera). Horri dagokionez, PFEZaren araudian ez dago inolako erregelarik kalkulu horien emaitzako zenbateko dezimaldunak biribiltzeko (ez goitik, ez behetik).

3.5. Gastu kengarriak.

3.5.1. Sarrerarik ez.

Lan etekinen gastu kengarri hauek soilik onartzen dira, kontzeptu horretan diru sarrerarik jaso ez bada:

- a) Gizarte Segurantzarekin sinatutako hitzarmen berezia dela bide langileak ordaindutako kotizazioak.
- b) Umezurtzen elkarteei eta nahitaezko mutualitateei ordaindutako kuotak.

3.5.2. Gizarte Segurantzaren langile autonomoen araubide bereziko kuotak: 33/2013 Foru Arauaren 22.a) artikulua.

Araubide horretan sozietateak bazkide bati dagozkion kuotak ordaintzen dituenean, kuota horiek lanaren etekinen gastu kengarriak izango dira. Konturako sarreraren zenbatekoa inolaz ere ez da hartuko kengarritzat.

3.5.3. Erakunde politikoentzako ekarpenak: 33/2013 Foru Arauaren 22.b) artikulua.

Zergadunak lan eginez lortutako etekina beraren errentaren iturri nagusia denetz zehazteko, lan horretan jarduteagatik jasotako zenbatekoa eta gainerako errenta iturriak erkatu behar dira, banan-banan.

Horretarako, 33/2013 Foru Arauaren 116.i) artikuluan eta Zergaren Arautegiaren 123.12 artikuluan aipatzen den aitopen informatiboan (182 eredu) sartutako zergadunek aplikatu ahal izango dute gastu hori.

3.6. Hobariak.

3.6.1. Lanaren etekinaren hobariak: 33/2013 Foru Arauaren 23. artikulua.

1. Lanaren etekineterako ezarritako hobari orokorraren gehikuntza zergaldiko zeinahi egunetan aplika daiteke, berariaz ezarritako inguruabarrak egun horretan batera gertatuz gero.

Zergaldian zehar desgaitasunaren gradua aldatzen bada, ekitaldian zehar izan diren desgaitasun inguruabarren arabera aplika daitezkeen gehikuntza ehunekoetatik handiena aplikatuko da.

Baterako zerga ordainketan, baldin eta zergadun batek baino gehiagok lortu baditu lanaren etekinak eta bakoitzak hobari orokorra gehitzeko eskubidea badu (edo batek bakarrik badu horretarako eskubidea), desgaitasun gradurik handiena duenari dagokion gehikuntza ehunekoa aplikatu behar dute.

2. Hobariaren gehikuntza, hartzailearen desgaitasunagatik.

Langile aktibo batek ehuneko 33 - 65 bitarteko desgaitasun gradua badauka, lanaren etekinen gaineko hobaria ehuneko 250 gehitu ahal izateko (23.3.b artikulua) ezinbestekoa da hauetakoren bat gertatzea:



- Abenduaren 23ko 1971/1999 Errege Dekretuaren II. eranskineko baremoan aurreikusitako A), B) edo C) kasuan egotea, edo

- 7 puntu edo gehiago edukitzea baremo horretako D), E), F), G) edo H) kasuetako batean egonik.

3. Lanaren etekinen hobaria eta langabezian edo aldez aurretik erretiratuta dauden "langile aktibo desgaitasunen batekikoak" esamoldearen interpretazioa.

Lanaren etekinen gaineko hobariak gehitu egingo dira zergaduna zergaldiko egunen batean langile aktiboa izan bada eta ezarritako desgaitasun kasuetako batean egon bada.

33/2013 Foru Arauaren 23.3 artikuluko "langile aktibo desgaitasunen batekikoak" esamoldea honako hauei buruzkoa da: enplegu emaile edo enpresaburu (pertsona fisikoa zein juridikoa) baten esparruan eta haren zuzendaritzapean ordainsari trukean lanean ari diren enpleguak.

Gehikuntza honen helburua da desgaitasunen bat duten pertsonen lantokira joateko eta lan egiteko eduki ohi dituzten arazoak eta eragozpenak konpentsatzea.

Beraz, langabezia prestazioa jasotzen dutenek lanik egiten ez dutenez, ez daukate gehikuntza hau aplikatzeko eskubiderik.

Aldez aurreko erretiroa; zergadunak Gizarte Segurantzaren Araubide Publikoan ordaintzen du, batez ere TAS/2865/2003 Aginduan (BOE, 2003/10/13) araututako hitzarmen bereziaren arabera (hartara, 5. artikuluan ezarritakoaren arabera, altaren pareko egoeran dago Gizarte Segurantzaren araubide hitzarmena sinatu denekoan); jaso ditzakeen prestazioak araubide horri lotu behar zaizkio. Lana dela eta, eta are gehiago Zergaren ordainketarako, ez da pentsatu behar interesduna langile aktiboa denik, beraren egoera altarekin berdintsita dagoela eta.

Izan ere, "aldez aurreko erretiroa" hartu eta lanari uzten dioten interesdunek araubide berezi horri heldu diezaiokete, eta horri esker, lanik ez egin arren Gizarte Segurantzari kotizatzen jarraitzen dutenez, egunen batean jasoko duten erretiro pentsioa handiagoa izango da.

Beraz, hizpide ditugun kasuetan ez da bidezkoa lanaren gaineko etekinen hobaria gehitzea.

3.6.2. Hainbanaketak.

Lanaren etekin garbiei aplikatzekoak diren hobariak ez dira hainbanatuko zergaldia urte naturala baino laburragoa izan bada.

4. JARDUERA EKONOMIKOEN ETEKINAK.

4.1. COVID-19ak sortutako osasun krisia kudeatzeko alarma egoeraren deklarazioak eragindakoentzako jarduera uztearen ondoriozko prestazioen tratamendua. Arabako zerga sistema osatzen duten zerga jakin batzuetan COVID-19arekin lotutako premiazko zerga neurri gehigarriak onesten dituen urriaren 6ko 12/2020 Zerga Premiazko Araugintzako Dekretuaren 1. Bi artikulua.

Jarduera ekonomikoen etekintzat joko dira jarduera ekonomikoak gauzatzen dituzten pertsona fisikoen errentaren gaineko zergaren zergadunek jarduera uztearen ondoriozko prestazio gisa jasotako zenbatekoak (prestazio hori arautzen du COVID-19aren ekonomia eta gizarte eraginari aurre egiteko



aparteko presako neurriei buruzko martxoaren 17ko 8/2020 Legegintzako Errege Dekretuaren 17. artikulua). Jarduera ekonomikoaren etekintzat joko dira, halaber, enplegua suspertzeko eta lan autonomoa babesteko eta industria sektorearen lehiakortasunerako neurri sozialei buruzko ekainaren 26ko 24/2020 Lege Dekretuko 9. eta 10. artikuluetan eta, hala badagokio, aldi baterako indarraldia luzatzea arautzen duten xedapenetan araututako prestazioak.

4.2. 33/2013 Foru Arauaren 24.2 artikulua: Lanbide jarduera egiteagatik jarduera ekonomikoaren gaineko zergaren tarifen lehen atalean alta emanda egon behar duten entitateak.

Halako entitateek egiten dituzten jarduerak lanbidekoak edo enpresakoak diren zehazteko, jarduerok nolakoak diren aztertu behar da, alde batera utzita entitateek, jarduera ekonomikoaren gaineko zergaren ondorioetarako, zerga horren tarifen lehen atalean alta eman beharra.

4.3. Eragiketen bolumena: Tabako laboreen txikizkako salmenta.

Tabako laboreak txikizka saltzen diharduten zergadunen eragiketa bolumena, zeina kontuan hartu behar baita ezartzeko ea zuzeneko zenbatespenaren modalitate erraztuari hel diezaieketen, salmenten ondorioz jasotzen dituzten kontraprestazio guztien zenbatekoa da, alde batera utzita balio erantsiaren gaineko zerga eta, bidezkoa bada, baliokidetasun errenergua, baina tabako laboreen gaineko zerga bereziaren karga deskontatu gabe.

Komisiodunak barik saltzaileak diren aldetik, zergadun hauen eragiketen bolumena ez da Tabako Merkatuaren maiatzaren 4ko 13/1998 Legeak 4.7 artikuluan aintzatesten dien salmenten gaineko marjinaren zenbatekoa, baizik eta salmenten guztirako zenbatekoa.

4.4. Ibilgailuen erabilera oso garrantzitsu eta ohikoa jarduera ekonomikoaren diru sarrerak eskuratzeko.

Zergapekoak frogatzen badu enpresa edo lanbide jarduerako esparruan ibilgailua (automobila eta bere atoa, motozikleta edo ziklomotorra) erabili ohi duela eta erabilera hori, egiten duen jardueraren izaera dela eta, diru sarrerak lortzeko garrantzitsua dela, zergadun bakoitzeko ibilgailu bakarra erabiltzeari lotutako gastuen % 50 kendu ahal izango du. Kenkari horrek urtean gehieneko muga jakin batzuk edukiko ditu ibilgailuko, eta bereizita aplikatuko dira gastuen arabera.

Hala, PFEZaren Foru Arauak bi muga ezarri dizkio gastu horien kengarritasunari. Alde batetik, ezarri du zergadun bakoitzeko ibilgailu bakar bati dagozkion gastuen ehuneko 50 baino ez dela kengarria izango. Bestetik, kentzeko zenbatekoari gehieneko mugak ezarri dizkio, zeinak bereizita aplikatzen baitzaizkie ondoko hauei: a) Errentamendu, lagapen edo balio galeren ondoriozko gastuak, b) Ibilgailuak eskuratzearen ondoriozko finantza gastuak eta c) Ibilgailua erabiltzeraren inguruko gainerako kontzeptu guztiak.

Ibilgailua erabiltzen bada urte naturalera iristen ez den aldian, gehieneko kenkariaren zenbatekoak hainbanatu egin behar dira.

Entitateek zergak ordaintzen badituzten errentak eratzikitzeko araubidean, jarduera ekonomikoa benetan egiten duen bazkide, erkide edo partaide bakoitzeko (jardueran parte hartu ohi duena, pertsonalki eta zuzenean) ibilgailu bat hartu daiteke partez lotutzat. Halako kasuetan, jarduera ekonomikoa egiteko ibilgailua erabili ohi dela eta diru sarrerak eskuratzeko oso garrantzitsua dela frogatzeko, kontuan hartu behar dira jardueraren izaera eta bazkide, erkide edo partaideak burutzen dituen eginkizunak.



a) Ibilgailuaren errentamenduak, lagapenak edo balio galerak eragindako gastuak:

Zergadun bakoitzeko ibilgailu bakar baten errentamenduak, lagapenak edo balio galerak eragindako gastuen % 50 ken daiteke; muga ondoko zenbatekoetatik txikiena izango da: a) 2.500 euro edo b) Zergadunak erabilitako amortizazio ehuneko bider 25.000 euro eragiketaren emaitzako zenbatekoaren ehuneko 50.

Jarduera ekonomikoaren etekin garbia zuzeneko zenbatespenaren metodoaren modalitate erraztuaren bidez zehazten duten zergapekoek ezin dute zenbatekorik kendu ibilgailu horien errentamenduak, lagapenak edo balio galerak eragiten dituen gastuengatik. Gastu horiek aplika daitezkeen aurreko etekin garbiaren ehuneko % 10eko minorazioaren barruan sartuzat joko dira. Hortaz, gastu horiek berariaz kentzeko, beharrezkoa da zergadunak zuzeneko zenbatespenaren metodoaren modalitate arrunta aplikatzea.

b) Ibilgailua eskuratzearren ondoriozko finantza gastuak:

Ibilgailua –bakarra– eskuratzek eragin dituen finantza gastuen % 50 kendu ahal izango da, baldin eta eskuratzeko prezioa 25.000 euro edo hori baino gutxiago bada.

Eskuratzeko prezioa 25.000 euro baino gehiago bada, 25.000 euro eta eskuratzeko prezioaren artean dagoen ehunekoari dagozkion finantza gastuen % 50 kendu ahal izango da.

Kenkari hau zuzeneko zenbatespenaren metodoaren modalitate arruntari zein modalitate erraztuari heltzen dioten zergadunek aplika dezakete.

c) Ibilgailuen erabilerari lotutako gainerako kontzeptuetako gastuak:

Halaber, zergadun bakoitzeko ibilgailu bakarra erabiltzeari lotutako gainerako kontzeptuen % 50 ken daiteke; urtean gehienez 3.000 euro.

Kenkari hau zuzeneko zenbatespenaren metodoaren modalitate arruntari zein modalitate erraztuari heltzen dioten zergadunek aplika dezakete.

4.5. Jarduera ekonomiko bati erabat loturiko ondare elementuak. Ibilgailu mistoak.

Ehuneko 100eko afektazio presuntzioa duten ibilgailuen artean (Zergaren Foru Arauaren 27. artikuluko 5. erregelako laugarren idatz zatia), salgaien garraioan erabiltzen diren ibilgailu mistoak daude. Alde horretatik, salgaien garraioak ez du bakarrik merkataritzako ondasunen garraioa adierazi nahi (“sal daitezkeen salgaia”, “tratu edo salmentarako baliatu ohi den higigarria”, “enpresak lortutakoa eta transformaziorik gabe saltzeko dena”); termino horrek, era berean, jarduera garatzeko beharrezkoak diren materialen garraioa ere adierazten du, nahiz eta material horiek erabateko salgai izaera ez izan, ez baita sal daitezkeen salgaia.

4.6. Jarduera ekonomiko bati partez loturiko ondare elementuak.

Jarduera ekonomiko bati partez loturiko ondare elementuak daudenean, hain zuzen ere, Zergaren Arautegiaren 18.2.3 artikuluan ezarritakoak, frogatu behar diren karga bere eskubidea darabilenari dagokio, Zergen Foru Arau Orokorrean ezarritako erregelekin bat etorritik.



4.7. 33/2013 Foru Arauaren 26. artikulua: Jarduera egiteari uzten zaionean, lehenago desafektatu izana.

“Jarduera egiteari uzten zaionean, ondare elementuak lehenago desafektatu direla ulertuko da, hurrengo hiru urteetan (jarduera egiteari uzten zaion egunetik hasita) jarduera ekonomikoren bati ekin ezean.”

Paragrafo horren idazketa gogoan hartuta, aipatutako kasuetan ondare elementu guztiak desafektatu direla ulertu behar da (merkataritza funtsa barne).

4.8. Gastu kengarriak.

Oro har, jarduera ekonomikorik egin ez eta, ondorioz, diru sarrerarik aitortzen ez bada, ez da gastu kengarriarik onartuko (ezta Autonomoen Araubide Bereziaren kuota ere).

Horretatik salbu daude jarduera bati ekin edo uzten zaion kasuak, bai eta, inguruabarrak kontuan hartuta, jarduera batek sarrerarik ez duela sortu frogatu daitekeen kasuak ere.

4.9. Nola kalkulatu etekin garbia zuzeneko zenbatespenaren metodoaren modalitate erraztuan.

33/2013 Foru Arauaren 27.2 artikuluko erregela berezia, zenbatespenaren metodoaren modalitate arruntean etekin garbia kalkulatzekoa, berdin-berdin aplikatu ahal da modalitate erraztuan, zeren eta, foru arau horretako 28.1 a) artikulua modalitate horri dagozkion erregelen gain uzten baitu diru sarrerak eta gastuak zenbatu eta kalifikatzeari dagokiona.

Beste alde batetik, finantza errentamenduko kontratuetan ezin dira batera aplikatu leasing kuota guztien kenkaria, zeina ezarrita baitago Enpresa Txiki eta Ertainen Kontabilitateko Plan Orokorrean mikroenpresentzat, eta aurreko etekin garbiaren ehuneko 10eko murrizketa, PFEZari buruzko 33/2013 Foru Arauko 28.1b) artikuluan aipatzen dena, zeren eta, eragiketa horiei kontabilitatean ematen zaien tratamendua gorabehera, kostuen berreskurapenari dagokion kuoten zatia, zerga ondoretarako, elementuaren amortizazioak eragindako gastutzat kalifikatzen baita (Sozietateen gaineko zergaren Foru Araua, 18. artikulua).

Zuzeneko zenbatespenaren metodoaren modalitate erraztuari heltzen dioten zergapekoek ezin dute zenbatekorik kendu ibilgailu horien erosketak, errentamenduak, lagapenak edo balio galerak eragiten dituen gastuengatik. Gastu horiek aplika daitekeen oroharreko kenkariaren (aurreko etekin garbiaren ehuneko 10, oro har) barruan sartutzat joko dira.

4.10. Arabatik kanpoko nekazaritza eta abeltzaintzako jarduerak.

Jarduera hauei ere Arabako zerga araudia aplikatu behar zaie.

4.11. Jarduera ekonomikoen etekin garbia kalkulatzeko erregela berezia (33/2013 Foru Arauaren 25.5 artikulua).

Jarduera ekonomiko batean hasten diren zergadunek ehuneko 10 murriztu ahal izango dute jardueraren etekin positibo garbia, etekina positiboa den lehenbiziko zergaldian, bai eta hurrengo zergaldian ere, betiere etekin garbi positiboa lortu den lehenbiziko zergaldia jarduera hasi eta lehenbiziko bost zergaldietan gertatzen bada.



Horri begira, aditu behar da erregela berezi hau jarduera ekonomiko bat 33/2013 Foru Araua indarrean sartu ostean hasten duten zergadunei bakarrik dagokiela, hau da, 2014ko urtarrilaren 1etik aurrera hasten dutenei.

4.12. Etekin garbia kalkulatzeko ardogileen jarduerari eta nekazaritza, abeltzaintza eta arrantza jarduerari aplikagarri zaien zuzeneko zenbatespeneko metodoaren modalitate erraztuan: zergaren araudiko 33.1. artikulua.

2020an, diru sarreren eta gastuen arteko aldeari aplikatu beharreko murrizketa ehuneko % 40 izango da, ardo egiteko jardueren eta nekazaritza, abeltzaintza edo arrantzako jardueren etekin garbia kalkulatzeko.

5. KAPITALAREN ETEKINAK.

5.1. Erabilera edo gozamen eskubide errealak eratuta, lagata eta eskualdatuta lortutako etekinak.

a) Erabilera edo gozamen eskubide errealak eratzearen eta lagatzearen ondoriozko etekinak kapitalaren etekinak dira. Eskubide errearen lagapentzat joko da ondasun baten jabeak hirugarren bati aldi jakin baterako edo bizi osorako egiten diona.

Hala ere, erabilera edo gozamen eskubide errealak eskualdatzeak ondare irabazia edo galera sortzen du. Hori dela eta, horrelako kasuetan, eskualdatetaz ari garelarik besterentzeaz ari gabela ulertu behar da, baina ondasunaren jabeak gabe eskubide errearen titularrak egindako besterentzeaz.

b) Erabilera edo gozamen eskubide erreal bat kosturik gabe eratzen duenari egotzi beharreko etekina.

33/2013 Foru Arauaren 30. eta 34.c artikuluetan ezarrienez, ondasun higiezinaren edo entitate baten funtsetako partaidetzen gainean, hurrenez hurren, erabilera edo gozamen eskubide edo ahalmenak eratuta edo haiek lagata lortzen diren etekinak kapital higiezinaren edo higigarriaren etekin osotatzen dira. Kasu honetan, lagatzaileak zenbatekorik jaso ez duela kontuan hartuta, ez du, aipatutako artikuluetan xedatutakoaren arabera, etekinik gordailatu beharko kontzeptu horregatik zerga oinarrian (salbu eta 33/2013 Foru Arauaren 7. artikuluan kostubidez kotatasunaren presuntzioari buruz xedatzen dena).

6. KAPITAL HIGIEZINAREN ETEKINAK.

6.1. Kapital higiezinaren etekin osoa.

Kapital higiezinaren etekinen gaineko atxikipenaren oinarria zehazteko, Hiri Errentamenduei buruzko Legean ezarritako errenta kontzeptuari dagokion zenbatekoa ez ezik, errentariari jasanarazi ahal zaizkion beste kopuru batzuk ere hartu behar dira kontuan (esaterako: erkidego gastuak, OHZ, etab.). Beraz, kapital higiezinaren sarreretan ondoko kopuru hauek sartu behar dira: batetik, errentariak jasotzen duen errenta; bestetik, higiezinaren titularrak kobratzen dituen gainerako kontzeptuak. Gero, kontzeptuok gastu kengarriak badira, aurreko baturatik kenduko dira etekin garbia kalkulatzeko.

6.2. Etxebizitzaren errentamendua: 33/2013 Foru Arauaren 32.1 artikulua.

1. Etxebizitzek sortutako kapital higiezinaren etekintzat Hiri Errentamenduei buruzko Legeak 2. artikuluan zehazten dituen kontratuen ondoriozkoak soilik jotzen dira. Hona zer dioen artikulua horrek: "1. Etxebizitzaren errentamendutzat jotzen da errentariaren behin betiko etxebizitza beharra asetzeko



lehentasuna duten eraikuntza bizigarri bat errentatzea. 2. Etxebizitzaren errentamenduari buruzko arauak aplikatuko zaizkie finkekin batera errentatzen diren altzariei, trastelekuei, garaje plazei eta gainerako lokal, barrunbe eta zerbitzu guztiei”.

Horren ondorioz, etxebizitzaren errentamenduan etxebizitzaren ondoko osagarriak ere sartzen dira, baldin eta harekin batera lagatzen badira eta elementu guztien errentamendua araubide juridiko bakarra duen kontratu batean formalizatzen bada.

Hain zuzen ere, etxebizitzaren errentamendu kontzeptutik kanpo daude errentamendu kontratuen ondoriozko etekinak, Hiri Errentamenduari buruzko Legearen 3. artikuluan aipatzen den etxebizitza erabileraz beste baterako egiten badira. Artikulu horren arabera: “1. Etxebizitzarena ez bezalako erabilerarako errentamendua da eraikuntza bakarrean egonik aurreko artikuluan ezarritakoa ez bestelako lehentasunezko erabilerara duen etxebizitzaren errentamendua. 2. Bereziki, halakotzat joko dira denboraldika egin diren hiri finken errentamenduak, udan zein beste edozein sasoitán, baita finkan industria, merkataritza, eskulangintza, lanbide, jolas, laguntza, kultura edo hezkuntzaren gaineko jarduera bat egiteko gauzatzen direnak ere, errentamenduak egiten dituzten pertsonak edozein direla ere”.

2. Etxebizitza enpresa bati errentatzea: zerga tratamendua. Zergadun batek bere etxebizitza bat errentatu dio apartamentuak errentatzen dituen enpresa bati.

33/2013 Foru Arauaren 63. artikuluan ezarritakoaren arabera, etxebizitzek sortzen dituzten kapital higigarriaren etekinak, 32.1 artikuluan apatzen direnak, aurrezkiaren oinarrian sartu behar dira.

32.1 artikulua ezartzen duenez, idatz zati honetan sartu behar dira 29/1994 Legearen 2. artikulua arabera etxebizitza errentamendu diren eragiketek sortzen dituzten etekinak.

Aipatu berri den 2. artikuluan ezarritakoa etxebizitza beharizan iraunkorrek asetzen dituzten higiezin soilik dagokie.

Aurreko guztia ikusita, hauxe da ondorioa: aurrezkiaren zerga oinarrian, maizterren egoitza diren higiezin errentamenduen etekinak soilik sartu behar dira.

Beraz, xede horretarako ez diren higiezin errentamenduen etekinak zerga oinarri orokorrean sartu behar dira. Adibidez, kontsulta medikoetarako etxebizitzaren errentamenduak, errentamenduan diharduten enpresei, salbu eta sozietateen gaineko zergaren araudian araututako etxebizitzaren errentamenduan diharduten entitateen araubide bereziaren onuradun diren sozietateei lagatzen edo alokatzen bazaizkie, eta abar.

3. Gelaren errentamenduaren zerga tratamendua.

Zerga Agentziaren irizpidearen arabera honako kasu honetan aplika dezake errentariak kenkaria ohiko etxebizitza alokatzeagatik, 86. artikuluan ezartzen den bezala: ohiko etxebizitzaren errentamendua Hiri Errentamenduen azaroaren 24ko 29/1994 Legeak 2. artikuluan xedatzen duenarekin bat etorritik egiten denean, hau da, errentan hartzen den “eraikinaren lehen helburua etxebizitza iraunkorra izateko beharra asetzea” denean.

Hala gertatzen denean, kapital higiezinaren etekinak aurrezkiaren errentatza jo behar dira errentatzailearen zerga oinarrian integratzeko, 33/2013 Foru Arauak 32.1 artikuluan ezartzen dena betetzen baita (“Idatz zati honetan etekin hauek soilik sar daitezke: Hiri Errentamenduei buruzko



azaroaren 24ko 29/1994 Legeko 2. artikuluan etxebizitzaren errentamendutzat jotako eragiketek sortutako etekinak”), eta beraz 63. artikuluan definitutako aurrezkiaren zerga oinarrian sartu behar dira.

6.3. 33/2013 Foru Arauaren 32.2 artikulua: etxebizitza errentamenduez bestelako errentamenduak. Amortizazio gastuak.

EAEko Auzitegi Nagusiak eta Arabako Lege eta Administrazio Erakundeak finkatutako interpretazio ildoari jarraituz, zergaren araudia aldatzen ez den bitartean, kapital higiezinaren etekinetatik kendu ahal izango da etekinak sortu dituzten ondasunek erabileraren edota denbora pasatzearen poderioz jasandako narriaduraren zenbatekoa, baita kostu gabe eskuratu badira ere.

Higiezinak jaraunspen edo dohaintza bidez eskuratuz gero, eskuraketa balioa izango da ondasun higiezinak oinordetza eta dohaintzen gaineko zergaren ordainketarako daukan balioa.

7. KAPITAL HIGIGARRIAREN ETEKINAK.

7.1. Kooperatiben itzulketak.

Honelako errentekin, kapital higigarriaren etekinak banakatzeko irizpide orokorra aplikatu behar da.

7.2. Kontuak partaidetzan.

Kontabilitateko Plan Orokorraren eta ICACEk emandako ebazpenen arabera, halako kontuen errentak gastu kengarriak dira ordaintzen dituen partaide kudeatzailearentzat eta, beraz, ez dira norberaren funtsen ordainketak.

Ondorioz, kudeatzaile ez diren partaideek jasotzen dituzten ordainketak kapital higigarriaren etekinak dira, norberaren kapitalak hirugarrenei lagata lortutakoak. Hori dela eta, ezin zaie aplikatu 33/2013 Foru Arauaren 9.24 artikuluan arautzen den salbuespena.

7.3. Penalizazioa eperako ezarpena alde aurretik ezeztatzeko eskatzeagatik.

Gordailu, eperako ezarpen edo antzekoren bat behar baino lehen ezeztatuz gero, norberaren kapitala hirugarren batzuei lagata lortutako kapital higigarriaren etekintzat joko da honako kopuru hau (positiboa zein negatiboa): printzipalaren eta interesen zioz jasotako zenbatekotik ezeztatzeagatiko komisioa kenduta geratzen den zenbatekoaren eta hasieran emandako zenbatekoaren arteko diferentzia.

7.4. Banco de Santander SAK Banco Popular Español Saren akziodun eta obligaziodun batzuei emandako fidelizazio bonuen tributazioa.

A. OBLIGAZIODUNEN TALDEA:

a) Fidelizazio bonuak onartzen dituzten obligaziodunak.

1. Banco Popular Español Saren obligazioen amortizazioaren tratamendua eta integrazioa: Kapital higigarriaren etekin negatiboa sortzen da, finantza aktiboak eskualdatzetik datorrena. Etekin hori kalkulatzeko, eskualdatze balioaren (zero) eta tituluen eskuratze balioaren arteko diferentzia hartuko da kontuan, eta aurrezkiaren zerga oinarrian txertatu beharko da.

Eskaintza onartzen badute eta fidelizazio bonuak eskuratzen badituzte, gainera:



2. Obligaziodunei fidelizazio bonuak emateko tratamendua, kapital higigarriaren etekin negatiboaren konpentsazio gisa: Kapital higigarriaren etekina sortzen da merkatuko balio arruntagatik, konturako diru sarrearen mende –eskuratzaileari jasanarazten zaio–, zeina aurrezkiaren zerga oinarrian txertatuko baita, eta horrek aukera ematen du aurreko etekin negatiboa konpentsatzeko.

3. Haiei esker jasotzen diren hiru hilean behingo interesen eta fidelizazio bonuak etorkizunean salduz gero horrek izango lukeen zerga tratamendua: Kapital higigarriaren etekinak sortuko dira, interesak zenbateko osoan zenbatuta, eta bonuen salmenta zenbatuta eskualdatze balioaren eta eskuratze balioaren arteko diferentziarekin; azken hori aurreko puntuan adierazitako merkatu balioa izango da.

b) Fidelizazio bonuak onartzen ez dituzten obligaziodunak eta finantza-aktiboen beste titular batzuk.

Banco Popular Español SAREN obligazioen amortizazioaren tratamendua eta integrazioa: Kapital higigarriaren etekin negatiboa sortzen da, finantza aktiboak eskualdatzetik datorrena. Etekin hori kalkulatzeko, eskualdatze balioaren (zero) eta tituluen eskuratze balioaren arteko diferentzia hartuko da kontuan, eta aurrezkiaren zerga oinarrian txertatu beharko da.

B. AKZIODUNEN TALDEA:

a) Fidelizazio bonuak onartzen dituzten akziodunak.

1. Banco Popular Español SAREN akzioen amortizazioaren tratamendua eta integrazioa: Ondare galera bat sortzen da, eskualdatzetik datorrena. Galera horren zenbatekoa da eskualdatze balioaren (0 euro) eta zergadunak ordaindutako eskuratze balioaren arteko diferentzia, eta aurrezkiaren zerga oinarrian txertatu beharko da.

Eskaintza onartzen badute eta fidelizazio bonuak eskuratzen badituzte, gainera:

2. Akziodunei fidelizazio bonuak emateko tratamendua: Ondare irabazia sortzen da aurrezkiaren zerga oinarrian txertatu beharreko obligazio berrien merkatuko balioagatik, eta horrek aukera ematen du aurreko ondare galera konpentsatzeko.

3. Haiei esker jasotzen diren hiru hilean behingo interesen eta fidelizazio bonuak etorkizunean salduz gero horrek izango lukeen zerga tratamendua: Kapital higigarriaren etekinak sortuko dira, interesak zenbateko osoan zenbatuta, eta bonuen salmenta zenbatuta eskualdatze balioaren eta eskuratze balioaren arteko diferentziarekin; azken hori aurreko puntuan adierazitako merkatu balioa izango da.

b) Fidelizazio bonuak onartzen ez dituzten akziodunak.

Banco Popular Español SAREN akzioen amortizazioaren tratamendua eta integrazioa: Ondare galera bat sortzen da, eskualdatzetik datorrena. Galera horren zenbatekoa da eskualdatze balioaren (0 euro) eta zergadunak ordaindutako eskuratze balioaren arteko diferentzia, eta aurrezkiaren zerga oinarrian txertatu beharko da.

8. ONDARE IRABAZIAK ETA GALERAK.

8.1. 33/2013 Foru Arauaren 41. artikulua: Ondarearen osaeran aldaketarik ez dagoela jotzen den kasuak.



a) Ondasun erkidegoa desegitea.

Partaide batzuek izaera bereko ondasun batzuen jabetza ehuneko bera edukiz gero, ondasun erkidego bakarra dagoela joko da eta, beraz, halaxe tratatu behar da PFEZaren eta gainerako zergen ordainketan.

b) Irabazpidezko sozietateak desegitea.

Gehiegizko adjudikazioak ondare aldakuntza dakar. Ondare aldakuntza ondasun eta eskubideen gaineko gehiegizko adjudikazioaren proportziozkoa da.

Hau da, baldin eta irabazpidezko sozietatearen likidazioan gehiegizko adjudikazioa gertatzen bada, ezkontide bati hark sozietatean duen partaidetza kuotari dagokiona baino balio handiagoan eratzikitzeagatik ondasunak eta eskubideak, bestea konpentsatuz ala ez, aldaketa bat egongo da gutxiago eratzikitzen zaion ezkontidearen ondarearen osaeran, haren adjudikazio defizitagatik (hau da, kostu bidez edo irabaziz, gehiegizko adjudikazioa lortzen duenari eskualdatzen dion zenbatekoagatik).

Ondorio horietarako, ez dauka garrantzirik konpentsazioa diruz edo gauzatan egitea, edo ez ituntzea inolako konpentsaziorik (hala gertatuz gero, "inter vivos" kostu gabeko eskualdaketa da).

Kasu horietan, gehiegizko adjudikazioa gauzatzen den ondasun eta eskubideen balioaren eta haien eskuratze-dataren zerga eguneratzea dago (ondorengo eskualdatzeen ondorioetarako), haiek jasotzen dituenaren egoitzan, eta konpentsazio bat ordaindu behar du edo doako eskualdaketa baten onuraduna da.

Hau da, irabazpidezko sozietatearen likidazioan, gehiegizko adjudikazioa lortzen duen ezkontideari adjudikatutako ondare elementuak bi une desberdinetan eskuratu direla ulertzen da: a) Hasiera batean, ezkontza sozietateak eskuratu zituen egunean, likidazioan ordainean jasotako ondasun eta eskubide horien zatiagatik edo irabazpidezko erkidegoan duen partaidetza zehazteagatik (jatorrizko eskuratze kostuaren zati proportzionalean baloratuta); eta b) Gero, sozietatea likidatzen den egunean, gehiegizko adjudikazioa konpentsatzeko ordainketaren bidez edo dohainik eskuratutako ondare elementu horien zatia (bakoitzari eratziki dakioken konpentsazioaren zatian baloratuta).

Era berean, irabazpidezko sozietatearen likidazioan gutxien jasotzen duen ezkontidearentzat ondare aldaketa bat sortzen da, uko egiten dion ondasun edo eskubide erkideetako partaidetza kuotaren eskualdatze balioaren (normalean, merkatu balioarekin bat dator) eta partaidetza kuota horrek sozietatearentzat duen eskuratze balioaren arteko diferentziagatik.

Idatz zati honetan jasoriko tratamendu bera aplikatu behar da gehiegizko adjudikazioak sortzen diren ondasun erkidegoak desegitean.

8.2. 33/2013 Foru Arauaren 41.2.b) artikulua: Ondare irabazi edo galerarik ez dagoela jotzen den kasuak. Zergadunaren heriotzaren ondoriozko kosturik gabeko eskualdaketak.

"Ondare irabazi edo galerarik ez dagoela joko da kasu hauetan:

...

b) Zergadunaren heriotzaren ondorioz egiten diren kostu gabeko eskualdaketatik, kostu gabeko eskualdaketa hori unean bertan eragina daukan oinordetza titulu bat dela egiten denean ere.



Ondorio horietarako, Oinordetza eta Dohaintzen gaineko Zergari buruzko Foru Arauaren 7. artikuluan ezarri da zein diren oinordetza tituluak”.

Bestalde, Oinordetza eta Dohaintzen gaineko Zergari buruzko Foru Arauaren 7.1.a).b’) artikuluan ezarri da hauexek direla oinordetza tituluak, zerga honen ondorioetarako:

“Oinordetzazko kontratuak edo itunak, berdin diolarik noiz duten eragina.

Hala, zerga ondoreetarako, ondasun eta eskubideen eskualdaketa duen oinordetza izendapena oinordetza titulutzat jo dadin, ondasunen eta eskubideen titularrak haien oinordetza agintzeko borondatea egiaztatu beharko da.

Zerga honen arautegiari baimena ematen zaio kasu horiek zehazteko, hau da, oinordetza agintzeko borondatea dagoen edo ez dagoen zehazteko”.

Baimen horretaz baliatuz, Oinordetza eta Dohaintzen gaineko Zergaren Arautegiaren 6. artikulua hau xedatzen du bere b) letran:

“...

Oinordekoa izendatzen denean, unean bertan ondasun eta eskubideak eskualdatuta, zerga ondoreetarako oinordetza titulutzat jo dadin, ondasunen eta eskubideen titularrak haien oinordetza agintzeko borondatea duela egiaztatu beharko da.

Oinordetza agintzeko borondatea azaldu ezean, eraginkortasuna unean bertan duen oinordetza ituna doako eta “inter vivos” negozio juridikotzat hartuko da.

Ondore horietarako, oinordetza agintzeko borondatea azaldu dela ulertuko da, baldin eta pertsona kausatzaileak oinordekoa(k) izendatzen bad(it)u bere ondasun eta eskubide guztien gainean, unean bertan ondasun eta eskubide batzuk soilik eskualdatu arren.

Era berean, oinordetza agintzeko tresna horrek izaera berbera izan beharko du, hau da, borondate hori oinordetza itunean jaso behar da.

Oinordekoa izendatzean, unean bertan eskualdatuta ondasun eta eskubideak, ez badira ondasun eta eskubide guztiak sartzen, doako eta “inter vivos” negozio juridikotzat hartuko da.

...”.

Horren guztiaren ondorioz, zerga ondorioetarako, ezin zaio oinordetza itunaren kalifikazioa eman gaur egungo ondorioarekin negozio juridiko bati, baldin eta kausatzailearen ondare osoa osatzen ez duten ondasun edo eskubide berezi bat edo batzuk kostu gabe eskualdatzen badira soilik; izan ere, oinordetza itunaren figuraren azpian dagoena (eta hura ematearekin lortu nahi dena) da oinordekoaren izendapen itundua, eta ez ondasun batzuen "inter vivos" doako eskualdaketa soil bat.



Beraz, "inter vivos" ondorioak dauzkaten ondasun berezien dohaintzak normalean dohaintzat jot behar dira, salbu eta oinordetza itun batean sartuta badaude eta itun horren izaeran parte hartzen badute. Horri dagokionez, ondasun isolatuen entrega bat oinordetza itun batean sartuz jotzen da, baldin eta erabateko oinordetza izendapen baten kontura egiten bada eta izendapen horren esparruan egiten bada. Hau da, gaur egungo eraginkortasuna duen ondasunen baten ondare eratzikipena egiten bada ondasun horien alde izendatzaile eta izendatuek adosten dituzten ondasun guztien oinordetza izendapenarekin batera, eta izendapen horren kontura egiten bada.

Ondorioz, ondasun edo eskubideak gaur egungo ondorioekin dohainik eskualdatzen diren negozio juridikoen kasuan (alderdiek ematen dieten izena edozein dela ere), baldin eta ondasun edo eskubide horiek ez badituzte betetzen Oinordetza eta Dohaintzen gaineko Zergaren Arautegiaren 6.b) artikuluan jasotako betekizunak oinordetza titulutzat jotzeko zerga ondorioetarako, ondare irabazia edo galera dagoela iritziko zaio pertsona fisikoen errentaren gaineko zergan (dohaintzak dira eta).

Zehazki, ondare irabazirik edo galerarik ez dagoela iritzeko, beharrezkoa izango da, oinordetza itunean, kausatzailearen ondasun eta eskubide guztiak eskualdatzea gaur egungo ondorioekin, edo, bestela, haren ondare guztiaren jaraunleak izendatzea (nahiz eta, azken kasu horretan, ondasun eta eskubide jakin batzuk bakarrik eskualdatu). Aitzitik, ondare irabazia edo galera egungo da pertsona fisikoen errentaren gaineko zergaren ondorioetarako.

8.3. 33/2013 Foru Arauaren 42.c) artikulua: Ondare irabazi salbuetsiak. 65 urtetik gorako adinekoek euren ohiko etxebizitza kostu bidez eskualdatzetik eratorritako irabaziez salbuestea.

Salbuespen hori bateragarria da 42. artikuluko beraren f) letran araututakoarekin, ondare elementuak eskualdatzetik lortutako zenbatekoarekin 65 urteko adinekoek biziarteko errentak eratu izanaren kasuetarako; bai eta beste ohiko etxebizitza batean berriz ere inbertitzeko hurrengo 49. artikuluan jasotako salbuespenarekin ere.

65 urtetik gorako zergadun batek bere ohiko etxebizitza saltzen badu (400.000 eurotik gorako ondare irabazia sortuz) eta lortutako zenbatekoaren zati batekin biziarteko errenta eratzten badu (240.000 euroko muga), salmentan lortutako zenbateko osoaren eta errentara bideratutakoaren artean dagoen ehunekoa eskualdaketa sortutako ondare irabazi osoari aplikatuko zaio (adinagatik salbuesitako 400.000 euroak barne), errenta eratzearen ondoriozko salbuespen gehigarria zehazteko.

65 urtetik gorako zergadun batek bere ohiko etxebizitza salduz gero, eta lortutako zenbatekoa ohiko etxebizitza berri batean berrinbertituz gero, lortutako ondare irabazia osorik salbuesita gera dadin (400.000 eurotik gorakoa bada), beharrezkoa da berriz ere inbertitzea salmentan lortutako zenbateko osoa. Partezko berrinbertsioa eginez gero, salmentan lortutako zenbateko guztiaren eta berrinbertsioaren arteko ehunekoa eskualdaketa sortutako ondare irabazi guztiari aplikatuko zaio (adinagatik salbuesitako 400.000 euroak barne), berrinbertsioaren ondoriozko salbuespen gehigarria zehazteko.

8.4. 33/2013 Foru Arauaren 42.f) artikulua: Ondare irabazi salbuetsiak. 65 urtetik gorako zergadunek beren alde segurtatutako biziarteko errenta eratzeko beren ondare elementuen eskualdaketatik eratorritako erabili dituzten irabazien salbuespena.

Salbuespen hori bateragarria da 42. artikuluko beraren c) letran araututakoarekin, 65 urteko adinekoek ohiko etxebizitzaren kostu bidezko eskualdaketa egiten dituzten kasuetarako; bai eta beste ohiko etxebizitza batean berriz ere inbertitzeko hurrengo 49. artikuluan jasotako salbuespenarekin ere.



240.000 euroko muga zerga kreditu gisa erabiltzen da, zeina kontsumitzen baita zergadunak arrazoi horregatik hurrengo zergaldietan lortzen dituen irabaziak salbuetsita uztea erabakitzen duen heinean.

8.5. Azaroaren 27ko 33/2013 Foru Arauaren 43. artikulua: Galera konputaezinak. Ondasun higiezinaren kostu bidezko eskualdaketen ondoriozko galerak, baldin eta ondasuna aurretik egindako kostu gabeko eskuraketa salbuetsi batetik badatoz edo zerga kargarik jasan ez badute.

Ezin dira ondare galeratzat konputatu alde aurretik kosturik gabe egindako eskuraketa salbuetsi batetik datozen ondasun higiezinaren eta zerga kargarik jasan ez duten eskualdaketen ondoriozko galerak, baldin eta zergadunak ez badu frogatzen ondasun higiezinaren balioa salbuespeneko inguruabar batzuegatik murriztu dela edo, bestela, galera ez badator, soil-soilik, besterentze edo eskuratze gastuegatik.

Arau hori aplikatuko da, alde aurretik, bialdi ezberdinetan eta balio ezberdinetan kosturik gabe eskuratutako ondasun higiezin bakar baten kostu bidezko eskualdaketa egiten denean ere. Beraz, kasu horietan dena delako higiezinaren besterenduta ondare irabazi bat (edo batzuk) eta, aldi berean, aurreko paragrafoan ezarritakoarekin bat datorren ondare galera bat (edo batzuk) sortuz gero, galera ezin da konputatu eta, horrenbestez, ezin da kontuan hartu azaroaren 27ko 33/2013 Foru Arauaren 66.1.b) artikulua aipatzen dituen errentak integratu eta konpentsatzeari begira, zergadunak ohiz kanpoko arrazoiengatik ondasunaren balioa urritu dela edo galera besterentze edo eskuratze gastuegatik ondorioztatzen dela frogatu ezean.

8.6. 33/2013 Foru Arauaren 43. artikulua: Kontsumoak eragindako galerak, kostuak ordaintzera kondenatzen duten epaien kasuetan.

Oro har, epaiketa batean jasandako gastu propioek kontsumoak eragindako ondare galerak sortzen dituzte, eta haiek, halakotzat jota, ez dira konputagarriak.

Bestalde, printzipioz, epaiketa batean kostuak irabazten dituenak errenta bat lortzen du (zerga oinarri orokorrean sartzekoa den ondare irabazia). Hala ere, kostuak ordaintzera kondenatzeak kondenatuaren jokabidea gaitzestea ere badakar, bai eta aintzatestea ere epaiketan garailea denak ez zuela auzitan jardun behar eta, ondorioz, ez duela auziaren ondorio ekonomikoak jasatera behartuta egon behar. Beraz, kostuak ordaintzeko kondenak konpentsatu egiten du jasandako kaltearen zenbatekoa. Horregatik guztiagatik, ulertu behar da berez ez dagoela zergadunaren kontsumorik, egin dituen eta ordaindu behar zaizkion gastuegatik, ezpada juridikoki jasan behar ez duen kaltea baizik.

Beraz, kasu horietan, Euskadiko Zerga Koordinaziorako Organoak adierazi duen bezala, auzia irabazten duen zergadunak jasotako zenbatekoa (kontrako alderdiari kostuak ordainarazteagatik) zuzenean konpentsatu dela ulertuko da auziagatik egindako gastuekin (ordaintzen zaizkionak), eta gastu horiek ez dira, berez, inolako kontsumotik sortzen. Beraz, zergadun horrentzat ez da inolako zenbatekorik –ez positiboa ez negatiboa– sartuko zergaren zerga oinarrian arrazoi horregatik.

8.7. 33/2013 Foru Arauaren 45. artikulua: Eskuraketa eta eskualdaketa balioa.

1.-Hiri lurren balio gehikuntzaren gaineko zerga.

Ondasun higiezin baten eskuratzailerak hiri lurren balioaren gehikuntzaren gaineko zergaren zioz ordaindu behar duen kopurua ez da izango eskuraketa balio handiagoa, baldin eta eskrituran prezioa finkatzeko diren klausuletan ez bada berariaz adierazi prezioaren osagai diren kontzeptuetako bat dela.



2.- Maileguaren gastuak

Etxebizitza eskualdatzen bada, ez zaizkio gehitu behar eskuraketa balioari etxebizitza eskuratzea finantzatzeko maileguaren gastuak; nolana ere, finantza gastu modura kengarri izan daitezke, hala badagokio.

Mailegua kitatzeko gastuak ere ez dira kendu behar eskualdaketa baliotik.

3.- Nola aplikatu eguneraketa koefizienteak.

33/2013 Foru Arauaren 45.2 artikuluan ezarri da eskualdatzen diren ondare elementuen eskuraketa balioa arautegi bidez ezartzen diren koefizienteak aplikatuz eguneratu behar dela.

Akzioak jaulkitzeagatiko prima banatzen denean, sozietatearen kapitala murriztu eta bazkideei ekarpenak itzultzen zaizkienean (murrizketa banatu gabeko mozkinen ondoriozkoa denean izan ezik) edo, 2012ko urtarrilaren 1a bano lehen, araupeko merkatu batean negoziatzeko onartutako baloreak harpidetzeko eskubideak eskualdatzen direnean, lortutako zenbatekoek balore erasanen eskuraketa balioa murriztuko dute. Zergaren Arautegiaren 44.3 artikuluan ezarritakoaren arabera, baloreen eskuraketa balioa murriztu behar duten zenbatekoak eragiketa gertatu den urteko koefizienteak aplikatuz eguneratzen dira.

8.8. Ondare galera eta etekin negatibo batzuen integrazioa: 33/2013 Foru Arauaren 43 g) eta h) eta 35.3 artikulua.

33/2013 Foru Arauaren 43. artikuluko g) eta h) idatz zatietan aipatzen diren ondare galerak ezin konputatu izan badira eskuratzailerak balore homogeenak eskuratu dituelako artikuluan ezarritako epealdietan, muga ekarri duen titulu kopuru bera saldu ahala integratuko dira.

Irizpide bera aplikatu behar da 33/2013 Foru Arauaren 35.3 artikuluko azken paragrafoan ezarritako erregelari dagokionez; horrela, etekin negatiboak finantza aktibo homogeenak eskualdatzen diren heinean integratuko dira.

8.9. Gaixotasunaren ondoriozko banako aseguru.

Hauexek izan daitezke aseguru mota horren prestazioak:

a) Kapital bat, aurrez finkatu eguneko zenbateko baten arabera zehazten dena eta laguntza medikuaren gastuekin zerikusirik batere ez duena, aseguratuak gaixorik dagoen artean jasotzen duena –dela gaixotasun arrunt batek dela laneko gaixotasun batek jo duelako– zeina, ezintasuna iraunkor bihurtuz gero, iraungi egiten baita.

b) Prestazioa horrenbesteko finko baten trukean ematen bada, baldin eta aseguratu gaixorik bada gaixotasun arrunt batek edo laneko gaixotasun batek jota.

Aipatutako prestazioen ondoriozko etekinak onuradunari sortzen dion errenta ondare irabazia izango da, hain zuzen ere jasotako prestazioaren eta hura sortu duen edo duten sarien zenbatekoaren arteko kendura.



Hala ere, kontratu horien prestazioen ondoriozko etekina kapital higigarriaren etekintzat joko da, 33/2013 Foru Arauaren 36. artikuluan ezarri den bezala, baldin eta prestazioa baliaezintasun egoera batek sortzen badu.

8.10. Istripuen ondoriozko banako aseguruua.

Hauexek izan daitezke aseguru mota horren prestazioak:

a) Kapital bat, aurrez finkatutako eguneko kopuru baten arabera zehazten dena eta laguntza medikuaren gastuekin zerikusirik batere ez duena; aseguratuak istripu batek, arruntak zein lanekoak, sortutako egoera patologikoan dagoen artean jasotzen du eta lanerako ezintasuna iraunkor bihurtzen bada iraungi egiten da.

b) Horrenbesteko finko bat, aseguratuak istripu arrunt edo lanekoa izanez gero.

Istripu aseguruak kanpoko indarkeriazko kausa batek eraginda bat-batean eta aseguratuak nahi gabe egindako lesio fisikoak estaltzen ditu.

Prestazioa baliaezintasunagatik ematen bada, horren zioz sortzen den etekina kapital higigarriaren etekintzat joko da, 33/2013 Foru Arauaren 36. artikuluan ezarritakoarekin bat etorritz. Bestela, ondare irabazitzat joko da.

Nolanahi ere, 33/2013 Foru Arauaren 9.7 artikulua ezarritakoari jarraituz, mota honetako aseguru kontratuen ondoriozko pertzepzioak salbuetsita daude, artikulua horretan zehaztutako mugekin.

8.11. Maileguen amortizazio aseguruua.

Finantza entitateek bizitza aseguruak sartu ohi dituzte hipoteka maileguak emateko baldintzetan; haietan, hartzailea eta aseguratu mailegu hartzailea da eta onuraduna finantza entitatea bera.

33/2013 Foru Arauaren hogeita zortzigarren xedapen gehigarriak ezartzen duenez, aseguru batean estalitako ezintasun kontingentziaren ondoriozko prestaziotik eratorritako errentak, baldin eta hipotekaren hartzekodunak aseguratuaren onuradun gisa jasotzen baditu (betiere kreditu entitate bat edo hipoteka maileguak emateko jarduera egiten duen beste entitate bat bada), mailegu hartzailearen hipoteka zorra osorik edo partez amortizatzeko betebeharra daukala, onuraduna mailegu hartzailea bera izan balitz bezala tratatuko dira zergei dagokionez.

Horrenbestez, aurreko baldintzak beteta, hipoteka maileguen amortizazio aseguruetan baliaezintasun kontingentzia gertatzen bada, zergadunak (mailegu hartzailea) daukan zorra kitatzeak ez du inolako ondare irabazirik ekarriko, baizik eta kapital higigarriaren etekina, bizitza edo baliaezintasun aseguruako kontratu bateteik eratorria, eta ez du izango atxikipenik.

Ondorioz, zergadunak 33/2013 Foru Arauaren 9.7 artikuluan jasoriko salbuespena aplikatu ahal izango du hartarako baldintzak betetzen badira. Horiek horrela, gogorarazi behar da kalte fisiko edo psikiko gisa ulertu behar dela indarkeriazko, bat-bateko, kanpoko eta zergadunaren intentzionalitatekanpoko kausa baten ondoriozko gorputzeko lesio edo lesio psikiko oro, halakorik gertatzen ez bada, ez baitira beteko 9.7 artikuluan aipatutako baldintzak. Aurrekoarekin bat etorritz, kanpoan uzten dira gaixotasun kasuak.



8.12. Saltzailearentzako tratamendua, salerosketako kontratuak elkarri emandako ondasuna eta jasotako prezioa itzulita amaitzen diren kasuetan.

Salerosketako kontratua, Kode Zibileko 1.124. artikuluan xedatutakoaren itzalpean, elkarri emandako ondasuna eta kobratutako prezioa itzulita amaitzen bada, saltzaileak aipatu ondasunaren salmentak eragindako ondare aldakuntza sartu duen zergaldietako autolikidazioak zuzendu behar ditu ("ex tunc" efektua dela eta). Ondorioz, kasu horietan, kobratutako prezioa itzultzeak ez dakar ondare galerarik saltzailearentzat.

8.13. Errentariari kalte-ordaina ematea errentamendu kontratua hutsaltzeagatik.

Errentamendu kontratua suntsiarazteagatik kalte ordaina eman behar zaio errentariari; zenbateko hori:

a) Errentariarentzat ondare irabazia da. Hori dela eta lortutako errentak aurrezkiaren zerga oinarrian integratu eta konpentsatuko dira (bai eta errentamendu eskubidea eskualdatzearen ondorioz gerta litekeen ondare aldaketa ere).

b) Errentatzailearentzat, higiezinaren eskuraketa balio handiagoa da (hobekuntza).

8.14. Babes Ofizialeko Etxebizitza (BOE) baten deskalifikazioa: Laguntza eta interesak itzultzea.

Etxebizitzaren deskalifikazioa lortzeko ordaintzen diren diru zenbatekoek (etxebizitza eskuratzeko jasotako dirulaguntza itzuli beharrik gabekoa, dirulaguntzari esker hartutako maileguen interesak eta bi kontzeptuen gainean sortutako interesak) ez dute ematen ohiko etxebizitza eskuratzearen kenkaria aplikatzeko eskubiderik; aitzitik, ondare galerak dira eta zerga oinarri orokorrean integratu edo konpentsatu behar dira.

Aldiz, eskuraketaren berezko gasturen bat itzuliz gero (esaterako, ondare eskualdaketen gaineko zergaren kuota), zenbateko horrek kenkaria aplikatzeko eskubidea emango du.

8.15. Jabetza soila erostea eta gero gozamina azkentzearen zioz kontsolidatzea: Eskuraketa data.

Higiezinaren eskuraketa data haren jabetza soila eskuratu zenekoa da. Izan ere, Kode Zibilean ezarritakoaren arabera, higiezin baten jabea haren jabetza soila daukana da. Beraz, ondare irabazia kalkulatzeko data hori eta balio hori hartu behar dira kontuan.

8.16. Berrinbertsioaren salbuespena. Etxebizitzaren eskualdaketa data eta eskuraketa data.

Etxebizitza eskualdatu den eguna zehazteko (data horrek berrinbertsioa egiteko epealdia mugatzeko erreferentzia puntua markatzen du), haren jabetza osoa besterentzeko unea hartu behar da aintzat (une hori eta hori eskuratzailaren ondarean gehitzen den unea berbera izango da). Horretarako, doktrinako eta Auzitegi Goreneko gehiengoaren iritziz, gure antolamendu juridikoak tituluaren teoria eta modua jasotzen du eta, horren arabera, saldutako gauzaren gaineko jabetza edo jabaria ez da eskualdatzen gauza erosleari ematen ez zaion bitartean. Ondorioz, zergadunari berrinbertsioa egiteko emandako epealdia konputatzen hasteko unea izango da ohiko etxebizitzaren gaineko jabetza osoa eskualdatzen den eguna.

Beste alde batetik, oro har, ohiko etxebizitza eskuratu dela ulertuko da higiezin osoaren edo zati baten jabetza osoa lortzen den unean; hau da, aurretik laburtutako tituluaren teoria eta moduari jarraituz, higiezina eroslearen esku jarri eta haren edukitzakoa bihurtzen denean. Hori, normalean, erosketa eskritura publikoa formalizatzen denean gertatuko da, non eta ez den egiaztatzen, aurretik, badela



higiezinaren salerosketaren kontratua (titulua) eta gertatu dela halaber higiezinaren entregatzea edo tradizioa diren moduetako edozeinen arabera (giltzak ematea, etab.). Horrek guztiak ez du eragozten jarraibide honetako hurrengo puntuan xedatutakoa, ez eta puntu horretan ezarritako antzeko kasuetan ondorioztatu beharrekoa ere.

8.17. Berrinbertsioaren salbuespena. Eraikitzen ari den etxebizitza eskuratzea.

Zergadunaren ohiko etxebizitza eskualdatzean lortutako ondare irabaziaz zergapetu gabe geratuko dira, baldin eta eskualdaketa horretan lortutako zenbateko osoa beste ohiko etxebizitza bat eskuratzeko berrinbertitzen bada Zergaren Arautegiaren 46. artikuluan ezarritako baldintzen arabera.

Hain zuzen ere, Zergaren Arautegiaren 46. artikuluan ezarritako epean ohiko etxebizitza eraikitzeko inbertitzen diren zenbatekoen arabera berrinbertsioaren konpromisoa betetzat joko da (etxebizitzaren sustatzaileari emandako zenbatekoak ere barne), baldin eta etxebizitza eskuratzea eta etxebizitza eraikitzea parekotzat jotzeko Zergaren Arautegiaren 62. artikuluan ezarritako baldintzak betetzen badira. Epealdian egindako berrinbertsioa partziala bada, salbuespena ere modu partzialean aplikatuko da.

8.18. Berrinbertsioaren salbuespena. Berrinbertsioa egiteko epealdia.

a) Arauketa orokorra:

Zergaren Arautegiaren 46. artikuluan arautzen da ohiko etxebizitza eskualdatuta lortzen den ondare irabazia berrinbertitzearen ondoriozko salbuespena; epealdi hauek ezartzen dira:

- Etxebizitza besterenduta lortutako zenbatekoa ohiko etxebizitza erosteko erabili behar da, eskualdatzen denetik bi urte pasatu baino lehen.
- Baldin etxebizitza besterenduz lortutako zenbatekoa eskualdaketa egin aurreko 2 urteetan eskuratutako etxebizitza bat ordaintzeko baliatzen bada, zenbateko hori salbuesteko eskubidea izango da. Hori dela eta, eskualdatzen den etxebizitza ohikotzat joko da eskualdatu aurreko bi urteetan zehar ohiko etxebizitza izan bada.

b) 2020rako epe berezia:

- COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Arautegizako Dekretuaren 9. Hiru artikulua.

Ohiko etxebizitza besterentzetik lortutako zenbatekoen berrinbertsioa gauzatzeko epea hiru urtekoa izango da, honako kasu hauetan:

- Ohiko etxebizitza 2018ko urtarrilaren 1etik 2020ko abenduaren 31ra bitartean eskualdatu bada.
- Ohiko etxebizitza 2018ko urtarrilaren 1etik 2020ko abenduaren 31ra bitartean erosi, eta ondoren aurreko ohiko etxebizitza eskualdatu bada.

8.19. Berrinbertsioaren salbuespena. Ondasun pribatiboak.

Baldin zergadun batek bere etxebizitza pribatiboa eskualdatu eta salmentaren ondorioz lortutako zenbatekoa irabazpidezko etxebizitza bat eskuratzeko erabiltzen badu, berrinbertsioagatik salbuespena



aplikatzeko, zenbateko horren ehuneko 100 berrinbertitu duela ulertuko da, ez ehuneko 50 (irabazpidezkoa delako), izan ere, ekarpen pribatibotzat joko da.

8.20. Berrinbertsioaren salbuespena. Irabazpidezko eraentzapean eskuratutako etxebizitzaren salmenta.

Jarraibidearen 13.5.20 puntuak hauxe ezartzen du: ezkontide batek etxebizitza bat eskuratu bazuen ezkongabetan eta erosketa finantzatzeko mailegu bat badu, irabazpidezko eraentzapean ezkondu zirenean artean amortizatu gabe zegoen kapitala zuena, etxebizitzan inbertitzeagatik aplika daitekeen kenkaria bi ezkontideei dagokie, erdi bana.

Etxebizitza hori eskualdatuz gero, berrinbertsioagatik salbuespena aplikatzeko, berrinbertsioa honako honek egin duela ulertuko da: erosketa eskrituran titular gisa agertzen ez den ezkontideak edo izatezko bikotekideak, etxebizitzan duen partaidetzaren arabera dagokion ehunekoan.

8.21. Salbuespena ohiko etxebizitzan berrinbertsioa egiteagatik. Besteren finantzaketa.

Ohiko etxebizitza berria eskuratu eta ondoren, bi urteko aldian, ohiko etxebizitza zaharra eskualdatuta sortzen den ondare irabaziaren salbuespena ebazteko, bi gauza gerta daitezke:

1.- Ohiko etxebizitza berrian zergadunaren beraren funtsak inbertitzen badira, ondoren ohiko etxebizitza zaharra eskualdatuta lortzen duen zenbatekotik berrinbertitutzat joko da berrian inbertitutako kopurua (norberaren funtsak birjartzea).

2.- Ohiko etxebizitza berriaren eskuraketa besteren kapitalekin finantzatzen bada, ondoren ohiko etxebizitza zaharra eskualdatuta lortzen den zenbatekotik berrinbertitutzat joko da eskualdaketa ondoko bi urteetan kapital horiek amortizatzeko edo itzultzeko erabiltzen den kopurua. Bi urtekoa izan ordez, epea hiru urtekoa izango da, baldin eta ohiko etxebizitza berria 2018ko urtarrilaren 1etik 2020ko abenduaren 31ra bitartean erosi bada.

8.22. Etxebizitzaren sustatzaileari edo saltzaileari egindako konturako emateak, eta ondoren salerosketa kontratua suntsiaraztea, erosleak ordaindu ezin izateagatik.

Etxebizitza baten salerosketa kontratua erosleak zerbait ez betetzeagatik suntsiarazten bada, saltzaileari eman beharreko kalte ordainak (kontura emandako zenbatekoak, erresak edo seinaleak galtzea, besteak beste) ondare galerak izango dira harentzat, hain zuzen ere ondare elementuen eskualdaketen ondoriozkoak ez bestelakoak.

Galera horiek ondare aldakuntza gertatzen den zergaldiari egotziko zaizkio, hau da, kontratua suntsiarazi eta saltzaileari kalte ordaina eman beharra sortzen den ekitaldiari.

Horregatik, ondare galera horiek zerga oinarri orokorrean integratu eta konpentsatu behar dira, 33/2013 Foru Arauaren 65. artikuluan ezarri den bezala.

8.23. Negoziatzeko onartutako baloreek sortutako ondare irabaziaz zergapetzeko aukerako araubidea. 33/2013 Foru Arauaren hogeigarren xedapen gehigarria. Baloreak eskualdatzearen ondoriozko errenta kuantifikatzea aukerako araubidea aplikatzen denean.

Auzia hau da: PFEZaren Foru Arauaren 20. xedapen gehigarriko kargatze berezia hautatu denean lortutako irabaziaz ea errentatzen jo ote daitekeen, eta, jo ahal izatekotan, irabazi horren kuantifikazioa.



Ondare irabazia da, eta, PFEZaren Foru Arauaren 6. artikuluko 2. idatz zatiko d) letraren arabera, zergadunaren errentaren parte da. Hala, beraz, horrela lortutako irabazia bada errenta.

Kuantifikatzeko, ordea, metodo objektibo bat daukagunez, ez dago zertan kuantifikatu.

Bestalde, xedapen gehigarri honetan jasotzen den aukerako araubideak eragina du zergadunak ekitaldi bakoitzean eskualdatu dituen eta kotizatzeko onartu diren balore guztiengan. Beraz, autolikidazio berean, zergadunak ezin izango du kalkulatu baloreen zati bat zergaren erregela orokorren arabera eskualdatzeak eragindako ondare irabazia edo galera (33/2013 Foru Arauaren IV. tituluko V. kapituluaren jasoriko erregelak) eta eskualdatutako baloreen beste zatiari 20. xedapen gehigarrian aurreikusitako araubidea aplikatu.

Aukerako araubide hori aurreikusita dago baldin eta zergadunak ekitaldi bakoitzean kostu bidez eskualdatutako eta kotizatzeko onartutako baloreen multzoaren besterentzeak ondare irabazia sortzen badu. Beraz, baldin eta (autolikidazioan 20. xedapen gehigarria aplikatu ondoren) zergadunak egiaztatzen badu besterentze horrek ondare galera garbia eragin duela, autolikidazioa zuzentzea onartuko da, nahiz eta Zerga Administrazioak alde aurretik errekerimendua egin Zergen Foru Arau Orokorraren 27.1 artikulua arabera (betiere autolikidazioa zuzendu ahal izateko baldintza orokorrak beteta).

8.24. Dibisak edo atzerri moneta.

Atzerri monetan egindako inbertsioen kasuan (adibidez, inbertsio funtsetako akzioak edo partaidetzak), balore horiek eskualdatzearen ondorioz eratorritako ondare aldaketa kalkulatzeko, ondare aldaketaren datan dagoen kanbio tasa hartu beharko da kontuan. Beraz, ondare aldaketa hori kasuan kasuko dibisan kalkulatu da (eskualdatze balioaren eta baloreen eskuratze balioaren arteko diferentziaren arabera), eta horrela lortutako zenbatekoa euro tara bihurtu beharko da, une horretan dagoen kanbio tasa aplikatuta.

Irizpide bera aplikatuko zaie besteren kapitalen atzipena adierazten duten finantza-aktiboak eskualdatzetik eratorritako kapital higigarriaren etekinei, eta, kasu horretan, errendimendu horiek eskatzeko unea hartuko da kontuan.

9. ALDI BATERAKO EGOZPENA.

9.1. Pentsio planek edota BGAEek titularren heriotzagatik ordaintzen dituzten prestazioak.

Pertsona Fisikoen Errentaren gaineko Zergaren azaroaren 27ko 33/2013 Foru Arauak 57. artikuluan xedatzen du lan etekinak haien jasotzaileak eska ditzakeen zergaldiari egotziko zaizkiola.

Horregatik guztiagatik, BGAEen araudian xedatutakoa beteko da zehazteko zein unetan, babestutako inguruabarra jasotakoan, eska daitekeen onuradunaren eskubide diren prestazioak eta hartukizunak kobratzea.

Ondorioz, BGAEaren ondoriozko heriotza prestazioak une honetan izango dira galdagarriak: behin onuraduna nor den zehaztuta, onuradun horrek kobrantza eskatu eta kobrantzarako eskubidea frogatzen dituzten agiri guztiak aurkezten dituenetik bost egun baliodun igarotakoan.

Bestalde, egozpena ez da berdina izango kapital edo errenta gisa jasota. Kapital gisa jasoz gero, onuraduna zehaztu, eskaera egin eta bost egun balioduneko epea igarota, dagokion ekitaldiari egotziko



zaio, edo hartukizuna lortu zen ekitaldiari, azken hori bestea baino lehenagokoa bada. Aldi baterako edo biziarteko errenta gisa jasoz gero, ordainketa eska daitekeen ekitaldiei egotziko zaie.

"Hau da, BGAEk estalitako heriotzak ez du berez haren ondoriozko prestazioa noiz ordaindu behar den zehazten. Hartukizuna eskatzeko hauek izango dira kontuan: a) aplikagarri den finantza araudia; b) prestazioak kobratzeko eskatzen den eguna; eta c) hautatutako kobratze era (kapital –berehala edo geroratuta–, errenta edo era misto gisa)."

Diru eskubideak beste BGAE batera mugitzea:

Horrelakoetan, hau da, diru eskubideak BGAE batetik beste batera eramaten direnean, ez dakar kargapeko errentarik lortzea, nahiz eta onuradunek entitate horiek arautzen dituzten finantza legeek ezarritako eran egin, baldin eta onuradun badira eta ez bazkide edo partedun. Egoera horretan, diru eskubide horiei dagozkien lan etekinak haien ondorio diren prestazioak jasotzen diren ekitaldiei egotzi behar zaizkie.

Dena den, bazkide edo partedun den BGAE batean diren diru eskubideak norbere BGAE batera mugitzen badira eta BGAE horretan, norberaren gertakizunak babesteko den horretan, bazkide arrunt edo partedun izanez gero, ulertu behar da PFEZFako 18. eta 19. artikuluetan xedatutakoaren arabera zergari lotutako jatorrizko entitatean ziren heriotzagatiko prestazio guztiak eskueran direla, hots, eskueran direla BGAEn edo jomuga den pentsio planean horrela jasotako funts guztiak.

9.2. 33/2013 Foru Arauaren 57.2.a) artikulua: Ebazpen judiziala noiz eman zain dauden errentak jasotzen badira.

"a) Errenta osoa edo haren zati bat ordaindu ez bada, hura jasotzeko eskubiderik ba ote dagoen edo haren zenbatekoa epai bidez ebatzi gabe dagoelako, ordaindu gabeko zenbatekoak epaia irmo bihurtzen den zergaldiari egotziko zaizkio".

Jasotzeko eskubide bat edo zenbatekoa berresten duen ebazpen judizialaren ondorioz jasotzen diren errentak ebazpena irmo bihurtzen den zergaldiari egotziko zaizkio. Epailearen ebazpenerako jarritako auziaren muina errenta bat jasotzeko eskubidea edo haren zenbatekoa izan behar da. Beraz, errenta ez ordaindu izanaz bakarrik ari bada, ezin da aplikatu erregela berezi hau.

Eskubidea aintzatestean hedatu eta haren eremuan sartzen badira ezaugarri berdinekiko talde bateko kide izanik prozedura judizialean alderdi izan ez diren zergadunak ere, errentak, irizpide berberari jarraituz, aitortpena dakarren ebazpena irmo bihurtzen den aldiari egotziko zaizkio.

Zergaldi bati edo besteari egozteko araubide hau lanaren etekinei aplikatuko zaie, are hainbat ekitalditan lortzen direnean ere. Hala gertatzen denean, etekin horiek bi edo bost urte baino aldi luzeagoan sortu badira eta aldian-aldian lortu ez badira, 33/2013 Foru Arauaren 19.2 artikuluan ezarritako integrazio ehunekoak aplikatuko dira.

Baldin eta, zergadunari ezin egotz dakizkiokeen inguruabarren ondorioz, lanaren etekinak, ebazpena irmo bihurtzen den ekitaldian barik, beste batean jasotzen badira, zergaldi horri egotziko zaizkio, eta aitortpen osagarria egingo da, eta ez da egongo ez berandutze interesik, ez errekarurik. Aitortpen hori etekinak jasotzen direnetik PFEZaren hurrengo aitortpena aurkezteko epealdia amaitu bitartean aurkeztu behar da.



10. ZERGA OINARRI OROKORREKO ETEKINEN INTEGRAZIOA ETA KONPENTSAZIOA.

10.1 Jarduera ekonomikoen etekinak: Konpentsazioa.

Azaroaren 27ko 33/2013 Foru Arauaren 65. artikulua haxe dio: “Zerga oinarri orokorra izango da saldo hauen batuketa egitetik ateratako emaitza: a) Foru arau honen 62. artikuluan aipatzen diren etekinak (jarduera ekonomikoetatik eratorritakoak ez beste guztiak) eta errenta egozpenak, zergaldi bakoitzean, euren artean inolako mugarik gabe integratuta eta konpentsatuta sortzen den saldoa. b) Jarduera ekonomikoetatik eratorritako etekinak, zergaldi bakoitzean, euren artean inolako mugarik gabe integratuta eta konpentsatuta sortzen den saldoa. Emaitza saldo negatiboa bada, jarduera ekonomikoak hurrengo 30 urteetan sortzen duen saldo positiboarekin konpentsatuko da, Sozietateen gaineko Zergaren Foru Arauaren 55. artikuluan ezarritakoarekin bat etorriz. Arabako Zergei buruzko Foru Arau Orokorraren 115. artikuluko 3. idatz zatian ezarritakoaren ondorioetarako, zergadunak jakinarazi behar du ezen aurreko idatz zatiak jasoriko saldo negatiboak konpentsatzearen aukeraz baliatu nahi duela, konpentsazio hori aplikatu nahi duen ekitaldiko autolikidazioa aurkeztean. Zergaldi baterako hautatzen den modalitatea hurrengo batean aldatu ahal izango da, zergaren autolikidazioa nork bere borondatez aurkezteko epealdia amaitutakoan, baldin eta Zerga Administrazioak errekerimendurik egiten ez badu. c) Ondare irabazi eta galerak (salbu eta hurrengo artikuluan jasorikoak), zergaldi bakoitzean, euren artean soilik integratuta eta konpentsatuta sortzen den saldoa.”

Beraz, zergaldi bakoitzean jarduera ekonomikoen etekinak beren artean soilik integratzen eta konpentsatzen dira, inolako mugarik gabe. Integrazioaren eta konpentsazioaren emaitza saldo negatiboa bada, hurrengo 30 urteetan jarduera ekonomikoetan lorturiko etekinaren saldo positiboarekin konpentsatuko da, Sozietateen gaineko Zergari buruzko abenduaren 13ko 37/2013 Foru Arauaren 55. artikuluan xedatu den bezala.

Horrenbestez, zergadunak hainbat jarduera ekonomiko egiten baditu, haien ondoriozko etekinak bateragarriak dira.

Batera zergapetzea hautatuz gero, lehenengo familia unitateko kide bakoitzaren jardueren etekinak beren artean integratu eta konpentsatu behar dira, eta gero kide guztien saldoak beren artean integratu eta konpentsatu behar dira. Nolanahi ere, familia unitateko kide guztien saldoak negatiboak badira, ezin da egin konpentsaziorik.

Hortaz, zerga batera ordaintzea hautatzen bada, familia unitateko kideek eskuratutako jarduera ekonomikoen etekinak integratu eta elkarrekin konpentsatzen dira, arestiko paragrafoan adierazitako zehaztasunak kontuan hartuta, bai urte horretakoei bai aurreko zergaldietatik datozenei dagokienez.

Zerga banako araubidean ordainduz gero, baterako zerga ordainketa hautatu den aurreko ekitaldian jarduera ekonomikoek sortutako etekin negatiboak sortu dituen familia unitateko kideak bakarrik konpentsatu ahal izango ditu.

Arabako Zerga Sistemako hainbat Arau eta Zerga aldatzen dituen martxoaren 7ko 2/2018 Foru Arauaren laugarren xedapen iragankorrek Sozietateen gaineko Zergaren abenduaren 13ko 37/2013 Foru Araua aldatzen du. Sozietateen gaineko Zergaren Foru Arau hori konpentsatu gabe dauden jarduera ekonomikoen etekin negatiboak aplikatu dakieke pertsona fisikoaren errentaren gaineko zergan. Zehatz-mehatz, xedapen iragankor horretan hau adierazten da: “2018ko urtarrilaren 1etik aurrera hasten den lehen zergaldiaren hasieran konpentsatzeke dauden zerga-oinarri negatiboak konpentsatuko dira Sozietateen gaineko Zergaren Foru Arauaren 55. artikuluan xedatutakoaren arabera –foru arau honetan



emandako idazkerari jarraituz- eta konpentsazioaren epea hogeita hamar urte izango da betiere, sortu ziren momentutik kontatzen hasita.”

11. LIKIDAZIO OINARRI OROKORRA.

11.1. Murrizketak gizarte aurreikuspeneko sistemetara egindako ekarpen eta kontribuzioengatik. Nola aplikatu baterako zerga ordainketan likidazio oinarri orokorraren muga.

Murrizketen aplikazioak ezin du sortu likidazio oinarri orokor negatiborik, ez eta hura gehitu ere.

Zerga batera ordaintzen bada, muga erlatibo hori familia unitateko kide bakoitzari ere badagokio; horretarako, zergadun bakoitzari zerga oinarrian dagokion ehuneko hartu behar da kontuan. Horregatik, kasu hauetan bi muga daude:

- 1.) Batetik, familia unitateko kide bakoitzak gehienez ere kopuru hau ken dezake: bere banako zerga oinarritik konpentsazio pentsioen eta mantenturako urtekoen zioz aplikatutako murrizketak deskontatuta geratzen den zenbateko positiboa.
- 2.) Bestetik, familia unitateko kide guztiek bat eginda gehienez ere zenbateko hau ken dezakete: baterako zerga oinarri orokorretik konpentsazio pentsioen eta mantenturako urtekoen zioz denek aplikatutako murrizketak deskontatuta geratzen den saldo positiboa.

11.2. Murrizketak gizarte aurreikuspeneko sistemetara egindako ekarpen eta kontribuzioengatik. Finantza mugak.

Honako ekarpen edo kontribuzio hauek baizik ezingo dira murriztu: 33/2013 Foru Arauan galdatzen diren baldintzak betetzeaz gain gizarte aurreikuspeneko sistema bakoitzaren finantza araudian ezarritako gehieneko mugak errespetatzen dituztenak.

Ondorio horietarako, kontuan izan behar da ez dagoela finantza mugarik BGAE-etara eginiko ekarpenen edo kontribuzioen gainean. Pentsio planen, gizarte aurreikuspeneko mutualitateen, bermatutako aurreikuspen planen, enpresen gizarte aurreikuspeneko planen, mendekotasun larriko edo handiko bizitza aseguruaren eta kirolari profesionalen gizarte aurreikuspeneko mutualitateen zati orokorraren kasuan, 8.000 €-ko urteko muga dago baterako aitortetarako, banako ekarpenei zein enpresako kontribuzioei eragiten diena. Gainera, enpresek pentsio konpromisoak estaltzeko kontratatzen dituzten mendekotasun aseguru kolektiboetarako muga gehigarria ezarri da: 5.000 euro urtean (azaroaren 28ko 35/2006 Legea, hamaseigarren xedapen gehigarria).

Pentsio planetara, gizarte aurreikuspeneko mutualitateetara, bermatutako aurreikuspen planetara eta mendekotasun handiko arriskua soilik estaltzen duten aseguruetara egindako ekarpenek, desgaituen alde eraturakoek, baterako finantza muga hauek dituzte: a) ahaidetasun lotura duten desgaituen alde eginiko gehieneko urteko ekarpenak, 10.000; eta b) Desgaitasunen bat duen pertsona baten alde eginiko urteko gehieneko ekarpenak, bere ekarpenak barne, 24.250 € (azaroaren 28ko 35/2006 Legea, hamargarren xedapen gehigarria)

Azkenik, kirolari profesionalen gizarte aurreikuspeneko mutualitatearen zati bereziari eginiko ekarpenak eta enpresa kontribuzioek gehieneko 24.250 €-ko finantza muga dute urteko (azaroaren 28ko 35/2006 Legea, hamaikagarren xedapen gehigarria).

11.3. Erretiro egoeraren ondoriozko mugak.



33/2013 Foru Arauaren 70.5 artikuluan xedatzen denez, ezin dira zerga oinarritik murriztu artikuluko bereko 1. eta 3. idatz zatietan jasoriko gizarte aurreikuspeneko sistemetara egindako ekarpenak edo kontribuzioak, baldin eta haiek bazkidea, partaidea, mutualista edo aseguratua erretiratzen den zergalditik aurrera egiten badira.

Hala ere, Zergaren Arautegiaren 56.1 artikulua ezartzen duenez, erretiro partzialeko kasuetan, zergadunek zerga oinarritik murriztu ditzakete erretiro osoa estaltzeko egindako ekarpenak eta kontribuzioak. Ondorio horietarako, Euskadiko Zerga Koordinaziorako Organoak ezarritako irizpidearen arabera, erretiro aktiboa eta malgua erretiro partzialarekin parekatzen dira.

11.4. 33/2013 Foru Arauak, 71. artikuluan, muga hauek ezartzen ditu gizarte aurreikuspeneko sistemetara egiten diren ekarpenen eta kontribuzioen murrizketarako.

Ezarritako murrizketa mugak ezin dira hainbanatu.

11.5. 33/2013 Foru Arauaren 72. artikuluan ezarritako kasu bereziaren analisia.

a) Desgaitasunen bat duen pertsonak berak egindako ekarpenak eta beste pertsona batzuek beraren alde egindakoak biltzen badira, lehenik eta behin desgaitasunen bat duen pertsonak berak egindako ekarpenak murriztu behar dira; eta ekarpen horiek 24.250 euroko mugara iristen ez badira bakarrik murriztu ahal izango dira beste pertsona batzuek haren alde egindako ekarpenak haien zerga oinarrietan, 72. artikuluan ezarritako mugekin eta modu proportzionalean.

b) Ezkontidearen edo ahaideen aldeko ekarpenak egin daitezke, odol ahaidetasunagatik edo ezkontza ahaidetasunagatik, zuzenean edo zeharka, hirugarren graduraino (hori barne), baldin eta ehuneko 65eko minusbalioetasun fisikoa edo handiagoa badute, ehuneko 33koa minusbalioetasun psikikoa edo handiagoa badute edo, Kode Zibilean ezarritako kasuak direla bide, epaileak adierazitako ezintasuna badute.

c) Desgaitasunen bat duen ahaidearen aldeko ekarpenen urteko muga (8.000 €) ekartzaileko da, ez desgaitasunen bat duen pertsonako.

d) Desgaitasunen bat duten pertsonen alde gizarte aurreikuspeneko sistemetara ekartzen diren kopuruak, ezarritako murrizpen mugak gainditzeagatik oinarrian murriztu ezin izan direnak: hurrengo bost ekitaldietan aplikatu ahal izango dira, baldin eta gizarte aurreikuspeneko sistema bakoitzean aplikatu daitekeen finantza araudian ezarritako mugak errespetatzen badira.

11.6. Baterako zerga ordainketaren murrizketa: Ezkontidearen heriotza (33/2013 Foru Araua, 73. eta 98. artikulua).

Ezkontide bat hiltzen bada eta familia unitateko gainerako kideek baterako zerga ordainketa hautatzen badute, hildakoaren errentak aitopenean sartuta, baterako zerga ordainketaren murrizketa aplikatu daiteke.

11.7. Ezkontidearen edo izatezko bikotekidearen aldeko ekarpenak murriztea (33/2013 Foru Arauaren 70.3 eta 71.3 artikulua).

Zergadunaren ezkontideak ez badu eskuratzen zerga oinarrian integratzeko moduko errentarik edo horrelako errenten zenbatekoa 8.000 euro baino gutxiago izan bada, murrizketa aplikatu dezake hura



bazkide, mutualista edo partaide den gizarte aurreikuspeneko mutualitateetara, pentsio planetara eta borondatezko gizarte aurreikuspeneko entitateetara egindako ekarpenengatik, baina muga batekin: 2.400 euro urtean.

Testuan “zerga oinarriaren zati orokorrean sartu beharreko errentak” esamoldea agertzen da eta honela ulertu behar da: etekin garbiak, hau da, guztirako etekinetatik gastu kengarriak eta hobariak kenduta geratzen dena.

Era berean, ezarritako gehieneko muga gainditzeagatik murriztu ezin izan diren ekarpenak hurrengo bost ekitaldian murriztu ahal izango dira, baldin eta, ekarpenak noren alde egin ziren, bazkide, partedun, mutualista edo asegurduna den ezkontidea edo izatezko bikotekidea ez badago erretiraturik.

12. KUOTA OSOA.

12.1. Zergaren eskala: 33/2013 Foru Arauaren 75.3 artikulua. Zergapekoak, jarduera ekonomiko batean, hari atxikitako elementuak eskualdatzen baditu berrinbertsioaren salbuespena baliatu gabe, honako kalkulu hau egin behar du.

Jarduera ekonomikoa egiten duen zergadun batek hari atxikitako elementuak eskualdatu ditu berrinbertsioaren salbuespena baliatu gabe, eta irabaziak jarduera ekonomikoaren etekin arruntekin konpentsatu ditu.

33/2013 Foru Arauaren 75.3 artikulua haxe dio:

“3. Zergadunaren batez besteko karga tasa (aurreko idatz-zatian aipatutakoa) Sozietateen gaineko Zergaren oinarri orokorra baino gehiago bada, kuota osoari txiki-pen hau aplikatuko zaio: batez besteko karga tasaren eta Sozietateen gaineko Zergaren oinarri orokorraren arteko kenketaren emaitzako tasa jarduera ekonomikoen etekin garbi positiboaren osagai diren ondare irabazien zenbatekoari aplikatzearen emaitzako zenbatekoa.

Aurreko paragrafoan xedatutakoa aplikatzeari dagokionean, ondare irabazien zenbatekotik, hala badagokio, jardueraren etekin garbia zehazteko kontuan hartutako ondare galerak murriztuko dira”.

Kasu honetan, murrizketaren oinarria ondare irabazi osoa da, arau orokorra aplikatuta. Hala ere, ondare irabazia lortu arren jarduera ekonomikoaren etekin arrunta negatiboa izan bada, murrizketaren oinarria ezin da izan irabaziaren eta etekin negatiboaren arteko konpentsazioaren emaitza baino gehiago, zeren “etekin garbi positiboaren osagai” den irabaziaren zatia ezin baita izan etekin garbi positiboa bera baino gehiago.

Beste alde batetik, baldin eta zergapekoak zenbateko bat irabaztearekin batera ondare galera bat izan badu jarduerari atxikitako elementuetan, murrizketaren oinarria, gehienez ere, bien arteko konpentsazioaren emaitzako saldo garbia da.

13. KUOTA LIKIDOA.

13.1 Kuotaren murrizketa.

Zergadunek likidazio oinarri orokorrari dagokion kuota soilik murrizteko eskubidea dute. Horretarako, autolikidazioa egin behar dute; zergaldia egutegiko urtea baino laburragoa bada, murrizketa ezin da hainbanatu.



13.2. Ondorengo ahaideen kenkaria eta seme-alaben urteko mantenua ordaintzeagatiko kenkaria (33/2013 Foru Arauaren 79. eta 80. artikulua).

13.2.1. Ezkontza ahaidetasuna.

Familia kenkariak ezin dira aplikatu ezkontza ahaideekin bizitzeagatik, ezinbesteko baldintza baita odolkidetasun edo adopzio ahaidetasunezko harremanak izatea.

13.2.2. Desgaitasunen bat duen 18 urte baino gehiagoko pertsona tutoretzapekoa.

Ondorengo ahaideen kenkaria dela eta, ondorengoan parekotzat jotzen dira desgaitasunen bat duten pertsona adin nagusikoak, zergadunarekin tutoretzazko lotura badute.

13.2.3. 33/2013 Foru Arauaren 79.3 b) artikulua.

“3. Ez da kenkaririk izango honako egoeraren batean dagoen ondorengo bakoitzarengatik: (...)

b) Zergaldiko urteko errentak, salbuetsitakoak kontuan hartu gabe, lanbide arteko gutxieneko soldata baino gehiago izatea, edo kideren batek lanbide arteko gutxieneko soldatetik gorako urteko errentak, salbuetsitakoak kontuan hartu gabe, izan dituen familia unitate bateko kide izatea”.

Ezkontza edo izatezko bikotea (maiatzaren 7ko 2/2003 Legean xedatutakoaren arabera eratutakoa) deuseztatu bada, ezkontideak edo bikotekideak banandu edo dibortziatu badira, edo ezkontzarik edo izatezko bikoterik egon ez bada, ez da galduko kenkaria aplikatzeko eskubidea, baldin eta semea edo alaba beste gurasoarekin eraturiko familia unitateko kidea bada, hau da, kenkaria aplikatu nahi duena ez beste unitate batekoa.

13.2.4. 33/2013 Foru Arauaren 79.3 c) artikulua: Ondorengo ahaideen kenkaria.

Ezin da aplikatu kenkaririk banako aitortpena aurkezten duten edo aurkeztu beharra duten ondorengoengatik.

Baldin eta familia unitateko kide guztiek baterako aitortpena egiten badute: kenkaria aplika daiteke zergaren autolikidazioa aurkeztu behar ez duten kide guztiengatik.

13.2.5. Mantenu ekonomikoaren edo urteko mantenuaren zenbatekoak benetan ordaintzearen baldintza.

Bi kenkariak (bai ondorengo ahaideena bai seme-alaben urteko mantenuarena) aplikatzeko, beharrezkoa da ondorengoa edo semea/alaba ekonomikoki mantentzea. Beraz, benetan mantenu hori egiten dela egiaztatu behar da agiri bidez; hain justu, aldi horretan egindako ordainketa guztiak aurkeztu behar dira. Kenkariok aplikatzeko, ez da nahikoa izango ordainketen zati bat egiaztatzea.

13.2.6. Ondorengoan kenkaria gehitzea ohiko bizilekua 4.000 biztanletik beherako Arabako udalerrri batean ezartzen duten zergadunei (33/2013 Foru Arauaren 79.2 bis artikulua).



Kenkari handiago horretarako eskubidea dute bai kenkari gehikuntza indarrean sartu ondoren aipatu bezalako udalerrietan bizilekua lehenengoz ezartzen duten zergadunek bai lehenagotik ere udalerririk horietan bizi direnek.

13.3. Aurreko ahaideen kenkaria (33/2013 Foru Arauaren 81. artikulua).

13.3.1. Ezkontza ahaidetasuna.

Kenkari hau ezin da aplikatu ezkontza ahaideekin (ezkontidearen gurasoak edo senideak, etab.) bizitzeagatik, ez eta haiei dirua emateagatik, ezinbestekoa baita ahaidetasuna odolekoa zein adopzioaren bidezkoa izatea.

13.3.2. Elkarrekin bizitzeko baldintza: 33/2013 Foru Arauaren 81.1 artikulua.

Ezinbestekoa da egutegiko urte osoan elkarrekin bizitzea, aurrekoa hil izan ezean. Baldin eta udalak emandako ziurtagirian agertzen bada aurrekoa ekitaldiko egun batera artean edo egun batetik aurrera zergadunarekin batera bizi izan dela, ezin da aplikatu haren kenkaria.

Kenkari honen ondoretarako, elkarbizitzaren parekotzat jotzen dira honako kasu hauek: ondorengoak ordaintzen dituztenean aurrekoa jarraitasunez eta iraunkortasunez bizi den egoitzako diru zenbatekoak. Horregatik, etxeko elkarbizitzarako jarraitzen den irizpide bera aplikatuz, baldin eta egoitzak emandako ziurtagirian jasota badago aurreko ahaidea han bizi dela data batera arte edo data horretatik aurrera, ez da kenkaria onartuko, salbu eta lekualdaketa ondorengoarekin bizi zen etxebizitzatik edo hark ere ordaintzen zituen beste egoitza batetik egiten bada.

13.3.3. 33/2013 Foru Arauaren 81.2.c) artikulua.

Ez aplikatuko kasuan kasuko zergaldiari dagokion zergaren aitorpena aurkezten duten aurrekoen kenkaria, eta hori bi kasu hauetan ulertuko da: "aitorpena aurkeztu behar duten" zein "beren borondatez aurkezten duten" aurrekoen kasuetan.

13.3.4. Egoitza zentroetan bizi diren aurreko ahaideen kenkaria.

Pertsona bat egoitza zentro batean bizi bada eta hango gastuak ahaidetasun gradu desberdineko ondorengoek ordaintzen badituzte (esaterako, seme batek eta biloba batek), hurbileneko ahaideak soilik aplikatu ahal du kenkaria (zenbateko osoa); kasu honetan semeak. Gastuak ordaintzen dituzten ondorengoak ahaidetasun gradu berekoak badira, eta kasu horrexetan soilik, kenkariaren zenbatekoa denen artean banatu behar da, heinean.

13.3.5. Aurreko ahaideen kenkaria gehitzea ohiko bizilekua 4.000 biztanletik beherako Arabako udalerririk batean ezartzen duten zergadunei (33/2013 Foru Arauaren 81.1 bis artikulua).

Kenkari handiago horretarako eskubidea dute bai kenkari gehikuntza indarrean sartu ondoren aipatu bezalako udalerrietan bizilekua lehenengoz ezartzen duten zergadunek bai lehenagotik ere udalerririk horietan bizi direnek.

13.4 Errentak zer diren, familia kenkarietarako.

Ondorengoan, aurrekoen eta desgaitasunen kenkariak aplikatu ahal izateko, ezinbestekoa da kenkarirako eskubidea ematen duen pertsonaren urteko errentak ez izatea gehieneko zenbateko jakin bat baino



gehiago (ondorengoen eta aurrekoen kasuan, lanbidearteko gutxieneko soldata; ezintasunen bat dutenen kasuan, soldata hori halako bi).

Errenten zenbatekoa gordina da, hau da, gasturik kendu gabe eta hobaririk aplikatu gabe.

13.5. Ohiko etxebizitzan inbertitzearen kenkaria.

13.5.1. Ohiko etxebizitza alokatzearen kenkaria. Higiezin bat erosteko eskubidea dakarten alokairu kontratuak.

Higiezin bat erosteko eskubidea dakarten alokairu kontratuetan, merkatuko balioen irizpideei eta kontratuaren klausulei jarraituz irizten bazaio ordaindutakoa bat datorrela errentamenduagatik hilero ordaindutako kuotekin, eta ez kontuan sartu denarekin, honelaxe jokatu da errentaduna erosketa aukeraz baliatzen den ekitaldian:

- a) Mantendu egingo dira aurreko urteetan alokairuagatik egindako kenkariak, eta
- b) Etxebizitzaren balioari ordura arte ordaindutakoa kenduko zaio (kenkariaren oinarria kalkulatzeko), baldin eta errentamendu kontratuan itundu bada alokairu kuotek eragina izango dutela etxebizitzaren azken balioan.

13.5.2. Ohiko etxebizitza erostearen kenkaria. Higiezina erosteko aukera.

Jabeak hirugarren bati emandako eskubide edo ahalmen bat da erosteko aukera, saria tartean egon zein ez, eta hartaz baliatuz hirugarrenak, epe zehatz baten barruan eta berak hala erabakita, ondasun bat eros dezake, erosteko aukeran itundutako prezioan eta baldintzetan.

Halako kasuetan, alde batera utzita salerosketa kontratu pribatu bat sinatu ondoren eskura emateagatik ordaindu diren zenbatekoak edo kontura ordaindu diren zenbatekoak, etxebizitza bat erosteko aukeragatik ordaindutako diru zenbatekoek ez dute eskubiderik ematen ohiko etxebizitza erostearen kenkaria aplikatzeko.

13.5.3. Kenkariaren oinarria: finantza gastuak.

1.- Finantza gastuak (hipotekaren eskritura, mailegua, tasazioa, irekiera komisioa, etab.) kengarriak dira, ez bakarrik besteren kapitalak erabiltzeagatik ordaindutako interesak. Ohiko etxebizitza erosteko finantza gastuak soilik dira kengarriak, birfinantzaketak eragiten dituenak ez; beraz, lehen hipoteka eratzeko gastuak eta azken kitapenekoak kengarriak dira.

Finantza entitateek ohiko etxebizitza eskuratzeko ematen dituzten maileguetarako adostutako zenbatekoen ordainketetan atzeratzeagatik kobratzen dituzten interesak ez dira kengarriak.

2.- Langabeziaren kontingentzia estaltzen duen ordainketak babesteko kontratu baten onuraduna izateagatik jasotako zenbatekoak hipoteka maileguaren kuotak ordaintzeko erabili dira: tratamendua.

Onuradunak jasotzen dituen zenbatekoak, diren aseguruaren hartzailearen bidez zein banku entitatearen bidez, hipoteka maileguaren kuotak ordaintzeko erabili behar dira; ondorioz mailegu hartzaileak ez ditu ordaindu beharko maileguan ordaintzeke dauden kuotak.



Horrenbestez, subjektu pasiboak errenta bat lortu du, zorra kitatzeko hipoteka maileguaren kuotak ordaintzeagatik, eta horrek aldakuntza ekarri du beraren ondarrera: ondare irabazia.

Hala, 33/2013 Foru Arauaren 40. artikulua haxe xedatzen du:

“Zergadunaren ondarearen balioan zeinahi aldaketa gertatzeagatik agerian jartzen diren aldaketak dira ondare irabaziaz eta galerak, foru arau honek etekintzat jotzen dituenan izan ezik.”

Beraz, ondare irabazi hau aseguru entitateak ordaindutako prestazioen zenbatekoa da; kopuru hori aurrezkiaren zerga oinarrian sartu eta konpentsatu behar da, Lurralde Erkidean prestazio horiek duten tratamendu bera izan behar baitu.

Gainera, aseguru entitateak ordaindutako prestazioek kenkaria aplikatzeko eskubidea emango dute, baldin eta hipoteka mailegu kengarri baten kuotak ordaintzeko erabiltzen badira.

Azkenik, ordaintzeko babesteko aseguruaren primen zenbatekoengatik, finantza gastuak direla eta, ezin da aplikatu kenkaririk.

Besteren finantzaketak eragindako gastutzat hauek joko dira, ez beste: irekiera komisioa, amortizazioa aurreratuagatik komisioa eta maileguaren kitapenagatik, eta notario gastuak, tasazio gastuak eta erregistro gastuak, maileguaren eskritura publikoa ezartzeko eta inskribatzeko egin beharrekoak.

Ondorioz, ordaintzeko babesteko aseguruaren primak ordaintzeko zenbatekoek ez dute emango kenkaria aplikatzeko eskubiderik, ez eta beste aseguru mota batzuen primak ordaintzeko zenbatekoek ere (mailegu amortizatzeako aseguruak, sute aseguruak, etxeko arrisku anitzeko aseguruak...).

13.5.4. Gauzatan jasotako ordainsariak: mailegua ohiko etxebizitza eskuratzeko edo birgaitzeko.

Gauzatan jasotako ordainsariaren balorazioa kenkariaren oinarrian sartzea onartuko da, baina ez kenkaria konturako sarreraren gainean aplikatzea.

13.5.5. Maileguen gabealdia.

Ordaindutako interesen kenkaria onartuko da, eskubidea egonez gero, nahiz eta ekitaldian zehar maileguaren printzipaletik ezer amortizatu ez.

13.5.6. Ohiko etxebizitza eskuratzeko mailegua dibisetan.

Gerta liteke mailegua dibisaren batean formalizatuta egotea, edo Espainian egoitzarik ez duen finantza entitate batek emana izatea. Horrelako kasuetan, interesengatik edo printzipala amortizatzeako ordaindutako dibisen kontrabalioa hartu behar da kontuan, eurotan, kontratuaren arabera ordaintzea dagokion egunean Europako Banku Zentralak ezarritako erosketak kotizazioaren arabera.

13.5.7. Kenkariaren mugak.

Zergaldia egutegiko urtea baino laburragoa bada, kenkariaren gehieneko mugak ez dira heinean banatzen.

13.5.8. Kasua: ohiko etxebizitzan inbertitzearen kenkariak aplikatu ondoren, etxebizitza eskualdatu eta lortutako zenbatekoa ohiko beste etxebizitza bat eskuratzeko berrinbertitzea.



33/2013 Foru Arauaren 87. artikuluan eta Zergaren Arautegiaren 64. artikuluan ezarritakoaren arabera, etxebizitza kreditua murriztu egin behar da, ez bakarrik ohiko etxebizitzan egindako inbertsioarengatik kendutako zenbatekoen arabera, baita berrinbertsioarengatik salbuetsitako ondare irabaziaren ehuneko 18 kenduz ere.

Eskualdaketa dagoeneko indargabetuta dagoen 35/1998 Foru Arauaren indarraldian egin bada, zerga kreditua berrinbertsioarengatik salbuetsitako irabaziaren ehuneko 15 murriztu behar da.

Berrinbertsioaren salbuespena aplikatzen bada, zergadunak ez du edukiko eskualdatutako etxebizitza eskuratzearengatik aplikatutako kenkariarengatik ezer itzuli beharrik, eta etxebizitza hori eskualdatuta lortutako ondare irabazia kargapetik salbuetsitatzat jotzeko eskubideari eutsiko dio, baldin eta lortutako zenbateko osoa beste ohiko etxebizitza bat eskuratzeko berrinbertitzen bada arau bidez ezarritakoari lotuta.

13.5.9. Familiaren egoeraren erreferentzia eguna.

33/2013 Foru Arauaren 86.2 artikuluan ezarritakoaren arabera, familia ugariaren adina eta titulartasuna zehazteko, zerga sortzen den eguneko egoera hartuko da kontuan.

13.5.10. Etxebizitzan egindako inbertsioa eta ezkontzaren deuseztapena edo senar-emazteen banantzea edo dibortzioa, edo maiatzaren 7ko 2/2003 Legean xedatutakoaren arabera eraturiko izatezko bikotea azkentzea: 33/2013 Foru Arauaren 87.7 artikulua.

Epailak hala ebatzita edo epai bidez onetsitako hitzarmena dela bide zergadunak banandu edo dibortziatu den pertsonari familia etxebizitza finantzatzeko edo hartan inbertitzeko ordaindu behar dizkion zenbatekoek ohiko etxebizitzan egindako inbertsioarengatik kenkaria aplikatzeko eskubidea ekar dezakete, eta, hala, zergadunaren etxebizitza kreditua murriztuko dute, non eta zenbateko horiek ez diren ordaindu konpentsazio pentsio gisa, hitzarmen horretan hala ezarrita dagoelako.

13.5.11. Ohiko etxebizitza eraikitzea.

a) Araubide orokorra:

1.- Etxebizitzaren eraikuntza eta ohiko etxebizitzaren eskuratzea asimilatu egingo dira, baldin eta zergadunak zuzenean ordaintzen baditu obrak egitearen ondoriozko gastuak, edo obren sustatzaileari konturako kopuruak ematen badizkio, betiere obra horiek, gehienez, lau urteko epealdian amaitzen badira, inbertsioa hasten denetik zenbatuta.

Horretarako, oro har, eraikuntza obrak amaitzeko ezarritako lau urteko epealdia hara noiztik hasi behar den kontatzen: zergadunak ohiko etxebizitzan egindako inbertsioaren kenkaria dela-eta onuraren bat dakarkion lehenbiziko inbertsioa egiten duenetik (kenkaria aplikatzea, etxebizitza kontuaren saldoan aplikatzea).

b) 2020rako epe berezia:

Aurreko paragrafoetan aipatutako lau urteko epea 2020ko urtarrilaren 1etik 2020ko abenduaren 31ra bitartean amaitzen bada, epe hori bost urtekoa izango da. (COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 9. Bi artikulua).

2.- Ohiko etxebizitza inoren lurrean eraikitzea.



Kode Zibilak 358. artikuluan ezartzen du inoren lurreen eraikitakoa lur horren jabeari dagokiola. Ondorioz, ondasunen banantze eraentzapeko ezkontide edo izatezko bikotekideek edo beraien artean inongo loturarik ez duten zergadunek ohiko etxebizitza eraikitzeke dirua bideratzen badute, horrek luraren titular den zergadunari baino ez dio emango kenkarirako eskubidea.

Aurrekoa gorabehera, zergari dagokionez, obra berria aitortzeko eskritura publikoa ematen den unean edo obra amaitzen denean, jatorrian luraren titular ez zen zergadunak luraren jabetza osoaren zati bat sinesgarritasunez egiaztatzen badu, orduan, eraikuntza aldian egindako kenkariak onartuko dira.

13.5.12. Lonja bat erostea etxebizitza bihurtzeko.

Zergaren Arautegiaren 62.5 artikuluan ezarritakoarekin bat etorritz, ohiko etxebizitza birgaitzeko lantzat joko dira zergadun batek bere jabetzakoa den lokal batean egindakoak, baldin eta etxebizitza bezala antolatzeke izan badira eta etxebizitza hori zergadunaren ohiko etxebizitza izango bada ondoren.

Kasu horretan, zergadunak kenkaria aplikatu ahal izango du ohiko etxebizitzan inbertitzeagatik, lokalaren erosketa balioari dagokion zenbatekoaren gain, hauek betetzen baditu: 1) Zerga aitortzeko borondatezko epealdia amaitzen denean, obra egiteko behar dituen lizentziak eskatu baditu; 2) Zergaren Arautegian jasotako betekizunak bete badira, etxebizitzaren eraikuntza eta etxebizitza horren erosketa asimilatu daitezten.

13.5.13. Etxebizitza kontuak.

a) “Kenkari eskubidea sortu duena” esamoldea:

Zergaren Arautegiaren 63. artikuluan ezarritakoa dela bide, kreditu entitateetan gordailutzen diren zenbatekoak –ezarpen mota guztietatik bereizitako kontuetan, betiere– zergadunak ohiko etxebizitza eskuratzeko edo birgaitzeko erabili dituela pentsatuko da, baldin eta kenkari eskubidea sortu duten diru zenbatekoak beraren ohiko etxebizitza eskuratzeko edo birgaitzeko ez beste ezertarako erabili badira.

Idatz zati horretan “kenkari eskubidea sortu duten diru zenbatekoak” esamoldea ageri da, eta esan nahi du ohiko etxebizitzan inbertitzearen kenkaria aplikatu dela.

Gordailaturiko diru zenbatekoak baliatzeko baldintzak betetzat joko dira, baldin eta kenkaria aplikatzeko eskubidea sortu duten diru zenbatekoak kreditu entitate bereko edo beste bateko beste kontu batean jartzen badira oso-osorik zerga sortu aurretik.

b) Zati bat baliatzea:

Kontuko zenbateko batzuk ohiko etxebizitza eskuratzeko edo birgaitzeko barik beste zerbitutarako baliatzen badira eta zerga sortu baino lehen berriz jartzen ez badira, hurrenkera honetan baliatu direla pentsatuko da:

- Lehenbizi, kenkari eskubidea sortu ez dutenak; eta zenbatekoa handiagoa bada.
- Lehenengo jarritakoak.

c) Etxebizitza kontuak lotzea:

Epe orokorra:



Zergaren Araudian ezarritakoaren arabera, etxebizitza kontura egindako ekarpenengatik kenkariak aplikatzeko eskubidea ez galtzeko ezinbestekoa da kontua ireki denetik sei urte pasatu baino lehen ohiko etxebizitza erostea ez birgaitzea.

2020rako epe berezia:

Kontuaren 6 urteko epea 2020ko urtarrilaren 1etik 2020ko abenduaren 31ra bitartean amaitzen bada, sartutako diru kopuruak ohiko etxebizitza erosteko edo birgaitzeko erabiltzeko epea 7 urtekoa izango da, kontua ireki zen egunetik kontatzen hasita. (COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 9. Bat artikulua).

c.1) Beraz, aplikatutako kenkariak egiteko eskubidea galduko ez bada, frogatu beharko da 6 urteko epealdian kontuko saldo osoa erabili dela etxebizitza eskuratzeko, eta hori frogatutzat joko da etxebizitza kontuko saldoa ohiko etxebizitza bat eskuratzeari lotuta egonez gero, baldin eta honako hauek aurkezten badira sei urteko epealdia amaitu baino lehen: 1) Etxea erosi izanaren kontratu pribatua eta 2) Egindako ordainketen justifikazioa.

Erosketa kontratua dela eta, kontratuaren datak, hirugarrenen aurrean balioa izan dezan, inskribatua behar du izan erregistro publikoan edo funtzionario publikoari emana bere karguarengatik, aipatutako sei urteko epemuga hori bete aurretik.

c.2) Bestalde, zergak direla eta ohiko etxebizitza eraikitzeak erostearen antza duenez gero, betetzat emango da aipatutako betekizuna, baldin eta kenkari eskubidea sortu duten zenbatekoak ohiko etxebizitza eraikitzen erabiltzen badira, 13.5.11 puntuak ezarritako baldintzetan.

c.3) Gauza bera gertatzen da honako kasu honetan ere:

- Zergaduna etxebizitza kooperatiba bateko bazkidea izanez gero.
- Kooperatibak lurzati baten adjudikazioa jasotzen badu babes ofizialeko etxebizitzak eraikitzeko.
- Baldin eta kooperatibak adjudikatuta dituen etxebizitzaren kopuruaren eta zergaduna lehentasun hurrenkeran dagoen postuaren arabera ondorioztatzen bada ezen etxebizitza bat jasoko duela.

Sozietate kooperatiboak horiek guztiak betetzen direla ziurtatu behar du.

Beti adierazi behar da etxebizitza kontua blokeatutzat joko dela ireki denetik sei urte pasatutakoan eta ordutik aurrera ezin izango dela egin ekarpenik zergaren kuotan kenkariak aplikatzeko. Geroztik, etxebizitza erosteko egiten diren ordainketak etxebizitza kontuko saldoaren kargura egin beharko dira, harik eta amaitu arte.

d) Subjektu pasibo batek ezin ditu eduki kenkari eskubidea ematen duten bi etxebizitza kontu.

Kasua: familia unitate bateko ezkontide bakoitzak etxebizitza kontu bat dauka; ezkontzaren araubidea irabazpidezkoa da.

Legeria zibilaren arabera ezkontide bakoitza bi kontuen ehuneko 50aren titularra da (indibisoan), ekarpenetarako ondasun edo errenta pribatiboak erabili direla frogatu ezean.

Hori erabat debekatuta dago PFEZaren Arautegian; hona zer dioen 63.3 artikulua:



“Zergadun bakoitzak etxebizitza kontu bat bakarrik eduki dezake.”

Hala ere, badaude honelako kasuak, eta honako irizpide hauek ezarri dira erregularizatzeko:

- Zergadunei eskatuko zaie etxebizitza kontu berriena ezeztatzeko eta bertako saldo osoa beste kontuan sartzeko. Transferentzia hori ez da kontuko dirua ohiko etxebizitza erosteaz edo birgaitzeaz bestelako xede baterako erabili izantzat joko.
- Uneko ekitaldia erregularizatuko dugu (behar denean baita aurrekoak ere): ekitaldi guztietako ekarpenak batu eta emaitza erdi bana egotzi ezkontideei.

e) Titulartasun pribatiboko etxebizitza kontura egindako ekarpenengatik aplika daitekeen kenkaria.

Demagun zergadun batek etxebizitza kontu pribatibo bat ixten duela eta kontu horri ohiko etxebizitzan inbertitu izanaren kenkaria aplikatzen zaiola; zergadun horrek kontuan zegoen saldoa irabazpidezko etxebizitza bat eskuratzeko erabiliz gero, etxebizitza kontura egindako ekarpenengatik aplika daitekeen kenkariaren ondorioetarako, saldoaren ehuneko 100 inbertitutzat joko da, ez ehuneko 50 (eskuratutako etxebizitza irabazpidezkoa baita). Ekarpina pribatibotzat joko da.

f) Administrazio publikoek etxebizitza kontuarengatik egindako kenkariak. Araua bete ez denean ez da izan zergadun Araban. Zer administraziori itzuli behar dizkio kendutako zenbatekoak?

Administrazio bakoitzak, bere araudiarekin bat etorritik, eskumena du zergadunak lurraldean bizi izan den bitarteko ekitaldietan aplikatu dituen kenkariak zuzenak diren ala ez zehazteko, bai eta zergaduna lurraldean bizi izan den bitarteko ekitaldietan egiaztatutako zenbatekoak itzuliak izan daitezkeen eskatzeko ere, baldin eta administrazioak zehaztutako ekitaldi horretan beste batean bizi izan ez bada.

13.5.14. Desgaitasunen bat duten pertsonak eta 70 urtetik gorakoak (Zergaren Arautegiaren 62.1 artikulua)

Oztopo arkitektonikoak kentzeari begira higiezinaren gaineko jabetzak dituen mugei buruzko maiatzaren 30eko 15/1995 Legeak desgaitasunen bat duten pertsonen aintzatesten dizkien eskubideak 70 urtetik gorakoek egikaritu ahal izango dituzte, desgaitasuna egiaztatu behar izan gabe.

Kontuan izanda aipatutako 62.1 artikulua oinarria lege hori dela, kenkariaren aplikazio eremua zabaltzen da 70 urtetik gorakoak sartzeko, baldin eta gainerako baldintzak betetzen badira.

Oztopo arkitektonikoak kentzeko obrak.

60. eta 62.1.d artikuluen arabera, obra GOFek ziurtatu behar du; hala ere, erakunde horrek ez du horrelako ziurtapenik egiten, eta ondorioz, agiri hauek eskatuko dira:

A.- Minusbaliotasuna duen pertsonak, beraren ezkontideak edo berarekin bizi den norbaitek ordaindu ditu obrak:

- Faktura; egokitzapen mota zehaztu behar da.
- Minusbaliotasunaren ziurtagiria, aurrekarietan ez bada ageri.

B.- Minusbaliotasuna duen pertsonarekin batera jabe den batek ordaindutako obrak:



- Faktura; egokitzapen mota zehaztu behar da.
- Jabeen erkidegoaren administratzaileak egindako ziurtagiria, datu hauek zehazten dituen: minusbaliotasuna duen pertsona nor den eta auzokide bakoitzak obraren kostuan daukan partaidetza ehunekoa.

13.5.15. Kenkaria baldin eta epealdi jakin batzuk betetzen badira.

Zergaren araudian ezarritako epealdiak (ad.: etxebizitza kontua, ohiko etxebizitzaren eraikuntza) bete ezean, zergadunak bere egoera erregularizatu beharko du eta ezin alegatu izango du aurreko ekitaldiak preskribatu direnik.

Horri begira, Administrazioak likidatzeko duen eskubidea preskribatuzat jotzeko behar diren urteak hara noiztik hasiko diren kontatzen: behar bezala kendutako zenbatekoak sartzekoak diren autolikidazioak aurkezteko epea (hau da, ez betetzea gertatzen den ekitaldiari dagokion autolikidazioa) amaitu eta hurrengo egunetik hasita.

13.5.16. Ohiko etxebizitza zer den: Ohiko etxebizitza saldu behar izatea bertan hiru urte etengabe bizi izan baino lehen, enplegua galtzeagatik.

33/2013 Foru Arauaren 87.8 artikulua haxe dio:

“Zerga honi dagokionez, ohiko etxebizitzat hartuko da zergaduna hiru urtean jarraian bizi dena. Hala ere, etxebizitza ohikoa izan dela joko da epealdi hori igaro ez arren, zergaduna hiltzen denean, edo ezinbestez etxebizitzaz aldatzera behartzen duten beste zirkunstantzia batzuk gertatzen direnean, hala nola: etxebizitza ez egokitzea zergadunaren edo horrekin bizi den ondorengo edo aurreko ahaidearen, ezkontidearen edo izatezko bikote lagunaren ezintasun mailara edo zergaren kuota osoan kenkaria egiteko eskubidea ematen duen pertsonarenera; senar-emazteak banantzea edo izatezko bikotea desagitea; lantokia aldatzea; lehen enplegua edo beste bat lortzea; etxebizitza aipatutako epean ordaintzea eragozten duten zirkunstantzia ekonomikoak, edo antzeko besteren bat.”

Etxebizitza ordaintzea eragozten duten inguruabar ekonomikoak egoteak bertan hiru urtez jarraituki bizi izan baino lehen bizilekua aldatzea justifikatzen du; hala ere, horrek ez du etxebizitzak ohiko izatera eragozten. Izan ere, agerikoa da honelako kasuetan etxebizitza aldatzea ezinbesteko gertatzen zaiola zergadunari, hau da, ez dela bere borondatez edo komeni zaiolako egiten duen aldaketa.

Horrenbestez, zergadunak enplegua galtzen badu, etxebizitzak ohikoa izaten jarraituko du, baldin eta, haren ondare egoera eta enplegu berria aurkitzeko itxaropena kontuan hartuta, etxebizitzaren salmenta borondatez hautatu izanaren ondorioa ez, ezpada saihestu ezin daitekeen ezinbesteko eginbeharra bada.

Halako kasuan dauden zergadunek erabaki ahalmenik dutenez zehazteko, ondoko alderdi hauek aztertu behar dira: ondare egoera, oro har; gastu arruntetarako zergadunak eta bere mendeko pertsonen baliagarri daukaten errentaren zenbatekoa (hipoteka maileguaren kuotak kenduta); eta enplegu berria aurkitzeko zer itxaropen daukan. Horiek guztiak baloratzeko, kontuan izan behar da egungo egoeran, merkatua nola dagoen ikusita (erabat motelduta dago eta prezioak beheraka hasita daude), etxebizitzaren salmenta nekez izan daitekeela espekulaziorako.

Irizpide hori bera aplikatuko zaie lanari utzi behar dioten langile autonomoei eta sarreretan murrizketa handia jasaten dutenei ere.



13.5.17. Ohiko etxebizitza zer den. Ohiko etxebizitza benetan eta etengabe okupatzeko epea. Epea 12 hilabetetik 18 hilabetera luzatzea. COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 9. Lau artikulua.

Zergaren araudiaren 61. artikuluko 2. apartatua ezartzen da etxebizitza benetan eta etengabe okupatzeko epea 12 hilabetekoa dela. Alabaina, baldin eta epe hori 2020ko martxoaren 14a eta 2020ko abenduaren 31 bitartean amaitzen bada, 6 hilabetez luzatuko da.

13.5.18. Ohiko etxebizitzaren kontzeptua; ondare irabazi salbuetsi jakin batzuk direla eta. Ohiko etxebizitzaren kontzeptuari dagokion 2 urteko epea 3 urtera luzatzea. COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 9. Bost artikulua.

Salbuetsitako honako ondare irabaziei soilik aplikatzekoa den epe berezia:

- a) Mendetasun larria edo handia duten pertsonen ohiko etxebizitza kostu bidez eskualdatzean sortzen direnak. (33/2013 Foru Arauaren 42. artikulua b) letra).
- b) 65 urtetik gorako pertsonen euren ohiko etxebizitza kostu bidez eskualdatzean sortzen direnak. (33/2013 Foru Arauaren 42. artikulua c) letra).
- c) Ohiko etxebizitza eskualdatzean sortzen direnak, baldin eta ohiko beste etxebizitza bat erosteko berrinbertitzen badira. (33/2013 Foru Arauaren 49. artikulua).

Zergaduna bere ohiko etxebizitza eskualdatzen ari dela ulertuko da eraikin hori une horretan bere ohiko etxebizitza bada edo eskualdatze dataren aurreko hiru urteetako edozein egun arte halakotzat hartu bada.

Aurreko paragrafoan aipatzen den epearen luzapena soilik aplikatuko da eraikinak, arau orokorren arabera, ohikoa izateari utzi badio 2018ko urtarrilaren 1etik 2020ko abenduaren 31ra bitartean.

13.5.19. Ohiko etxebizitza bat baino gehiago: 33/2013 Foru Arauaren 87.8 artikulua azken paragrafoa.

Senar-emazte batzuk edo izatezko bikoteko bateko kideak (maiatzaren 7ko 2/2003 Legean xedatutakoaren arabera eratutako bikotea) bi etxebizitzaren titularrak badira eta bakoitza batean bizi bada, bietako bat baizik ez da joko ohiko etxebizitzatzat. Foru Arauaren 87.8 artikuluan ohiko etxebizitza zein den ezarri da: dela familia unitatearen bizi interesen eta giza, gizarte eta ekonomiaren aldetiko harremanen berebiziko gunea dena.

Hori dela eta, ohiko etxebizitzaren kenkariak aplika ditzakete (ohikoa zein den aurreko paragrafoan ezarritakoaren arabera zehaztuta), Araban zein beste lurralde batean egon, baldin eta etxebizitzaren gaineko titulartasunak eta ezkontzaren ondasun eraientzak (edo izatezko bikotearen ondarearen araubide ekonomikoak) horretarako aukera ematen badute.

Kasu horietan, lehen xedatutakoaren arabera ohiko etxebizitzatzat hartzen den etxebizitzan benetan bizi den zergadunak bakarrik aplikatu ahal izango du kenkaria, haren gaineko titulartasun ehunekoaren arabera.

13.5.20. Etxebizitza eskuratzeko mailegua. Etxebizitza ezkongabetan erosi eta gero irabazpidezko ondasunen eraientzaren pean ezkondu.



Kasua: ezkontide batek etxebizitza bat eskuratu zuen ezkongabetan, eta erosketa mailegu baten bidez finantzatzen ari da, mailegu horren kapitala guztiz amortizatu gabe zegoelarik irabazpidezko araubidearekin ezkondu zirenean.

Zeinek aplika dezake kenkaria etxebizitzan inbertitzeagatik?

Ohiko etxebizitza eskuratzearen kenkaria haren titulartasun juridikoa daukanak aplika dezake. Hori dela eta, irabazpidezko sozietate batekin ari garenez, Kode Zibileko 1.357. eta 1.354. artikuluetan xedatutakoa aplikatu behar da.

1.357. artikulua.- *"Ezkontide batek sozietatea eratu aurretik erositako ondasunak pribatiboak izango dira kasu guztietan, nahiz eta geroratutako prezio osoa edo haren zati bat irabazpidezko diruaz ordaindu.*

Salbuespen gisa har daitezke familiaren etxebizitza eta ostilamendua; horiei dagokienez, 1.354. artikulua aplikatuko da".

1.354. artikulua.- *"Ondasunak zati batean irabazpidezkoa eta beste batean pribatiboa den prezio edo kontraprestazio baten bidez eskuratzen badira, pro indiviso izango dira irabazpidezko sozietatearenak eta ezkontide batenak edo bienak, bakoitzak egindako ekarpenen balioaren proportzioan".*

Beraz, hizpide dugun kasuan, etxebizitzan egindako inbertsioagatik kenkaria erdi bana dagokie ezkontideei, zeren maileguaren kuotak irabazpidezko diruarekin ordaintzen baitira eta etxebizitzaren titulartasuna ere, ezkontza egunean kitatu gabe egon den kopuruari dagokionez, irabazpidezkoa baita.

Nolanahi ere, Kode Zibileko 1.354. eta 1.357. artikuluetatik ondorioztatu daitekeen irizpide hau ezkontideek eurek aldatu dezakete euren borondatez: ez aplikatzea hauta dezakete, eta eskuratutako ondasuna nahi duten bezala egotz dezakete. Etxebizitzaren titulartasuna aldatzeko asmoa modu sinesgarrian frogatu behar zaio Administrazioari zuzenbidean onartutako frogabideetako bat erabiliz; izan ere, aldaketak erabateko ondorioak sortuko ditu, baita zergen arloaz kanpo ere.

Ondorioa: Maileguaren kuotei dagokien kenkaria erdi bana egotzi behar zaie ezkontideei, baldin eta ez badute frogatzen etxebizitza lehenengo eskuratu zuen ezkontidearen jabetza pribatiboa dela.

13.5.21. BOE bat ehuneko 100ean titular bakar batek erostea, eta hipoteka mailegua egitea titularrak eta bere bikoteak erdi bana (ehuneko 50 bakoitzak) eskuratzeko. Ondoren, irabazpidezko eraentzapean ezkotzea edo irabazpidea arautzen duen itunpean izatezko bikotea eratzea.

BOEaren esleipendunak baino ez du erosi etxebizitza, eta hipoteka mailegu baten bidez finantzatu du, non bi pertsona ageri diren mailegu hartzaile solidario gisa; hain zuzen ere, BOEaren erosle titularra eta bere bikotea.

Kasu honetan, bi une bereizi behar ditugu:

1.- Irabazpidezko eraentzapean ezkondu baino lehenago edo irabazpidea arautzen duen itunpean izatezko bikotea eratu baino lehenagokoa.

Baldin eta maileguak xede bakar bat izan badu, hau da, etxebizitza erosteak eragindako kostu osoa edo zati bat berdintzea, etxebizitzaren titularrak, jabea denez, mailegua dela eta unean unean ordaintzen



denaren erdiagatik baino ezin izango du ezarri kenkaria; hau da, mailegu horretan duen partaidetzagatik, eta betiere hura ordaindu izana ziurtatu ondoren.

Bere bikoteak, berriz, ezin izango du kenkaririk aplikatu etxebizitza erosi izanagatik, haren titularra ez den bitartean.

2.- irabazpidezko ondasunen eraentzapean ezkondu edo irabazpidea arautzen duen itunpean izatezko bikotea eratu ondorengoa.

Ordutik aurrera etxebizitzan egindako inbertsioagatik kenkaria erdi bana dagokie ezkontideei edo izatezko bikotekideei, zeren maileguaren kuotak irabazpidezko diruarekin ordaintzen baitira eta etxebizitzaren titulartasuna ere, ezkontza egunean edo izatezko bikotea eratzeko egunean kitatu gabe egon den zenbatekoari dagokionez, irabazpidezkoa baita.

Egoera berri horrek auzia eragiten du erabakitzerakoan maileguaren zer ehuneko den kenkaria. Aurreko 1. puntuan azaldu dugu etxebizitza erosteko eskatutako maileguaren ehuneko 50 bakarrik onar daitekeela eta gainerako ehuneko 50 ez dela kengarria, ezkontideak ez baitu eskuratu etxebizitzaren titulartasuna.

Edonola ere, maileguak xede bakar bat izan duela pentsatuko dugu; hau da, etxebizitza erosteak eragindako kostu osoa edo zati bat berdintzea, eta bikotea orain, beste familia egoera batean, bai ari da etxebizitza erosten Kode Zibilak bere 1.354 eta 1.357 artikuluan xedaturikoari jarraituz. Hartara, bikoteari bere maileguaren erdiagatik dagokion zorra hasieran kengarria ez bazen ere, orain kengarria dela esan dezakegu etxebizitza erosteko dagoen mailegu osoa, bikoteak orain bete egiten du-eta etxebizitzaren titulartasuna eskuratzearen baldintza.

Babes ofizialeko etxebizitza bat erostea besterik gabeko kasu honi aplikatu beharreko ondorioak berdin aplikatu behar zaizkio, jakina, etxebizitza libre bat erosten deneko antzeko beste kasuren bati. Edonola ere, BOE bat erosteari buruzko kasuan, Eusko Jaurlaritzako kasuan kasuko sailari jakinarazi behar zaio kasu horrek ez ote duen menturaz hausten babes ofizialeko etxebizitzari buruz indarrean den araudia.

13.5.22. Ohiko etxebizitzan inbertitzearen edo hura finantzatzearen kenkaria.

Maileguaren balioa etxebizitzaren eskuraketa balioa eta erosketaren berezko gastuak bat eginda baino gehiago bada, amortizazioaren ehuneko 100 egotzi behar da eta interesak heinean banatu.

Halaber, birfinantzaketa eginez gero, amortizazioaren ehuneko 100 egotzi behar da eta interesak heinean banatu.

Batera zein bestera, lehenengo etxebizitzaren balioa amortizatzen da, hau da, zati kengarria. Kenkari oinarria izeneko zenbatekoa iristean, mailegua ez da kengarria.

13.5.23. Ohiko etxebizitza erostearen kenkaria gehitzea ohiko bizilekua 4.000 biztanletik beherako Arabako udalerri batean ezartzen duten zergadunei (33/2013 Foru Arauaren 87.1 artikulua).



Kenkari handiago horretarako eskubidea dute bai kenkari gehikuntza indarrean sartu ondoren aipatu bezalako udalerrietan bizilekua lehenengoz ezartzen duten zergadunek bai lehenagotik ere udalerrit horietan bizi direnek.

Hala ere, 4.000 biztanle baino gutxiago dituzten udalerrietan bizi diren zergadunek ez dute kenkari hori aplikatzeko eskubiderik, baldin eta 4.000 biztanle baino gehiago dituzten udalerrietan etxebizitzak eraikitze obren sustatzaileei konturako zenbatekoak ematen badizkiote, edo, bestela, zuzenean obra horietatik eratorritako gastuak ordaintzen badituzte.

13.5.24. Ohiko etxebizitza berriztatze 2020ko uztailaren 1etik abenduaren 31ra bitartean hasten diren lanengatik egin daitekeen kenkaria. COVID-19arekin lotuta, pertsona fisikoen errentaren gaineko zergako, oinordetzen eta dohaintzen gaineko zergako eta ondare eskualdaketen eta egintza juridiko dokumentatuen gaineko zergako doikuntza neurriak onesten dituen ekainaren 23ko 8/2020 Zerga Premiazko Arauzatzeko Dekretuaren 2. artikulua.

1. Kenkaria aplikatzeko, honako baldintza hauek bete behar dira:

1.1. Kenkaria arautzen duen artikularen lehenengo apartatuak ezartzen du zergadunek kenkari hori aplikatu ahal izango dutela beren jabetzako ohiko etxebizitza berritzeko obrak egiteagatik ordaindutako kopuruen gainean. Horrenbestez, zergadunak berritzen den etxebizitzaren jabetza osoa izan behar du, bai eta dagozkion erabilera ahalmenak ere.

Hala ere, ohiko etxebizitza erosteagatik kenkarirako aurreikusitakoarekin bat etorritik, ohiko etxebizitzaren gainean titulartasun publikoko lurzoru baten gainean eratutako azalera eskubidea duten zergadunek ere egin ahal izango dute kenkari berria.

1.2. Kenkari berri horren ondorioetarako, zergadunaren ohiko etxebizitzat hartuko da Pertsona Fisikoen Errentaren gaineko Zergari buruzko 33/2013 Foru Arauaren 87.8 artikuluan eta zerga horren araudiaren 61. artikuluan (40/2014 Foru Dekretua) aurreikusitako baldintzak betetzen dituen.

1.3. Etxebizitzak gutxienez 10 urte izan behar ditu berritzeko obrak hasten diren egunean. Ondorio horretarako, ez da kontuan hartuko etxebizitza eskuratu zenetik 10 urte igaro diren ala ez.

1.4. Obra gauzatzeko aurrekontua, gutxienez ere, 3.000 eurokoa izan behar da. Gutxienezko muga hori kalkulatzeko, honako hauek hartuko dira kontuan: kontratistaren enpresa onura; balio erantsiaren gaineko zerga; eraikuntza, instalazio eta obren gaineko zerga, eta obrekin lotutako gainerako tasa edo prezio publikoak, bai eta ordainsari profesionalak eta obrak gauzatzetik eratorritako gainerako gastuak ere.

Zergadunen ohiko etxebizitzak dauden eraikinen elementu komunean egindako berritze obren kasuan (jabeen erkidegoek sustatutako obrak), betekizun hori etxebizitza bakoitzari dagokiola ulertu behar da, obraren gauzatze materialaren kostuaren dagokion zatiaren arabera.

1.5 Kenkari hori aplikatzeko, zergadunak obren udal lizentzia izan behar du, lortzeko prozedura edozein dela ere (erantzukizunpeko adierazpena, etab.).

2. Kenkariaren oinarria:



2.1. Kenkariaren oinarria etxebizitzak berritzeko obrak egiteagatik ordaindutako zenbateko guztiek osatuko dute (balio erantsiaren gaineko zerga; eraikuntza, instalazio eta obren gaineko zerga; tasak; ordainsari profesionalak; kontratistaren enpresa onura, etab.).

2.2 Kenkariaren oinarriaren gehieneko muga 15.000 eurokoa izango da. Pertsona Fisikoen Errentaren gaineko Zergari buruzko 33/2013 Foru Arauaren 99.2 artikulua arabera, baterako aitorpena eginez gero, gehieneko muga hori ez da biderkatzen familia unitateko kide kopuruaren arabera. Beraz, muga hori aitorpen bakoitzeko aplikatzen da.

2.3. Hala badagokio, zergadunek justifikatu egin beharko dituzte kenkari oinarria osatzen duten zenbatekoak, dagozkien fakturak eta ordainagiriak aurkeztuz. 8/2020 Zerga Premiazko Araugintzako Dekretuaren 2. Lau artikulua eta Pertsona Fisikoen Errentaren gaineko Zergari buruzko 33/2013 Foru Arauaren 94. artikulua ezarritakoaren arabera, faktura horiek enpresaburuak eta profesionalak fakturak egiteko eta entregatzeko duten betebeharra arautzen duten arauetan eskatzen diren baldintzak bete beharko dituzte.

2.4. Zergadunek 2020ko uztailaren 1etik 2021eko martxoaren 31ra bitartean ordaindutako zenbatekoak soilik sartu ahal izango dira kenkari oinarrian. Zenbateko horiek 2020ko ekitaldian kenduko dira (2021eko urtarrilaren 1etik martxoaren 31ra bitartean ordaindutako zenbatekoak barne). Kenkari hori ez da inola ere aplikatuko 2021eko ekitaldian; izan ere, 8/2020 Zerga Premiazko Araugintzako Dekretuaren 2. Bat artikulua arabera, 2020ko ekitaldian baino ez da egongo indarrean.

2.5. Kenkariaren oinarria zehazteko, lehen aipatutako kopuruei ohiko etxebizitza berritzeko obrak egiteagatik zergadunak jasotako dirulaguntzen zenbatekoa kendu behar da, baldin eta dirulaguntza horiek pertsona fisikoen errentaren gaineko zergatik salbuetsita badaude. Etxebizitza berritzeko obrak egiteagatik ordaindutako zenbatekoek kenkariaren oinarriaren gehieneko muga (15.000 euro) gainditzen badute, aipatutako dirulaguntzek proportzionalki murriztuko dute kenkariaren oinarria.

3. Kenkariaren zenbatekoa.

Kenkariaren oinarriaren zenbatekoa zehazteko hari aplikatuko zaion ehuneko %10 izango da, oro har, eta %15, baldin eta A edo B motako energia lizentzia lortzeko birgaitze energetikoa xede duten berritze obrak badira.

Etxebizitza berean birgaitze energetikoko obrak eta higiezina berritzeko beste obra batzuk egiten badira, ezingo dira inolaz ere bi kenkari ehuneko horiek batuta aplikatu zenbateko berberen gainean. % 15eko kenkaria aplikatzeko, zergadunak justifikatu behar du ehuneko hori aplikatzea ahalbidetzen duen egitatezko kasua betetzen dela (A edo B energia lizentzia lortzea).

4. Ohiko etxebizitza birgaitzeagatiko kenkariarekiko bateraezintasuna.

4.1. Etxebizitza berritzeko gauzatutako obrek birgaitze jarduketara babestuaren kalifikazioa jasotzen badute, Pertsona Fisikoen Errentaren gaineko Zergari buruzko 33/2013 Foru Arauaren 87. artikulua 6. paragrafoan aurreikusitakoaren arabera, zergadunek ezin izango dute ohiko etxebizitza berritzeagatiko kenkaria zenbateko berberen gainean aplikatu. Hau da, kenkari horiek bateraezintasunak dira elkarren artean, zenbateko berberei dagokienez, eta, beraz, zergadunak bata edo bestea aplikatzea aukeratu beharko du.

Kenkarietako baten mugak gaindituz gero (kenkariaren oinarriaren gehieneko muga, berritzeko kenkariaren kasuan, edo urteko gehieneko kenkariaren muga, birgaitzeko kenkariaren kasuan),



gehiegizko kopuruak beste kenkaria aplikatzeko eskubidea sortuko luke, betiere horretarako ezarritako gainerako baldintzak betetzen badira.

4.2. Ohiko etxebizitza berritzeko obregatikoen kenkariaren zenbatekoek ez dute etxebizitzako kreditu fiskala kontsumitzen (Pertsona Fisikoen Errentaren gaineko Zergari buruzko 33/2013 Foru Arauaren 87. artikuluan 3. apartatua arautua), eta ez dira zenbatzen artikuluan bereko 2. apartatua aurreikusitako urteko gehieneko kenkariaren ondorioetarako.

13.6. Jarduera ekonomikoak sustatzearen kenkariak.

13.6.1. Inbertsioen eta beste jardueren batzuen kenkariak: 33/2013 Foru Arauaren 88. artikulua. Nola zehaztu jardueren ekonomikoek sortutako etekin zerga oinarri orokorrean eraturiko zatia dagokion kuota osoa.

Eragiketa hau egin behar da:

$$X = \frac{\text{Kuota oso orokorra} \times \text{Jardueren etekina zuzeneko zenbatespenean}}{\text{Zerga oinarri orokorra, guztira}}$$

13.6.2. Inbertsioen eta beste jardueren batzuen kenkariak: 33/2013 Foru Arauaren 88. artikulua. Kuota osoa aski izan ez eta aplikatu ez diren kenkariak.

Kuota osoa aski ez izateagatik aplikatzen ez diren kenkariak inbertsioa egin eta hurrengo hogeita hamar urteetan amaitzen diren zergaldietako aitortzetan aplikatu ahal izango dira, 33/2013 Foru Arauaren 88. artikuluan ezarritako muga errespetatzen dela. Zergaldi horietan jardueren ekonomikorik etekinik sortzen ez badute, zergadunak galdu egingo du eskubidea.

13.6.3. Langileek entitate enplegu emailean parte hartzearen kenkaria: 33/2013 Foru Arauaren 89. artikulua.

Zergaldia urtea baino laburragoa bada, kenkariaren gehieneko mugak ez dira hainbanatzen.

13.6.4. Mikroenpresetan, enpresa txikietan edo enpresa ertainetan inbertitzeagatik aparteko kenkaria. COVID-19arekin lotura duten eta sozietateen gaineko zergari eta pertsona fisikoen errentaren gaineko zergari eragiten dieten premiazko neurriak onesten dituen ekainaren 2ko 7/2020 Zerga Premiazko Araugintzako Dekretuaren 11. artikulua.

Pertsona fisikoen errentaren gaineko zergaren zergadunek zerga premiazko araugintzako dekretu honen 8. artikuluan ezarri den mikroenpresetan, enpresa txikietan eta ertainetan inbertitzeagatik aparteko kenkaria aplikatu ahal dute 2020ko zergaldiari dagokion autolikidazioan, 33/2013 Foru Arauaren 90. artikuluan jasotako kenkariaren ordean, zenbait berezitasunekin.

Hona hemen aparteko kenkari horren edukia:



Bat. Sozietateen gaineko zergaren zergadunek Sozietateen gaineko Zergari buruzko abenduaren 13ko 37/2013 Foru Arauaren 13. artikuluan mikroenpresa, enpresa txiki edo ertaintzat hartzen diren enpresetako akzioak edo partaidetzak harpidetzean edo eskuratzean 2020an ordaindutako zenbatekoen ehuneko 10 kendu ahal izango dute zergaren kuotatik.

Kenkari hau lortzeko, eskuratutako edo harpidetutako akzioek edo partaidetzek zergadunaren ondarean egon beharko dute bost urtetik gora.

Kenkari oinarria gehienez 100.000 eurokoa izango da, eta harpidetutako edo eskuratutako akzioen edo partaidetzen eskuratze balioak osatuko du.

Bi. Aurreko apartatuan ezarritako kenkaria 2020ko ekitaldian ordaindutako zenbatekoen ehuneko 15ekoa izango da, enpresa sortu berrien akzioak edo partaidetzak harpidetzeko edo eskuratzeko denean, baldin eta horiek mikroenpresa, enpresa txiki edo ertaintzat hartzen badira Sozietateen gaineko Zergari buruzko abenduaren 13ko 37/2013 Foru Arauaren 13. artikuluan xedatutakoaren arabera, eta, betiere, 5. apartatuan xedatutakoa betetzen bada. Kapitalari egindako aldi baterako ekarpenaz gain, zergadunak parte hartzen duen erakundearen garapenerako egokiak diren enpresa edo lanbide ezagutzak eman ahal izango ditu, erakundearekin adostutako inbertsio akordioan ezartzen diren baldintzetan.

Kenkari hori aplikatzeko, enpresak jarduera ekonomiko berria gauzatzeko behar dituen giza baliabideak eta baliabide materialak izan beharko ditu. Ez da baldintza hori betetzat joko honako eragiketa hauen ondorioz sortutako sozietateak badira: bat egitea, banantzea, aktiboen ekarpena, aktiboaren eta pasiboaren lagapen globala, jarduera adarren ekarpenak, interes ekonomikoko taldeak egitea, aldi baterako enpresa elkarteak eta jarduera ekonomiko berria sortzea benetan ez dakarten bestelako eragiketak.

Erakunde batean akzioak edo partaidetzak harpidetzeak edo eskuratzeak ez du kenkari hau aplikatzeko eskubiderik emango, baldin eta lehendik beste titulartasun baten bidez gauzatzen zen jarduera bera gauzatzen bada erakunde horren bidez.

Apartatu honetan aurreikusitako kasuetan, kenkari oinarria gehienez 150.000 euro izango da, eta harpidetutako akzioen edo partaidetzen eskuratze balioak osatuko du.

Hiru. Aurreko apartatuetan ezarritako kenkaria 2020ko ekitaldian ordaindutako zenbatekoen ehuneko 20koa izango da, enpresa berritzaileen akzioak edo partaidetzak harpidetzeko edo eskuratzeko denean, baldin eta horiek mikroenpresa, enpresa txiki edo ertaintzat hartzen badira Sozietateen gaineko Zergari buruzko abenduaren 13ko 37/2013 Foru Arauaren 13. artikuluan xedatutakoaren arabera, eta, betiere, 5. apartatuan xedatutakoa betetzen bada. Ondorio horietarako, honako hauek hartuko dira enpresa berritzailetzat: parte hartzeak eskuratzen diren ekitaldian Europako Batzordearen 2014ko ekainaren 17ko 651/2014 (EB) Erregelamenduaren 2. artikuluko 80. apartatuan xedatutakoa betetzen dutenak (Erregelamendu horren bidez, laguntza kategoria batzuk barne merkatuarekin bateragarritzat jotzen dira, Tratatuaren 107. eta 108. artikulua aplikatuz).

Apartatu honetan aurreikusitako kasuetan, kenkari oinarria gehienez 200.000 euro izango da, eta harpidetutako akzioen edo partaidetzen eskuratze balioak osatuko du.

Lau. Aurreko hiru apartatuetan ezarritako kenkariak aplikatzeko, kenkari hau aplikatuko zaien akzioak edo partaidetzak eskuratzen edo harpidetzen dituen entitatea sozietate anonimoa, erantzukizun mugatuko sozietatea, kooperatiba, lan sozietate anonimoa edo lan erantzukizun mugatuko sozietatea izan behar da, uztailearen 2ko 1/2010 Legegintzako Errege Dekretuaren bidez onetsitako Kapital



Sozietateei buruzko Legearen testu bateginean eta Sozietate Laboral eta Partaidetuen urriaren 14ko 44/2015 Legean aurreikusitako moduan, eta, era berean, ezingo dira egon inongo merkatu antolatutan negoziatzeko onartuta. Akzioa edo partaidetza edukitzen den urte guztietan bete beharko da baldintza hori.

Bost. Aurreko 2. eta 3. apartatuetan ezarritako kenkariak aplikatze aldera, zergadunak entitatea eratzten den unean bertan eskuratu beharko ditu akzioak edo partaidetzak, kapital handitzearen bidez, edo bestela eratu ondoko bost urteetan eskuratu beharko ditu bigarren mailako merkatuan, eta partaidetza edo akzio horiek ondarean eduki beharko ditu bost urtetik gora.

3. apartatuan aipatzen den kasuan, akzioak edo partaidetzak eraketa horren ondorengo zazpi urteetan harpidetu edo eskuratu beharko dira, baina epe hori ez da eskatuko arriskuko finantzaketaren hasierako inbertsio bat behar duten erakundeen kasuan, baldin eta, merkatu geografiko edo produktu merkatu berri batean sartzeko egindako negozio plan batean oinarrituta, inbertsioa aurreko bost urteetako urteko eragiketen bolumenaren batez bestekoaren ehuneko 50 baino handiagoa bada.

Sei. Artikulu honetan araututako kenkaria ez zaie aplikatuko honako kasu hauetakoren batean dauden erakundeetan egindako inbertsioei:

a) Berreskuratze agindu baten mende dauden enpresak, Europako Batzordeak aurretiaz erabaki duelako laguntza bat legez kanpoko eta barne merkatuarekin bateraezina dela.

b) Krisian dauden enpresak, Europako Batzordearen 2014ko ekainaren 17ko 651/2014 (EB) Erregelamenduaren 2. artikuluko 18. apartatuan xedatutakoaren arabera. Erregelamendu horren bidez, laguntza kategoriatzat barne merkatuarekin bateragarritzat jotzen dira, Tratatuaren 107. eta 108. artikuluetan aplikatuz.

c) Aurreko bat, bi eta hiru apartatuetan aipatzen diren akzioak edo partaidetzak jaulkitzean Europako Batzordearen 2014ko ekainaren 17ko 651/2014 (EB) Erregelamenduaren 21. artikuluko 9. apartatuan aipatzen den arriskuko finantzaketaren zenbateko osoa gainditu duten edo gainditzen duten enpresak. Erregelamendu haren bidez, laguntza kategoriatzat jakin batzuk barne merkatuarekin bateragarritzat jotzen dira, Tratatuaren 107. artikulua eta 108. artikuluetan aplikatuz.

Zazpi. Artikulu honetan araututako kenkaria aplikatzeko, ezinbestekoa izango da akzioak edo partaidetzak harpidetu edo eskuratu dituen entitateak emandako ziurtagiria lortzea. Ziurtagiri horretan adierazi behar da eskuraketa gertatu zen zergaldian entitateak betetzen zituela kenkaria jasotzeko eskubidea izateko eskatzen ziren baldintzak.

Horrez gain, hiru apartatuan araututako kasuan, erakundeak Europako Batzordearen 2014ko ekainaren 17ko 651/2014 (EB) Erregelamenduaren 2. artikuluko 80. apartatuan ezarritako baldintzak betetzen dituela egiaztatzen duten agiriak aurkeztu beharko ditu, aditu independenteek baldintza horiek betetzen direla egiaztatuta. Erregelamendu horren bidez, laguntza kategoriatzat jakin batzuk barne merkatuarekin bateragarritzat jotzen dira, Tratatuaren 107. eta 108. artikuluetan aplikatuz.

Zortzi. Bat apartatutik zazpi apartatura bitartean ezarritako betekizunak betetzen ez badira, zergadunak kenkariaren ondoriozko kuota sartu behar du ez-betetzea gertatu den zergaldiari dagokion autolikidazioan, kasuan kasuko berandutze interesekin batera.

Pertsona fisikoaren errentaren gaineko zergan, honako berezitasun hauek aplikatuko dira kenkari horri dagokionez:



- a) Kenkari hau aplikatzeko, zergadunaren zuzeneko eta zeharkako partaidetza, entitate horretan bere ezkontideak edo Izatezko Bikoteak arautzen dituen Eusko Legebiltzarraren maiatzaren 7ko 2/2003 Legean ezarritakoaren arabera eraberrita dagoen izatezko bikoteko kideak edo zergadunarekin ahaidetasuna (zuzena zein albokoa), odolkidetasuna edo ezkontza ahaidetasuna (bigarren maila barne) dela bide lotuta dagoen edozein pertsonak duenarekin batera, ezin izango da izan entitatearen kapital sozialaren edo bere boto eskubideen % 25 baino gehiago, partaidetzak irauten duen aldiko egun bakar batean ere.
- b) Ken daitekeen gehieneko kopurua ezin daiteke izan zergadunari dagokion likidazio oinarriaren ehuneko 15 baino gehiago.
- c) Ezarritako mugak gainditzeagatik kendu ez diren zenbatekoak ondoz ondoko hurrengo bost urteetan amaitzen diren zergaldietako likidazioetan aplikatu ahal izango dira, aipatu diren mugak errespetatuz.
- d) Kenkari hau aplikatu ahal izateko, autolikidazioa aurkeztu behar da, Pertsona Fisikoen Errentaren gaineko Zergari buruzko Foru Arauaren 105. artikuluan xedatutakoaren arabera.

Entitateen akzioen eta partaidetzen eskualdaketari Pertsona Fisikoen Errentaren gaineko Zergari buruzko Foru Arauaren 42. artikuluko g) letran xedatutakoa aplikatuko zaio, zergadunak horiek eskuratzeko aparteko kenkaria aplikatu bazuen.

13.6.5. Langileek entitateak eratzeagatik kenkaria. COVID-19arekin lotutako zerga neurri berriak onesten dituen maiatzaren 12ko 6/2020 Zerga Premiazko Araugintzako Dekretuaren 9. Sei artikulua.

33/2013 Foru Arauak 90. quater artikuluan arautzen duen kenkaria (langileek entitateak eratzeagatikoa) aplikatzeko, baldin eta entitateak 2019ko irailaren 15etik 2020ko abenduaren 31ra bitartean eratu badira, ondoren adierazten diren epeak urtebetekoak izango dira, haien eraketatik aurrera:

- a. Harpidetzaren xedea entitatearen eraketa dela irizteko epea, 90. quater artikuluko horretako 2. apartatuko a) letran ezarria.
- b. Zergadunek entitatean langile bezala zerbitzu egiten hasteko epea, 90. quater artikuluko horretako 2. apartatuko e) letran ezarria.
- c. 90. quater artikuluko horretako 2. apartatuko azken paragrafoan ezarritako epea, zeinean ez baita eskatzen langile guztiek 2. apartatu horretako g) letran ezarritako baldintza betetzea.
- d. 90. quater artikuluko horretako 3. apartatuko azken paragrafoan ezarritako epea, zeinean ez baita eskatzen langile bezala zerbitzu egitea.

13.7. Mezenasgo jarduerengatik aplika daitezkeen kenkariak: 33/2013 Foru Arauaren 91. artikulua.

13.7.1. Nola zehaztu aplikatu beharreko kenkariak.

33/2013 Foru Arauko 91. artikuluan hauxe ezarri da:

“1. Zergadunek irabazteko asmorik gabeko erakundeek zerga araubidea eta mezenasgorako zerga pizgarriak araupetu dituzten foru arauetan zerga honetarako ezarritako kenkariak aplika ditzakete.



2. Artikulu honetan aipatutako kenkariaren oinarria ez da izango zerga honen oinarri likidagarriaren % 30etik gorakoa. (...)"

Beraz, egun indarrean dagoen araudiarekin, kengarriak izango dira irabazi asmorik gabeko entitateen alde egindako dohaintzak, baldin eta irabazi asmorik gabeko entitateen eta mezenasgorako zerga pizgarrien zerga araubideari buruzko Arabako, Bizkaiko eta Gipuzkoako lurralde historikoetako foru arauak bazaizkie aplikatzekoak; kengarriak izango dira, hain zuzen, arau horietan berariaz aipatzen diren entitateei dohaintzak emandako diru zenbatekoen gain (hala nola Gurutze Gorria, ONCE eta abar).

Araudia:

- Araban: 16/2004 Foru Araua, uztailaren 12koa, irabazteko asmorik gabeko entitateen eta mezenasgorako zerga pizgarrien zerga araubidearena.
- Bizkaian: 4/2019 Foru Araua, martxoaren 20koa, irabazteko asmorik gabeko entitateen eta mezenasgorako zerga pizgarrien zerga araubidearena.
- Gipuzkoan: 3/2004 Foru Araua, apirilaren 7koa, irabazteko asmorik gabeko entitateen eta mezenasgorako zerga pizgarrien zerga araubidearena, eta 2/2019 Foru Araua, otsailaren 11koa, Gipuzkoako Lurralde Historikoan kultur mezenasgoaren aldeko pizgarriena.

13.7.2. Lehentasuneko mezenasgo jarduerak eta interes publiko berezia duten jarduerak sustatzeko programak. 16/2004 Foru Arauaren 29. eta 30. artikulua.

Lehentasuneko jardueretarako eta interes publiko berezia duten gertaerak sustatzeko programetarako ezarritako zerga onurak Estatuko eta foru lurraldeetako organo eskudunek halakotzat jotzen dituzten jarduerari eta egitarauari aplikatuko zaizkie, baldin eta haiek onetsitako araudian elkarrekikotasunarekin aintzatesten badituzte Arabako Foru Aldundiak onetsitako jarduerak eta programak.

13.7.3. Kenkariaren oinarriaren muga.

Mezenasgo jarduerengatik aplikatu daitezkeen kenkariaren oinarria ezin da izan zergaren likidazio oinarriaren ehuneko 30 baino gehiago.

Muga horrek eraginez gero, lehenik eta behin, mezenasgoko lehentasuneko jarduerari dagokien ehuneko 35eko kenkaria aplikatuko da, bigarrenik, egindako emari eta dohaintzei dagokien ehuneko 20ko kenkaria aplikatuko da eta, gero, zuzeneko zenbatespenaren peko zergadunek lehentasuneko adierazpena duten jarduerari egindako ekarpenei dagokien ehuneko 23ko kenkaria.

13.7.4. Dohaintzen kenkaria, erlijiosoek lanaren etekin guztiak euren kongregazioari ematearen ondorioz.

Argitu nahi da ea erlijiosoek beren kongregazioari emandako diru zenbatekoek mezenasgo jarduerengatik aplikatu daitezkeen kenkaririk sortzen duten (kenkari hori 33/2013 Foru Arauaren 91. artikuluan dago araututa), kontuan izanik erlijioso batzuek euren lanarekin lortutako etekin guztiak ematen dituztela.

Kongregazioak erlijiosoaren ostatu eta mantenu beharrianak asetzen dituzten gero, dohaintza kengarritzat ondoko hau baino ezin daitezke onartu: beharrian horiek asetzeak sortzen dituzten gastuen gaineko zenbatekoa.



13.7.5. COVID-19aren aurkako borrokan laguntzeko Osakidetzaren alde egindako dohaintza, ekarpen eta doako zerbitzuengatikoen kenkaria.

COVID-19aren aurkako borrokan laguntzeko Osakidetzaren alde egindako dohaintza, ekarpen eta doako zerbitzuei irabazteko xederik gabeko erakundeen eta mezenasgorako zerga pizgarrien araubideari buruzko uztailaren 12ko 16/2004 Foru Arauaren 21. artikulutik eta 24. artikulura aurreikusitako zerga onurak aplikatuko zaizkie.

Irabazteko xederik gabeko erakundeen eta mezenasgorako zerga pizgarrien zerga araubideari buruzko uztailaren 12ko 16/2004 Foru Arauaren 25. artikuluan adierazitakoarekin bat etorritik, kengarriak diren dohaintzak, ekarpenak eta doako zerbitzuak justifikatzeko, erakunde onuradunak artikulua horretan aurreikusitako egiaztagiriak aurkeztu beharko ditu, bai eta Ogasun, Finantza eta Aurrekontu Saileko foru diputatuaren foru agindu bidez onetsitako informazio eredu (182 eredu) ere.

13.8. Beste kenkari batzuk.

13.8.1. Nazioarteko zergapetze bikoitzaren kenkariak.

1.- Dibidenduak: Nazioarteko zergapetze bikoitzaren kenkaria kalkulatzeko, kontuan izanda urtean 1.500 euroko muga duela, PFEZaren 33/2013 Foru Arauak 9.24 artikuluan partaidetzen dibidenduei eta mozkinen ezarritako salbuespenak, dibidenduen gutzirako zenbatekoa muga hori baino gehiago bada, ezarri behar da zergadunak ekitaldian jasoriko dibidenduen zer zati proportzionalak jasan duen benetan zergapetze bikoitza (urtean gehienez jaso daitezkeen 1.500 euroak baino gehiago jasotzeagatik).

Proportzio berean konputatuko da atzerrian dibidendu horiengatik ordaindutako zerga.

2.- Atzerrian egindako lanengatik jasotako etekinak: Nazioarteko zergapetze bikoitzaren kenkaria kalkulatzeko, kontuan izanda urtean 60.100 euroko muga duela, 33/2013 Foru Arauaren 9.17. artikulua atzerrian egiaz egindako lanen etekinengatik ezarritako salbuespenak, etekinen gutzirako zenbatekoa muga hori baino gehiago bada, ezarri behar da zergadunak ekitaldian jasoriko etekinen zer zati proportzionalak jasan duen benetan zergapetze bikoitza (urtean gehienez jaso daitezkeen 60.100 euroak baino gehiago jasotzeagatik).

Proportzio berean konputatuko da atzerrian etekin horiengatik ordaindutako zerga.

13.8.2. Langileen sindikatuei ordaindutako kuoten eta alderdi politikoei emandako kuoten eta ekarpenen kenkaria.

Zergadunak langileen sindikatuei ordaindutako kuoten ehuneko 20ko kenkaria aplikatu ahal dute. Era berean, alderdi politikoei emandako afiliazio kuoten eta ekarpenen % 20ko kenkaria aplikatu ahal dute.

Ez dira sartu behar kenkari honen oinarrian 33/2013 Foru Arauaren 22.b. artikuluan ezarritakoaren arabera gastu gisa kendutako kopuruak.

Horretarako, hasiera batean, kenkari hori aplikatu ahal izateko, beharrezkoa da zergadunak 33/2013 Foru Arauaren 116. artikuluko h) eta i) letretan eta Zergaren Arautegiaren 123. artikuluko 11. eta 12. idatz zatietan (182 eredu) aipatzen den aitortpen informatiboan sartuta egotea.

13.8.3 Ibilgailu elektrikoak kargatzeko tokiak instalatzeagatikoen kenkaria. COVID-19arekin lotuta, pertsona fisikoen errentaren gaineko zergako, oinordetzen eta dohaintzen gaineko zergako



eta ondare eskualdaketan eta egintza juridiko dokumentatuen gaineko zergako doikuntza neurriak onesten dituen ekainaren 23ko 8/2020 Zerga Premiazko Araugintzako Dekretuaren 5. artikulua.

2020ko zergaldirako bakarrik, zergadunek pertsona fisikoen errentaren gaineko zergako kuota osotik kendu ahal izango dute beren jabetza den finkan edo komunitate garajeen beren jabetzako eta erabilera partikularreko ibilgailu elektrikoak kargatzeko tokiak instalatzeagatik ordaindutako diru kopuruen ehuneko 15. 2020ko uztailaren 1etik 2020ko abenduaren 31ra bitartean hasi behar dira instalazio lanak.

Aurreko Bat apartatuan ezarritako kenkaria aplikatzeko, indarrean dagoen legerian agindutako baimenak eduki behar dira.

Aurreko Bat apartatuan adierazi den kenkariaren oinarriak 15.000 euro izango du gehieneko muga. Horretarako, zergadunak ordaindutako diru kopuruak frogatu behar dira, dagokion faktura aurkeztuz, eta faktura horrek hari buruzko araudian ezarritako baldintzak bete behar dira.

Kenkariaren oinarria osatzen duten diru kopuruetatik kendu behar da zergadunak kontzeptu kengarri horrengatik jasotzen dituen eta pertsona fisikoen errentaren gaineko zergatik salbuetsita dauden dirulaguntzen zenbatekoa.

Ordaindutako diru kopuruek gainditzen badute aurreko Hiru apartatuan adierazi den gehieneko kenkari oinarria, jaso diren eta pertsona fisikoen errentaren gaineko zergatik salbuetsita dauden dirulaguntzek proportzionalki murriztuko dute kenkariaren oinarria.

Artikulu honetako Bat apartatuan adierazi diren instalazioak bukatuta egon behar dira 2021eko martxoaren 31rako, eta egun horretara arte egindako ordainketak aurreko Hiru apartatuan adierazi den kenkariaren oinarrian sartuko dira.

14. BATERAKO ZERGA ORDAINKETA.

14.1. Familia unitatearen modalitateak: 33/2013 Foru Arauaren 98. artikulua.

Bi familia unitate multzo bereizi behar dira:

a) Bi ezkontideek eratzen duten familia edo izatezko bikoteko kideek eratzen dutena (maiatzaren 7ko 2/2003 Legean xedatutakoaren arabera izatezko bikoteak, alegia), umeekin edo umerik gabe (98.1 artikulua). Familia unitate mota honetan ez da salbuespenik onartzen, nahiz eta ezkontideetako edo izatezko bikotekideetako batek umea edo umeak izan aurreko harremanetatik. Ume horiek familia unitate mota honetan sartu ahal dira, zeren eta foru arau horretako 98.1 artikuluan ez baita eskatzen familia unitatea eratzen duten umeek bi gurasoenak edo izatezko bikoteko bi kideenak izan behar dutenik nahitaez; eskatzen duen gauza bakarra da adingabeak izan daitezela (non eta, gurasoen baimenarekin, ez diren haiengandik bereizi) edo adin nagusikoak baina epaileak ezgaituak eta guraso ahal luzatuaren edo birgaituaren pekoak.

b) Legez bananduta egotea eta ezkontza lokarririk edo izatezko bikotearen lokarririk ez izatea (maiatzaren 7ko 2/2003 Legean xedatutakoaren arabera eratutako izatezko bikotea, esan nahi da); hau gertatzen da izatezko bikotea inskribatu ez bada edo ezkontza desegin egin bada, eta desegitea izan daiteke deuseztasunagatik, dibortzioagatik, heriotzagatik edo heriotza deklaratzegatik (98.2 artikulua).



Kasu horietan, familia unitatea gurasoetako batek eta adingabeko ume guztiek eratzten dute, norekin bizi diren kontuan hartu gabe. Beste gurasoa bizi bada ere, ez da familia unitateko kidea. Familia unitatea eratzeari begira ume guztiak guraso bati edo besteari eratzkitzeko guraso bien adostasuna beharko da. Adostasunik ez badago, hauexek dira familia unitateko kideak: seme-alaben zaintza ebazpen judizial baten bidez era eskusiboan duen gurasoa eta seme-alabak. Kasu horretan, bi familia unitate egon daitezke: guraso bakoitza eta berak modu eskusiboan zaintzapean dauzkan umeak.

Honelako kasuetan, gurasoetako bat gutxienez ezkondata dagoenean (edo izatezko bikotea osatzen denean beste pertsona batekin), aurreko harremanetako seme-alabak familia unitate bati edo beste bati esleitu behar zaizkio (aitarenari edo amarenari, bi gurasokoak zein guraso bakarrekoak izan), 33/2013 Foru Arauan gurasoengandiko legezko banaketarako edo ezkontzarik ezerako edo izatezko bikoterik ezerako ezarrizko irizpideen arabera. Hortaz, lotura bikoitzeko neba-arrebak familia batean edo bestean sartuko dira, gurasoen akordioaren arabera (edo familia unitatea osatuko dute batekin edo beste batekin). Akordio horren berririk ez badago, seme-alabak epaile baten ebazpenaren bidez haien zaintza eta babespea dauzkan gurasoaren familia unitateko kideak izango dira (edo familia unitatea osatuko dute berarekin, kasuan kasukoa). Honelako kasuetan, ume batzuen zaintza eta babespea guraso batek badauzka eta beste batzuenak besteak, bakoitzak bere familia unitatean sartu behar ditu epailearen ebazpena dela bide zaintzapean dauzkan umeak.

Aurreko bi paragrafoetan aurreikusitakoaren ondorioetarako, gurasoen arteko adostasuna zuzenbidean onartutako edozein frogabideren bitartez egiazta daiteke, eta, adierazi den bezala, adostasun horren froga sinesgarririk ez badago, familia unitateko kideak honako hauek baizik ez dira izango: ebazpen judizial baten bidez era eskusiboan seme-alaben zaintza duen gurasoa eta seme-alaba horiek.

Zergadun ezkonduak (edo 2/2003 Legearen arabera eratutako izatezko bikote bateko kideek) seme-alaba adingabeak badituzte ezkontidearekin edo izatezko bikotekidearekin (lotura bikoitzeko anai-arrebak) eta beste harreman batetik datozen beste seme-alaba adingabe batzuk badituzte, bi familia unitate egotea onartuko dugu baterako tributazioaren ondorioetarako:

-Senar-emazteek edo izatezko bikoteek eta seme-alaba komunek osatutakoa (beste harreman batetik datozen seme-alaben beste gurasoarekin adostu beharrik gabe).

-Beste harreman batetik datozen seme-alaben beste gurasoak eta seme-alaba horiek osatutakoa (bi gurasoen adostasuna beharko da, salbu eta zaintza ebazpen judizial bidez eskusiboki esleitu bada).

Irizpide bera aplikatuko da ezkontzak (edo 2/2003 Legearen arabera eratutako izatezko bikoteak) seme-alaba komunik ez badu, baina ezkontideetako batek beste harreman batetik datozen seme-alaba adingabeak baditu. Kasu horretan, honako hauek izan ahalko dira familia unitateak:

-Seme-alabarik gabeko senar-emazteek osatzen dutena.

-Beste harreman batetik datozen seme-alaben beste gurasoak eta seme-alaba horiek osatutakoa (bi gurasoen adostasuna beharko da, salbu eta zaintza ebazpen judizial bidez eskusiboki esleitu bada).

14.2. Zerga ordaintzeko aukerak urtean zehar familia unitateko kideren bat hiltzen denean.

Familia unitateko kide bat hiltzen bada abenduaren 31 ez beste egun batean, gainerako kideek bi aukera hauetako bat hautatu behar dute:

a) Bakoitzak banaka tributatu (hildakoaren aitopenen zergaldia urtea baino laburragoa izango da).



b) Baterako aitortpena aurkeztu, zenduaren errentak jasota.

15. AUTOLIKIDAZIOA EGIN BEHARRA.

15.1. 2020an aitortzeko betebeharra. 33/2013 Foru Arauaren 102.2 eta 102.3 artikuluen a) eta b) letrak.

Errentak honako iturri hauetatik soilik lortzen dituzten zergadunek ez dute autolikidaziorik egin beharko:

a) Lanaren etekin gordinak; urtean 14.000 euro gehienez, banakako zerga ordainketan. Baterako zerga ordainketan muga hori aipatutako etekin mota lortu duen zergadun bakoitzari aplikatuko zaio.

b) Lanaren etekin gordinak; urtean 14.000 eta 20.000 euro bitartean gehienez, banakako zerga ordainketan, salbu eta ondoren aipatzen diren egoeretako batean daudenentzat. Baterako zerga ordainketan muga hori aipatutako etekin mota lortu duen zergadun bakoitzari aplikatuko zaio.

c) Kapitalaren etekin gordinak eta ondare irabaziak, salbuetsiak barne (bi kontzeptuak); urteko guztirako zenbatekoa 1.600 euro baino gehiago ez bada.

Aurreko apartatuko b) letran adierazitako zergadunek zerga honen autolikidazioa aurkeztu behar dute kasu hauetan:

a) Ordaintzaile baten baino gehiagoren lan etekinak jaso badituzte.

Hala ere, 20.000 euro arteko laneko etekin gordinak jasotzen dituzten zergadunek ez dute aitortpena aurkeztu beharrik izango, baldin eta zenbatekoaren arabera hurrenkerako bigarren ordaintzailearengandik eta gainerako ordaintzaileengandik jasotako zenbatekoen batura, guztira, urtean 2.000 euro baino handiagoa ez bada. Paragrafo honetan xedatutakoa aplikatuko da, nahiz eta zenbatekoaren arabera hurrenkerako bigarren ordaintzaileak eta gainerako ordaintzaileek ordaindutako zenbatekoei dagokienez PFEZaren Araubidearen 69.1 artikuluan d) letran aurreikusitako inguruabarrak gertatu.

b) Ordaintzaile bakar baten lan etekinak jaso badituzte, baina lan edo administrazio kontratu bat baino gehiago izenpetu badute, indarrean dagoen ekitaldian edo luzapenean.

c) PFEZaren Araubidearen 69.1 artikuluan aurreikusitako kasuetan.

15.2. Nola zehaztu 33/2013 Foru Arauaren 102. artikuluan ezarritako mugak aplikatzeko kontuan hartu beharreko etekinak eta irabaziak.

Erregela hauek hartu behar dira kontuan, kasuan kasukoa errentaren arabera:

a. Lan etekinak: jasotako zenbateko gordina hartu behar da kontuan, integrazio ehunekoak aplikatu gabe, eta salbuetsi gabeko kopuruak soilik hartuko dira kontuan muga gainditzen den ala ez zehazteko. Ez dira kontuan hartuko ez gastu kengarriak ez hobariak.

Irizpide bera aplikatuko da lanaren etekinen zenbatekoa zehazteko, baldin eta zergadunak, betekizunak betetzen dituela, hautatzen badu etekin horiek soilik kontuan hartuz ordaintzea zerga (zerga hautapena: atxikipen arabera). Horrenbestez, lanaren etekinik lortu ezean, ezingo da aurrekoa aplikatu.



b. Kapital higiezinaren etekinak: sarrera positibo osoak hartuko dira kontuan, salbuetsitakoak barne, integrazio ehunekoak aplikatu gabe eta gastu kengarriak bazter utzita.

c. Kapital higigarriaren etekinak: sarrera positibo osoak hartuko dira kontuan, salbuetsitakoak barne, integrazio ehunekoak aplikatu gabe eta gastu kengarriak bazter utzita. Etekin positiboak ez dira konpentsatuko negatiboekin. Positiboak baizik ez dira aintzat hartuko.

d. Ondare irabaziak: ondare irabazi garbiak hartu behar dira kontuan, egunerapen eta txikipen koefizienteak aplikatu ondoren eta ekitaldiko ondare galerekin konpentsatu baino lehen, bai zerga oinarri orokorrean integratzen diren irabaziak, bai aurrezkiaren zerga oinarrian integratzen direnak.

Aitortu beharreko ondare irabaziei dagokienez, zerga oinarri orokorrean eta aurrezkiaren zerga oinarrian integratu beharrekoak batu behar dira, ondare galerak kontuan hartu gabe, halako moldez non haiek direla-eta ez baita sortzen aitortpena aurkeztu beharra. Hala ere, baldin eta zergadunak ondare galerak hurrengo ekitaldietan izan litezkeen irabaziekin konpentsatu nahi baditu, aitortpena aurkeztu beharko du, behartuta ez egon arren.

e. Ondare irabaziak ez dira konpentsatuko kapitalaren etekin negatiboekin. Kapitalaren etekin positiboak ere ez dira konpentsatuko negatiboekin.

15.3. 33/2013 Foru Arauaren 102.3 artikuluko aitortpena.

Lanaren etekinak ezarritako mugara ez iritsi arren, 33/2013 Foru Arauaren 102.3 artikuluan adierazitako arrazoiengatik aitortpena aurkeztu behar bada (Zergaren Arautegiaren 69.1.g) artikuluan ageri den kasua salbuetsita), zergadunak hauen artean hautatu ahal du:

a) Zerga berari buruzko xedapen orokorren arabera ordaindu

b) Zerga, hortaz, lanaren etekinak soilik kontuan hartuz ordaindu, 33/2013 Foru Arauaren 102.3 artikuluan ezarritako erregelen arabera.

Zerga ordaintzeko modu honi dagokionez:

b.1. Tauletan ezarritako atxikipen ehunekoa kalkulatzeko, kontuan hartuko den zenbatekoa hauxe izango da: sortutako etekin mota honen zenbateko osoari honako irizpide hauek aplikatzearen emaitzakoa:

- Dagozkion integrazio ehunekoak aplikatuko dira.
- 33/2013 Foru Arauaren 9. artikuluan xedatutakoaren arabera salbuetsita dauden ordainsariak bazter geratuko dira.
- Errenta hauek ez dira kontuan hartuko (33/2013 Foru Arauaren 71.1.b artikuluan xedatutakoa ordainsariei aplikatzearen emaitzako gehieneko mugarekin): 1) sustatzaileek enpleguko pentsio planetara egindako ekarpenak; 2) enpresa sustatzaileek 2003/41/EB Zuzentarauan araupetutako pentsio planetara egindako kontribuzioak; 3) bazkide babesleak BGAE-etara egindako ekarpenak; 4) enplegu emailek gizarte aurreikuspeneko mutualitateetara egindako ekarpenak, zerga oinarri orokorra txikitzen dutenak; 5) hartzailak enpresen aurreikuspen planetan ordaindutako primak.
- Etekinen jasotzaileak epaile baten ebazpena dela bide konpentsazio pentsioa eman behar badio bere ezkontideari edo izatezko bikotekideari (maiatzaren 7ko 2/2003 Legean xedatutakoaren arabera eraturako izatezko bikotea), haren zenbatekoari kendu behar zaio,



hala badagokio, atxikipen ehunekoa kalkulatzeko kontuan hartu beharreko ordainsarien bolumena, baldin eta Zergaren Arautegiaren 84.3.3 artikuluko erregelari ezarritako baldintzak betetzen badira.

b.2. Horri dagokionez, familiaren egoera urte naturaleko lehenengo egunean dagoena izango da, edo lan harremanen hasierako egunekoa, baldin eta harremanok data horren ondoren hasi badira.

b.3. Oro har ezarritako epealdian sartu beharreko zenbatekoa bi zatitan sartu ahal izango da.

b.4. Zergadun batzuek ezin hautatu izango dute zerga ordaintzeko modu hau. Hara zeintzuek:

- Lan eginez 20.000 €-tik gorako etekinak lortzen dituztenek.
- Kapitalaren etekin positiboak eta ondare irabaziak bat egunik 1.600 € baino gehiago lortzen dituztenek.
- Jarduera ekonomikoen etekinak lortzen dituztenek.
- Jarduera ekonomikoen gaineko zergaren erroldan alta emanda daudenenek, jarduera egin zein ez.
- Aurreko urteetako ondare galeren edo likidazio oinarri negatiboen konpentsazioak dituztenek.
- Baterako zerga ordainketa hautatzen dutenek.
- Ohiko etxebizitza eskualdatu eta berrinbertsioaren zioz salbuetsitako ondare irabaziak lortu dituztenek.
- Zergari dagokionez salbuespen, hobari, murrizketa, kenkari edo hobariren bati heltzeko eskubidea izateak Zerga Administrazioari hura jakinarazi beharra edo erregularizazio edo sarreraren bat egin beharra dakarrenean, zergadunak eskubide hori izateko ezarritako baldintza edo epeetako bat ez betetzea (Zergaren Arautegiaren 69.1.g artikulua).

Atxikipen ehunekoen taulak aplikatzeko ezartzen diren erregelak aitortzen mota honetako oinarria zein karga tasa zehazteko aplikatu behar dira; hau da, lehenbizi karga tasa kalkulatu behar da, eta gero oinarriari aplikatu behar zaio, atxikipenak kalkulatzeko egiten den bezala.

15.4. Hainbanaketak.

Ezin dira hainbanatu autolikidazioa egin behar izateko mugak.

Gasteiz, 2021ko martxoaren 23a.

María José Perea Urteaga
Ogasun zuzendaria
Directora de Hacienda